

欽定唐書

卷一百四十一之一百五十二

一百五十二

土岐文庫

文庫17

W202

23

30

25

20

15

10

文庫 17
W202
23

010185193735

昭和六十年二月一日
贈
寄

唐書卷一百四十一

宋 端 明 殿 學 士 宋 祁 撰

列傳第六十六

崔鄧魏衛李韓盧高



崔光遠系出博陵後徙靈昌祖敬嗣嗜酒博中宗在房州吏多肆慢不為禮敬嗣為刺史獨盡誠推奉
儲給豐衍帝德之及反正有與敬嗣同姓名者每擬官帝輒超拜後召見悟非是訪真敬嗣已死即授其
子汪五品官汪生光遠勇決任氣長六尺瞳子白黑分明開元末為唐安令與楊國忠善累遷京兆少尹
為吐蕃弔祭使還會玄宗西狩詔留光遠為京兆尹西京留守採訪使乘輿已出都人亂火左藏大盈庫
爭輦財珍至乘驢入宮殿者光遠乃募官攝府縣誰何宮闕斬十數人乃定因僞使其子東見祿山而祿
山先署張休為京兆尹由是追休授光遠故官俄而同羅背賊以廐馬二千出奔賊將孫孝哲安神威招
之不得神威憂死官吏驚走獄囚皆逸光遠以為賊且走命人守神威孝哲等第斬曳落河二人孝哲馳
白祿山光遠懼與長安令蘇震出開遠門使人奔呼曰尹巡門門兵具器仗迎謁至皆斬之募得百餘人
遂趨靈武肅宗嘉之擢拜御史大夫復為京兆尹遣到渭北募僑民會賊黨剽涇陽休祠房椎牛呼飲光

乾隆四年校刊 唐書卷一百四十一 列傳

遠刺知之率兵夜趨其所使百騎鼓滿狙其前命驍士合譟賊醉不能師斬其徒二千得馬千噉俘一酋長以獻自是賊常避其鋒扈帝還改禮部尚書鄴國公封實戶三百乾元元年繇汴州刺史代蕭華爲魏州節度使初郭子儀與賊戰汲郡光遠裁率汴師千人援之不甚力及守魏使將軍李處崧拒賊子儀不救戰不勝奔還賊因傳城下詭呼曰處崧召我而不出何也光遠信之斬處崧處崧善戰衆倚以爲重及死人益危魏城經袁知泰能元浩等完築牢甚光遠不能守夜潰圍出奔京師帝赦其罪拜太子少保會襄州將康楚元張嘉延反陷荆襄諸州因拜持節荆襄招討充山南東道兵馬都使又徙鳳翔尹先是岐隴賊郭愔等掠州縣時五堡光遠至遣官喻降之既而沈飲不親事情等陰約党項及奴刺突厥敗韋倫於秦隴殺監軍使帝怒光遠無狀召還復使節度劍南會段子璋反東川李奐敗走成都光遠進討平之然不能禁士卒剽掠士女至斲腕取金者夷殺數千人帝詔蓋軍按其罪以憂卒

鄧景山曹州人本以文吏進累至監察御史至德初擢拜青齊節度使徙淮南爲政簡肅有龜集城門鄧班語景山曰龜介物也失所次金不從革之象其有兵乎未幾宋州刺史劉展反初展有異志淮西節度使王仲昇表其狀詔遷揚州長史兼江淮都統密詔景山執送京師展知之擁兵二萬度淮景山逆擊不勝奔壽州因引平盧節度副使田神功討展神功兵至揚州大掠居人發冢墓大食波斯賈胡死者數千

人展叛凡三月平追景山入朝拜尚書左丞以崔圓代之王思禮在太原儲詹羸衍請輸半以實京師會卒管崇嗣代之政弛不治數月爲下盜費略盡帝聞卽以景山爲太原尹封南陽郡公至則振駁紀綱檢覆千隱衆大懼而景山清約子弟饌不過草具用器止烏漆待上賓惟豚魚而已取倉粟紅腐者食之兼給麾下麾下怨訕左右白景山景山曰此不食留將安用邪因慢罵士皆羞忿有裨校抵死諸將請贖不許其弟請代不許請納馬贖景山乃許減死衆怒曰吾屬命纒一馬直乎景山護失叱遣之少將黃抱節因衆怒作亂景山遇害時寶應元年也肅宗以其統馭失方不復究驗遣使喻撫其軍軍中請辛雲京爲節度詔可景山與劉晏善其後家寒窶屢經紀之嫁其孤女諡曰敬

崔瓘博陵人以士行修謹聞累官至澧州刺史不爲煩苛人便安之流亡還歸居二年增戶數萬詔特進五階以寵異政大厯中遷湖南觀察使時將吏習寬弛不奉法瓘稍以禮法繩裁之下多怨別將臧玠判官達奚覲忿爭覲曰今幸無事玠曰欲有事邪拂衣去是夜以兵殺覲瓘聞難惶懼走遇害帝悼惜之魏少游字少游邢州鉅鹿人以吏幹稱天寶末累遷朔方水陸轉運副使肅宗幸靈武杜鴻漸等奉迎而留少游繕治宮室少游大爲殿宇幄帟皆象宮闕諸王公主悉有次舍供饑窮水陸又有千餘騎鎧幟光鮮振旅以入帝見宮殿不悅曰我至此欲就大事安用是爲稍命去之除左司郎中兩京平封鉅鹿縣侯

遷陝州刺史王師潰於鄴河洛震駭少游鎮守自若擢京兆尹李輔國以其不附已改衛尉卿會率羣臣馬助軍少游與漢中王瑀持異帝怒貶渠州長史復爲京兆尹始請中書門下省五品尙書省四品諸司正員三品諸王駙馬碁以上親及婿若甥不得任京兆官詔可大厯二年爲江西觀察使進刑部尙書改封趙國公六年卒贈太子太師少游四爲京兆雖無赫赫名然善任人緣飾規檢有足稱者

衛伯玉史失其所人少習武技爲有力天寶中從安西府積勞至員外諸衛將軍肅宗卽位慨然願立功乃歸長安領神策兵馬使出鎮陝州行營乾元二年賊將李歸仁以騎五千入寇伯玉與戰疆子坂破之獲馬六百匹遷羽林大將軍徙四鎮北廷行營節度使俄爲神策軍節度使思明遣子朝義夜襲陝將動京師伯玉迎擊破之於永寧加特進封河東郡公廣德元年代宗幸陝以伯玉有幹略可方面大事乃拜荆南節度使進封城陽郡王大厯初以母憂當代諷將吏留已復詔節度荆南議者醜其留十一年歸

京師卒

李澄遼東襄平人隋蒲山公寬之遠胄以勇剽隸江淮都統李垣府爲偏將又從永平節度李勉軍勉帥汴表澄滑州刺史李希烈陷汴勉走澄以城降賊希烈以爲尙書令節度永平軍興元元年澄遣盧融間道奉表詣行在德宗嘉之署帛詔內蜜丸授澄刑部尙書汴滑節度使澄未卽宣乃先勒訓士馬希烈疑

以養子六百戍之賊急攻靈陵邀澄至石柱澄密令焚營爲驚遁者養子輩果乘以剽掠澄盡斬之以告希烈不能詣賊遣將翟崇暉率精兵寇陳州未還汴軍寡澄度不能制已又中官薛盈珍持節至封澄武威郡王賜實封乃燔賊旗節自歸希烈既失澄而崇暉復敗繇是奔汝南澄引兵將取汴屯其北門不敢進及劉洽師屯東門賊將田懷珍納之比澄入洽已保子城矣澄乃舍浚儀兩軍士日爭忿未能安會鄆州賊將孫液送款於澄澄遣子清馳赴先此河陽李元使偏將雍希顥攻鄆數殘剽液拒之及納清希顥大怒急攻鄆清助守殺河陽兵數千希顥焚陽武去澄遂如鄆詔授清檢校太子賓客易名克寧貞元初遷澄檢校尙書左僕射義成軍節度使二年卒年五十四贈司空澄始封隴西公後乃進王爵每上章必疊署二封士大夫笑其野澄之喪克寧闕不發閏旬日欲自領事其行軍司馬馬鉉不許克寧殺之墨經加卒嬰城將爲亂劉洽以兵屯境上遣使諭止遂自戢然道閉者半月詔以賈耽代鎮克寧乃護喪歸悉索府中財夜出軍士從剽之殆盡澄柩至京猶賜克寧莊一區錢千緡粟麥千石云

韓全義家素寒史失其先世興卒伍以巧佞事宦者竇文場擢累長武城使進拜夏綏銀宥節度使詔以長武兵赴之全義素懦貪無紀律爲下靳狎詔未下軍中徧知之謀曰夏州沙磧無樹藝生業不可往是夜謀而亂全義繼以逸殺其親將王栖巖趙虔曜等軍虞候高崇文誅亂首衆乃定全義得赴屯吳少誠

以蔡拒命詔合十七鎮兵討之時軍無帥統惟以奄豎監之遂敗于小澗德宗以文場素爲全義地因用爲淮西行營招討使以陳許節度使上官況副之諸鎮兵皆屬全義無它方略號令悉稟監軍每議攻戰官豎十數紛爭帳中小人好自異互詆訾不能決賊知之數請戰遇賊廣利城方暑地沮瀟士皆病瘡全義未嘗存之既戰師皆潰退保五樓賊移屯逼之乃與監軍賈英秀等保澗水不能固又入屯陳州是時惟陳許將孟元陽神策將蘇光榮守澗水全義誘潞滑州數大將殺之然卒不振官人共掩其敗帝不知少誠度無能爲卽謾書謝監軍求洗前咎帝下其議宰相賈耽以爲五樓之敗賊不追者以冀恩耳請納其誠帝然之全義班師過闕下託疾不入謁司馬崔放見帝謝無功帝曰全義誘少誠歸國功大矣何必殺敵乃爲功邪還屯夏州中人卽第宴資然卒不見天子去時恨帝失政使姦人得肆云憲宗在藩疾之既嗣位全義大懼願入覲不復用以太子少保致仕卒其子獻女樂八人帝不納曰我方以儉治天下惡用是爲哉

盧從史其先在元魏時爲盛族後徙籍不常父處好學由進士第歷御史祕書監從史少好騎射遊潞潞閻節度使李長榮署爲督將貞元後藩臣闕德宗必取本軍所喜戴者授之從史在潞姦獪得志又善附迎中人會長榮卒卽擢拜昭義節度副大使既得志寔恣不道至奪部將妻而能辯給粉澤其非府屬孔

戡等屢以直語爭刺初唯唯後益不從皆引去元和中丁父喪去官從史卽獻計誅王承宗陰向帝旨繇是奪服領澤潞因詔討賊而勒兵逗留陰與承宗交得其密號授軍中又高芻粟直以售度支卽上書求兼宰相且誣諸軍與賊通兵未可進憲宗患之初神策中尉吐突承瓘與對壘從史時過其營飲博承瓘多出寶帶奇玩夸之將史資資猥所玩悅必遺焉從史喜益狎不疑帝用裴垵謀敕承瓘圖之承瓘伏壯士幕下伺其來與語士突起捧持出帳後縛內車中從者驚亂斬數十人諭以密詔而大將烏重胤素忠果部勒其衆乃定會夜疾驅未明出境道路無知者於是五年夏四月有詔慰其軍疏從史罪惡貶驩川司馬賜死子繼宗等並徙嶺南

高霞寓幽州范陽人其先五代不異居孝聞里閻德宗初採訪使洪經綸言之闕詔表于門霞寓能讀春秋及兵法頗以感槩自尙狡譎多變往見長武城使高崇文崇文異其才檄任軍職從擊劉闢戰輒克下鹿頭城降李文悅仇良輔等追戰七盤城有功闕於羊灌擢拜彭州刺史俄代崇文爲長武城使封感義郡王元和中以左威衛將軍隨吐突承瓘討王承宗諸將多覆軍獨霞寓有功詔藏所獲鎧仗於神策庫以旌之承瓘已執盧從史其軍相驚乃遣霞寓諭之麾而大呼曰元惡縛矣公等宜自安卽脫鎧揖而前衆遂定欲留爲帥霞寓問道去拜豐州刺史三城都團練防禦使討吳元濟也析山南東道爲兩鎮以

靺鞨將拜唐鄧隋節度使遏賊南衝靺鞨雖悍而寡謀統制尤非所善始引兵趨蕭陂戰小勝進至文城柵賊僞北逐之爲伏所掩遂大敗才以身免詔貶歸州刺史乃厚賂權宦召爲右衛大將軍拜振武節度使會吐蕃攻鹽豐二州靺鞨以兵五千屯拂雲堆虜引去浚金河漑鹵地數千頃改左武衛大將軍又節度邠靈位檢校司徒寶祿中疽發首不能事以右金吾衛大將軍召卒于道贈太保靺鞨位既高言多不遜帝欲罷其兵益自憂乃上私第爲佛祠請署曰懷恩以塞帝疑俄又詔侮僚屬作慢語斥訕大臣其反覆自任類此

唐書卷一百四十一

唐書卷一百四十一考證

崔光遠傳光遠乃募官攝府縣誰何宮闕斬十數人乃定○召德潛按誰何宮闕四字未明舊書云募人

攝府縣官分守之殺數十人方止較明白

魏城經袁知泰能元浩等完築牢甚○能元浩舊書作元皓

李澄傳使偏將雍希顥攻鄭○舊書作雍顥

唐書卷一百四十一考證

唐書卷一百四十二

宋 端 明 殿 學 士 宋 祁 撰

列傳第六十七

李楊崔柳韋路

李麟裔出懿祖於屬最疏父溶歷潤虢潞三州刺史以誠信號良吏開元中終劍南節度按察使贈戶部尚書諡曰誠麟好學善文辭以父蔭補京兆府戶曹叅軍舉宗室異能轉殿中侍御史累擢兵部侍郎與楊國忠同列國忠怙權疾之改權禮部貢舉國忠遷麟復本官改國子祭酒出為河東太守有清政安祿山反朝廷以麟儒者非禦侮才還為祭酒封渭源縣男玄宗入蜀麟走見帝再遷憲部尚書同中書門下平章事時宰相韋見素房瑁崔渙崔圓踵赴肅宗行在獨麟以宗室子留總百司上皇還京進同中書門下三品封襄國公張皇后挾李輔國寢撓政苗晉卿崔圓等畏其權皆附離取安獨麟守正不阿順輔國忌患乾元初罷為太子少傅明年卒年六十六贈太子太傅諡曰德

楊綰字公權華州華陰人祖溫玉在武后時為顯官世以儒聞綰少孤家素貧事母謹甚性沈靖獨處一室左右圖書凝塵滿席澹如也不好立名有所論著未始示人第進士補太子正字舉詞藻宏麗科玄宗

乾隆四年校刊

唐書卷一百四十一列傳

已試又加詩賦各一篇綰爲冠由是擢右拾遺制舉加詩賦綰始天寶亂肅宗卽位綰脫身見行在拜起居舍人知制誥累遷中書舍人兼修國史故事舍人年久者爲閣老其公廩雜料獨取五之四至綰悉均給之歷禮部侍郎建復古孝廉力田等科天下高其議俄遷吏部品裁清允人服其公是時元載秉政忌綰望高疏薄之宦者魚朝恩判國子監既誅因是建言太學當得天下名儒汰其選卽拜綰國子祭酒外示尊重而實以散地處之載日貪冒天下士議益歸綰帝亦知之自擢爲太常卿充禮儀使載得罪拜中書侍郎同中書門下平章事修國史制下士相賀於朝綰固讓帝不許時諸州悉帶團練使綰奏刺史自有持節諸軍事以掌軍旅司馬古司武所以副軍卽今副使司兵參軍卽今團練判官官號重複可罷天下團練守捉使詔可又減諸道觀察判官員之半復言舊制刺史被代若別追皆降魚書乃得去開元時置諸道採訪使得專停刺史威柄外移漸不可久其刺史不稱職若贓負本道使具條以聞不得擅追及停而刺史亦不得輒去州詣使所如其故闕使司無署攝聽上佐代領帝善其謀於是高選州上佐定上中下州差置兵員詔郎官御史分道巡覆又定府州官月稟使優狹相均始天下兵興從權宜官品同而祿例差及四方粗定元載王縉當國偷以爲利因不改故江淮大州至月千緡而山劍貧險雖上州刺史止數十緡及此始復太平舊制綰素痼疾居旬日寢劇有詔就中書療治每對延英殿許挾扶于時

補穿敝唯綰是恃未幾薨帝驚悼詔羣臣曰天不使朕致太平何奪綰之速邪卽日詔贈司徒遣使者冊授欲及其未斂也詔百官如第弔遣使會弔贈絹千匹布三百匹太常諡曰文貞比部郎中蘇端儉人也持異議宰相常衰陰助之帝以其言醜險不實貶端巴州員外司馬猶賜諡曰文簡綰儉約未嘗問生事祿粟分姻舊隨多寡輒盡造之者清談終晷而不及榮利欲干以私聞其言必內愧止經詰微趣學家疑晦者一見卽詣其極始輔政御史中丞崔寬本豪侈城南別墅池觀堂皇爲當時第一卽日遣人毀之京兆尹黎幹出入從騶馭百數省損才留十餘騎中書令郭子儀在邠州行營方大會除書至音樂散五之四它聞風靡然自化者不可勝紀世以比楊震山濤謝安云

崔祐甫字貽孫太子賓客孝公沔之子也世以禮法爲聞家第進士調壽安尉安祿山陷洛陽祐甫冒矢石入私廟負木主以逃自起居舍人累遷中書舍人性剛直遇事不回時侍郎闕祐甫攝省事數與宰相常衰爭議不平衰怒使知吏部選每擬官衰輒駁異祐甫不爲下會朱泚軍中貓鼠同乳表其瑞詔示衰衰率羣臣賀祐甫獨曰可弔不可賀詔使問狀對曰臣聞禮迎貓爲其食田鼠以其爲人去害雖細必錄今貓受畜於人不能食鼠而反乳之無乃失其性邪貓職不修其應若曰法吏有不觸邪疆更有不扞敵臣愚以爲當命有司察貪吏誠邊候勤徼巡則貓能致功鼠不爲害代宗異其言衰益不喜帝崩衰與禮

官議禮爲君斬衰三年漢文帝權制三十六日我太宗文皇帝崩遺詔亦三十六日羣臣不忍既葬而除略盡四月高宗如漢故事玄宗以來始變天子喪爲二十七日乃者遺詔雖曰天下吏民三日釋服羣臣宜如皇帝服二十七日乃除祐甫曰遺詔無臣庶人之別是皇帝宜二十七日而羣臣三日也衰曰賀循稱吏者官長所署非公卿百官也祐甫對傳曰委之三吏乃三公也史稱循吏良吏豈胥吏歟衰曰禮非天降地出人情而已且公卿大臣膺受寵祿今與黔首同信宿而除於公安乎祐甫曰若遺詔何詔而可改孰不可改意象殊厲衰方入臨遣從吏扶立殿墀上祐甫指之謂衆曰臣哭君前有扶禮乎衰不勝怒乃劾祐甫率情變禮撓國典請貶潮州刺史德宗以爲重改河南少尹始肅宗時天下務劇宰相更直掌事若休沐還第非大詔命不待徧曉則聽直者代署以聞是時郭子儀朱泚俱以平章事當署敕尾而不行宰相事帝新卽位衰如故事代署子儀泚入言祐甫不宜貶帝曰卿向何所言今云非邪二人對初不知帝怒以衰爲罔上是日羣臣直經立月華門外卽兩換職以衰河南少尹而拜祐甫門下侍郎同中書門下平章事俄改中書侍郎自至德乾元以來天下戰討敗丐填委故官賞繆紊永泰後稍稍平定而元載用事非賄謝不與官劉蕡公路綱紀大壞載誅楊綰相未幾卒衰當國懲其敝凡奏請一杜絕之惟文辭入第乃得進然無所甄異賢愚同滯焉及祐甫則薦舉惟其人不自疑畏推至公以行未踰年除吏幾

八百員莫不諧允帝嘗謂曰人言卿擬官多親舊何邪對曰陛下令臣進擬庶官夫進擬者必悉其才行如不與聞知何由得其實帝以爲然神策軍使王駕鶴者典衛兵久權震中外帝將代之懼其變以問祐甫祐甫曰是無足慮卽召駕鶴留語移時而代者已入軍中矣淄青李正己畏帝威斷表獻錢三十萬緡以觀朝廷帝意其詐未能答祐甫曰正己誠詐陛下不如因遣使勞其軍以所獻就賜將士若正己奉承詔書是陛下恩洽士心若不用彼自斂怨軍且亂又使諸藩不以朝廷爲重賄帝曰善正己慙服時議者違其謨謀謂可復貞觀開元之治是歲被疾詔肩輿至中書臥而承旨若還第卽遣使咨決薨年六十贈太傅諡曰文貞故事門下侍郎未有贈三師者帝以其有大臣節特寵異之朱泚亂祐甫妻王陷賊中泚嘗與祐甫同列遣以繒帛菽粟受而緘鐺之帝還京具封以獻士君子益重其家法云子植嗣植字公修祐甫弟廬江令嬰甫子也祐甫病謂妻曰吾歿當以廬江次子主吾祀及卒護喪者以聞帝惻然召植使卽喪次終服補弘文生博通經史於易尤邃與鄭覃同時爲補闕皆賢宰相後每朝廷有得失兩人者更疏論執譽望蔚然元和中爲給事中時皇甫鏘判度支建言減百官奉稟植封還詔書鏘又請天下所納鹽酒利增估者以新準舊一切追償植奏言用兵久百姓凋罄往雖估踰其實今不可復收於是議者咸罪鏘鏘懼而止長慶初拜中書侍郎同中書門下平章事穆宗問貞觀開元中治道最盛何致

而然植曰太宗資上聖興民間知百姓疾苦故厲精思治又以房玄齡杜如晦魏徵王珪為之佐君明臣忠聖賢相維治致升平固其宜也玄宗在天后時身踐憂患既即位得姚崇宋璟此二人晝夜孜孜納君於道環嘗手寫尚書無逸為圖以獻勸帝出入觀省以自戒其後朽暗乃代以山水圖稍怠於勤左右不復箴規姦臣日用事以至于敗昔德宗嘗問先臣祐甫開元天寶事先臣具道治亂所以然臣在童卯記其說今願陛下以無逸為元龜則天下幸甚悅日又問司馬遷言漢文帝惜十家產而罷露臺身衣弋絺履革烏集上書囊為殿帷信乎何太儉邪植曰良史非貌言漢承秦侈縱之餘海內凋窶文帝從代來知稼穡艱難是以躬履儉約為天下守財景帝遵而不改故家給戶足至武帝時錢朽貫穀紅腐乃能出師征伐威動四方然侈靡不節末年戶口減半稅及舟車人不聊乃下哀痛詔封丞相為富人侯然則帝王不可以不示儉而天下足帝曰卿言善患行之為難耳時朝廷悉收河朔三鎮而劉總又以幽薊七州獻諸朝且懼部將構亂乃先籍豪銳不檢者送京師而朱克融在籍中植與杜元穎不知兵謂藩鎮且平不復料天下安危事而克融等驕旅塞蹟願得官自效日訴于前皆抑不與及遣張弘靖赴鎮縱克融等北還不數月克融亂復失河朔矣天下尤之植內慙罷為刑部尚書旋授岳鄂觀察使未幾遷嶺南節度使還拜戶部尚書終華州刺史贈尚書左僕射

俊字德長祐甫從子也性介潔矜己之清視職負者若讎以蘇州刺史奏課第一遷湖南觀察使湖南舊法雖豐年貿易不出境隣部災荒不恤也俊至謂屬吏曰此豈人情乎無閉糴以重困民削其禁自是商賈流通貨物益饒入為戶部侍郎判度支時田弘正徙鎮州以魏兵二千行既至留自衛請度支給歲糧穆宗下其議俊固執不與弘正不得已遣魏卒俄而鎮兵亂弘正遇害俊之為也時天子失德俊黨與盛有司不敢名其罪出為鳳翔節度使踰年徙河南尹以戶部尚書致仕卒贈太子少保諡曰肅

贊曰植輔政當有為之時無經國才履危防淺機不知其潰而發也手弛檻縶縱虎狼焉一日而亡地數千里為天下笑俊吝財資賊又皆幸不誅天以河北亂唐故君臣不肖勃繆其謀惜哉

柳渾字夷曠一字惟深本名載梁僕射悞六世孫後籍襄州早孤方十餘歲有巫告曰兒相天且賤為浮屠道可緩死諸父欲從其言渾曰去聖教為異術不若速死學愈篤與游者皆有名士天寶初擢進士第調單父尉累除衢州司馬棄官隱武甯山召拜監察御史臺僚以儀矩相繩而渾放曠不樂檢局乃求外職宰相惜其才留為左補闕大厯初江西魏少游表為判官州僧有夜飲火其廬者歸罪瘖奴軍候受財不諳獄具渾與其僚崔祐甫白奴冤少游趣訊僧僧首伏因厚謝二人路嗣恭代少游渾遷團練副使俄為袁州刺史祐甫輔政薦為諫議大夫浙江東西黜陟使入為尚書右丞朱泚亂渾匿終南山賊素聞其

名以宰相召執其子榜笞之搜索所在渾羸服步至奉天改右散騎常侍賊平奏言臣名向爲賊汙且載於文從戈非偃武所宜乃更令名貞元元年遷兵部侍郎封宣城縣伯李希烈據淮蔡關播用李元平守汝州渾曰是夫銜玉而賈石者也往必見禽何賊之壤旣而果爲賊縛三年以本官同中書門下平章事仍判門下省帝嘗親擇吏宰畿邑而政有狀召宰相語皆贊帝得人渾獨不贊曰此特京兆尹職耳陛下當擇臣輩以輔聖德臣當選京兆尹承大化尹當求令長親細事代尹擇令非陛下所宜帝然之玉工爲帝作帶誤毀一銖工不敢聞私市它玉足之及獻帝識不類隨之工人伏罪帝怒其欺詔京兆府論死渾曰陛下遽殺之則已若委有司須詳讞乃可於法誤傷乘輿服罪當杖請論如律由是工不死左丞田季羔從子伯彊請竇私第募兵助討吐蕃渾曰季羔先朝號名臣由祖以來世孝謹表闕于門隋時舊第惟田一族耳討賊自有國計豈容不肖子毀門構微一時倖損風教哉請薄責以示懲沮帝嘉納韓滉自浙西入朝帝虛己待之奏事或日晏佗相取充位滉遂省中撈吏自若渾雖爲滉所引惡其專質讓曰省闈非刑人地而撈吏至死公家先相國以狷察不滿歲輒罷今公奈何蹈前非顛立威福豈尊主卑臣義邪滉悔悟稍褻其威白志貞除浙西觀察使渾奏志貞興小史縱嘉其才不當超劇職臣以死守不敢奉詔會渾移疾出即日詔付外施行疾間因乞骸骨不許門下吏白過官渾愀然曰旣委有司而復撓之豈

賢者用心邪士或千里辭家以干祿小邑主辦豈慮不能是歲擬官無退異者渾城與吐蕃會平涼是日帝語大臣以和戎息師之便馬燧賀曰今日已盟可百年無虜患渾跪曰五帝無誥誓三王無盟詛蓋盟詛之興皆在季末今盛明之朝反以季末事行於夷狄夫夷狄人面獸心易以兵制難以信結臣竊憂之李晟繼言曰蕃戎多不情誠如渾言帝變色曰渾儒生未達邊事而大臣亦當爾邪皆頓首謝夜半邠靈節度使韓游瓌飛奏吐蕃劫盟將校皆覆沒帝大驚卽以其表示渾明日慰之曰卿儒士乃知軍戎萬里情乎益禮異之宰相張延賞怙權嫉渾守正遣親厚謂曰明公舊德第慎言於朝則位可久渾曰爲吾謝張公渾頭可斷而舌不可禁卒爲所擠以右散騎常侍罷政事渾驚辯好談謔與人交豁如也情儉不營產利免後數日置酒召故人出游酣肆乃還曠然無黜免意時李勉盧翰皆以舊相闔門奉朝請歎曰吾等視柳宜城真拘俗之人哉五年卒年七十五諡曰貞渾母兄識字方明知名士也工文章與蕭穎士元德秀劉迅相上下而識練理創端往往詣極雖趣尙非博然當時作者伏其簡拔渾亦善屬文但沈思不逮於識云

韋處厚字德載京兆萬年人事繼母以孝聞親歿廬墓終喪中進士第又擢才識兼茂科授集賢校書郎舉賢良方正異等宰相裴垪引直史館改咸陽尉憲宗初擢左補闕禮部尙書李絳請問言古帝王以納

諫爲聖拒諫爲昏今不聞進規納忠何以知天下事帝曰韋處厚路隋數上疏其言忠切顧卿未知爾由是中外推其靖密歷考功員外郎坐與宰相韋貫之善出開州刺史以戶部郎中入知制誥穆宗立爲翰林侍講學士處厚以帝冲怠不向學卽與路隋合易書詩春秋禮孝經論語撮其粹要題爲六經法言二十篇上之冀助省覽帝稱善並賜金幣再遷中書舍人張平叔以言利得幸於帝建言官自鬻鹽籠天下之財宰相不能詰下羣臣議處厚發十難謂其迂謬平叔愧縮遂寢敬宗初李逢吉得柄構李紳遂爲端州司馬其黨劉栖楚等欲致紳必死建言當徙醜地處厚上言逢吉黨與以紳之斥猶有餘辜人情危駭詩云萋兮斐兮成是貝錦彼譖人者亦已太甚譏言罔極交亂四國此古人疾讒之深也孔子曰三年無改於父之道可謂孝矣按紳先朝舊臣就令有過尙當被瑕洗釁成無改之美況被讒乎建中時山東之亂興宰相朋黨楊炎爲元載復讎盧杞爲劉晏償怨兵連禍結天下騷然此陛下親所聞見得不深念哉紳繇是免逢吉怒至寶曆三年赦書不言左降官未量移者以沮紳內徙處厚復奏逢吉緣紳一人而使近歲流斥皆不蒙澤非所以廣恩於天下帝悟追改其條進翰林承旨學士兵部侍郎方天子荒暗月視朝才三四處厚入見卽自陳有罪願前死以謝帝曰何哉對曰臣昔爲諫官不能死爭使先帝因畋與色而至不壽於法應誅然所以不死者陛下在春宮十有五矣今皇子方襁褓臣不敢避死亡之誅帝大感

悟賜錦綵以慰其意王廷湊之亂帝歎宰相不才而使姦臣跋扈處厚曰陛下有一裴度不能用乃當饋而歎恨無蕭曹此馮唐所以謂漢文帝有頗牧不能用也後禁中急變文宗綏內難猶豫未卽下詔處厚入昌言曰春秋大義滅親內惡必書以明逆順正名討罪何所避諱哉遂奉教班諭是夕號令及它儀矩不暇責有司一出處厚無違藹章者進拜中書侍郎同中書門下平章事封靈昌郡公堂史湯鉢數招權納財賂處厚笑曰此半滑渙也斥出之相府蕭然初貞元時宰相齊抗奏罷州別駕及當爲別駕者引處之朝元和後兩河用兵裨將立功得補東宮王府官朱紫濬并授受不綱處厚乃置大雄十望十緊等州悉補別駕由是流品澄別帝雖自力機政然驟信輕改搖於浮論處厚嘗獨對曰陛下不以臣不肖使待罪宰相凡所奏可中輒變易自上心出邪乃示臣不信得於橫議邪卽臣何名執政且裴度元勳舊德輔四朝寶易直長厚忠實經事先帝陛下所宜親重委信之臣乃陛下自擢今言不見納宜先罷卽趨下頓首帝矍然曰何至是卿之忠力朕自知之安可遽辭以重吾不德處厚趨出帝復召問所欲言乃對近君子遠小人始可爲治諄復數百言又言裴度忠可久任帝嘉納之自是無復橫議者時李同捷叛詔諸軍進討魏博史憲誠懷向背裴度待以不疑憲誠遣吏白事書處厚召語曰晉公以百口保爾帥於天子我則不然正須所爲以邦法從事耳憲誠懼不敢貳卒有功李載義數破滄鎮兵皆劖剔以獻處厚戒之

前後完活數百千人。大和二年，方奏事暴疾仆，香案前，帝命中人翼扶之，輿還第一。昔薨年五十六，贈司空，處厚姿狀如甚懦者，居家亦循易，至廷爭，嶷然不可回奪。剛于御史，百僚謁事，畏惕未嘗敢及，以私推擇官材，往往棄瓊錄，善時亦譏其太廣性嗜學家書，雖正至萬卷，為拾遺時，讓德宗實錄，後又與路隋共次憲宗實錄，詔分日入直，創具凡例，未及成而終。本名瀆，避憲宗諱改今名。

路隋字南式，其先出陽平。父泌，字安期，通五經，端亮寡言，以孝悌聞。建中末，為長安尉。德宗出秦，天粟妻子奔行在，扈狩梁州，排亂軍以出，再中流矢，裂裳濡血，以策說渾瑊，召置幕府。東討李懷光，奏署副元帥。判官從瑊會盟平涼，為虜所執，死焉。時隋嬰孺，以恩授八品官，逮長知父執虜，中日夜號泣，坐必西嚮，不食肉，母告以貌類泌者，終身不引鏡。貞元末，吐蕃請和，隋三上疏，宜許不報，舉明經授潤州參軍事。李錡欲困辱之，使知市事，隋怡然坐肆，不為屈。韋夏卿高其節，辟置東都幕府。元和中，吐蕃款塞，隋五上疏請修好，冀得泌遺詔，可遣祠部郎中徐復報聘，而泌以喪至，帝愍惻，贈絳州刺史，官為治喪服，除擢隋左補闕。史館修撰以鯁亮稱，穆宗立，與韋處厚並擢侍講學士，再遷中書舍人、翰林學士，每除制，出以金幣來謝者，隋却之曰：「公事而當私，貶邪進承旨學士，遷兵部侍郎、文宗嗣位，以中書侍郎、同中書門下平章事監修國史，初韓愈撰順宗實錄，書禁中事，為切直，宦豎不喜，嘗其非實，帝詔隋刊正，隋建言衛尉卿周居

業，諫議大夫王彥威給事中李固言、史官蘇景胤皆上言改修，非是。夫史冊者，褒勸所在，匹夫美惡尚不可誣，況人君乎？議者引雋不疑第五倫為比，以蔽聰明。臣僧孺謂史官李漢、蔣係皆愈之壻，不可參撰，俾臣得下筆，臣謂不然。且愈所書已非自出，元和以來，相循逮今，雖漢等以嫌無害，公誼請條示甚謬，誤者付史官，刊定有詔，臆貞元永貞間數事為失實，餘不復改。漢等亦不罷進門下侍郎弘文館大學士，久之辭疾不聽，冊拜太子太師。明年李德裕貶袁州長史，不署奏為鄭注所忌，乃檢校尚書右僕射、同中書門下平章事、鎮海節度使，道病卒，年六十，贈太保，諡曰貞。贊曰：縮以德服人，而人自化，可謂賢矣。其論議渾大，雖古王佐無以加。祐甫發正己隱情，渾策吐蕃必叛，伐謀知幾君子哉。處厚事穆敬文三宗主，皆弗類而一納以忠，蓋不謂以堯事君者邪。隋輔政十年，歷牛李訓用事，無所迎將善保位哉。

唐書卷一百四十二

唐書卷一百四十二考證

楊綰傳帝以其言醜險不實貶端巴州員外司馬○舊書作廣州

柳渾傳入爲尙書右丞○舊書遷尙書左丞

改右散騎常侍○舊書改左騎常侍

貞元元年遷兵部侍郎○舊書貞元二年

唐書卷一百四十二考證

唐書卷一百四十三

宋 端 明 殿 學 士 宋 祁 撰

列傳第六十八

高元李韋薛崔戴王徐郗辛

高適字達夫滄州渤海人少落魄不治生事客梁宋間宋州刺史張九臯奇之舉有道科中第調封丘尉不得志去客河西河西節度使哥舒翰表為左驍衛兵曹參軍掌書記祿山亂召翰討賊即拜適左拾遺轉監察御史佐翰守潼關翰敗帝問群臣策安出適請竭禁藏募死士抗賊未為晚不省天子西幸適走間道及帝於河池因言翰忠義有素而病奪其明乃知荒踣監軍諸將不恤軍務以倡優蒲箋相娛樂渾隴武士飯糲米日不厭而責死戰其敗固宜又魯晁何履光趙國珍屯南陽而一二中人監軍更用事是能取勝哉臣數為楊國忠言之不肯聽故陛下有今日行未足深恥帝領之俄遷侍御史擢諫議大夫負氣敢言權近側目帝以諸王分鎮適盛言不可俄而永王叛肅宗雅聞之召與計事因判言王且敗不足憂帝奇之除揚州大都督府長史淮南節度使詔與江東韋陟淮西來瑱率師會安陸方濟師而王敗李輔國惡其才數短毀之下除太子少詹事未幾蜀亂出為蜀彭二州刺史始上皇東還分劍南為兩節度

百姓傲於調度而西山三城列戍適上疏曰劍南雖名東西川其實一道自邛關黎雅以抵南蠻由茂而西經羌中平戎等城界吐蕃瀕邊諸城皆仰給劍南異時以全蜀之饒而山南佐之猶不能舉今裂梓遂等八州專爲一節度歲月之計西川不得參也嘉陵比困夷獠日雖小定而痍瘡未平耕紡亡業衣食貿易皆資成都是不可得役亦明矣可稅賦者獨成都彭蜀漢四州而已以四州耗殘當十州之役其傲可見而言利者柄鑿萬端窮朝抵夕千案百牘皆取之民官吏懼譴責及鄰保威以罰扶而逋逃益滋又關中比饑士人流入蜀者道路相繫地入有訖而科歛無涯爲蜀計者不亦難哉又平戎以西數城皆窮山之巔蹊險絕運糧束馬之路坐甲無人之鄉爲戎狄言不足利戎狄爲國家言不足廣土宇奈何以彈丸地而困全蜀太平之人哉若謂已成之城不可廢已屯之兵不可收願罷東川以一劍南併力從事不獨非陛下洗盪關東清逆亂之意也蜀人又擾則貽朝廷憂帝不納梓屯將段子璋又適從崔光遠討斬之而光遠兵不戢遂大掠天子怒罷光遠以適代爲西川節度使廣德元年吐蕃取隴右適率兵出南鄙欲牽制其力既無功遂亡松維二州及雲山城召還爲刑部侍郎左散騎常侍封渤海縣侯永泰元年卒贈禮部尚書諡曰忠適尚節義語王霸褒褒不厭遭時多難以功名自許而言浮其術不爲搢紳所推然政寬簡所涖人便之年五十始爲詩卽工以氣質自高每一篇已好事者輒傳布其詒書賀蘭進明使救

梁宋以親諸軍與許叔冀書令釋憾未度淮移檄將校絕永王俾各自白君子以爲義而知變

元結後山王魏常遵十五代孫曾祖仁基字惟固從太宗征遼東以功賜宜君田二十頃遼口并馬牝牡各五十拜靈塞令襲常山公祖亨字利貞美姿儀嘗曰我承王公餘烈鷹犬聲樂是習吾當以儒學易之霍王元軌聞其名辟參軍事父延祖三歲而孤仁基救其母曰此兒且祀我因名而字之逮長不仕年過四十親姬彊勸之再調春陵丞輒棄官去曰人生衣食可適饑飽不宜復有所須每灌畦掇薪以爲有生之役過此吾不思也安祿山反召結戒曰而曹逢世多故不得自安山林勉樹名節無近羞辱云卒年七十大門人私諡曰太先生結少不羈十七乃折節向學事元德秀天寶十二載舉進士禮部侍郎陽浚見其文曰一第恩子耳有司得子是賴果擢上第復舉制科會天下亂沈浮人間國子司業蘇源明見肅宗問天下士薦結可用時史思明攻河陽帝將幸河東召結詣京師問所欲言結自以始見軒墜拘忌諱恐言不悉情乃上時議三篇其一曰議者問往年逆賊東窮海南淮漢西抵函秦北徹幽都醜徒狼扈在四方者幾百萬當時之禍可謂劇而人心危矣天子獨以匹馬至靈武合弱旅鉏疆寇師及渭西曾不踰時摧銳攘凶復兩京收河南州縣何其易邪乃今河北姦逆不盡山林江湖亡命尙多盜賊數犯州縣百姓轉徙踵繫不絕將士臨敵而奔賢人君子遁逃不出陛下往在靈武鳳翔無今日勝兵而能殺敵無今日

檢禁而無亡命無今日威令而盜賊不作無今日財用而百姓不流無今日爵賞而士不散無今日朝廷而賢者思仕何哉將天子能以危爲安而忍以未安忘危邪對曰此非難言之前日天子恨愧陵廟爲羯逆傷汗憤悵上皇南幸巴蜀隱悼宗戚見誅側身勤勞不憚親撫士卒與人權位信而不疑渴聞忠直過弗諱改此以弱制彊以危取安之絲也今天子重城深宮燕和而居凝冕大昕纓佩而朝太官具味視時而獻太常備樂和聲以薦國機軍務參籌乃敢進百姓疾苦時有不聞廐芻良馬宮籍美女與服禮物休符瑞謀日月充備朝廷歌頌盛德大業聽而不厭四方貢賦爭上尤異諧臣願官怡愉天顏文武大臣至於庶官皆權賞踰望此所以不能以彊制弱以未安忘危若陛下視今日之安能如靈武時何寇盜疆弱可言哉其二曰議者曰吾聞士人共自謀昔我奉天子拒凶逆勝則國家兩全不勝則兩亡故生死決於戰是非極於諫今吾名位重財貨足爵賞厚勤勞已極外無仇讎害我內無窮賤迫我何苦當鋒刃以近死忤人主以近禍乎又聞曰吾州里有病父老母孤兄寡婦皆力役乞丐凍餒不足況於死者人誰哀之又聞曰天下殘破蒼生危窘受賦與役者皆寡弱貧獨流亡死徙悲憂道路蓋亦極矣天下安我等豈無賦歛自處若不安我不復以忠義仁信方直死矣人且如此奈何對曰國家非欲其然蓋失於太明太信耳夫太明則見其內情將藏內情則罔惑生不能令必信信可必矣而太信之中至姦尤惡之如此遂使

朝廷亡公直天下失忠信蒼生益寃結將欲治之能無端由吾等議於野又何所及其三曰議者曰陛下思安蒼生滅姦逆圖太平勞心悉精於今四年說者異之何哉對曰如天子所思說者所異非不知之凡有詔令丁寔事皆不行空言一再頗類諧戲今有仁卹之令憂勤之誥人皆族立黨語指而議之天子不知其然以爲言雖不行猶足以勸彼沮勸在乎明審均當而必行也天子能行已言之令必將來之法雜徭幣制拘忌煩令一切蠲蕩任天下賢士屏斥小人然後推仁信威令謹行不惑此帝王常道何爲不及帝悅曰卿能破朕憂擢右金吾兵曹參軍攝監察御史爲山南西道節度參謀募義士於唐鄧汝蔡降虜賊五千瘞戰死露骨於泌南名曰哀丘史思明亂帝將親征結建言賊銳不可與爭宜折以謀帝善之因命發宛葉軍挫賊南鋒結屯泌陽守險全十五城以討賊功遷監察御史裏行荆南節度使呂諲請益兵拒賊帝進結水部員外郎佐諲府又參山南東道來瑱府時有父母隨子在軍者結說瑒曰孝而仁者可與言忠信而勇者可以全義渠有責其忠信義勇而不勸之孝慈邪將士父母宜給以衣食則義有所存矣瑒納之瑒誅結攝領府事會代宗立固辭丐侍親歸樊上授著作郎益著書作自釋曰河南元氏望也結元子名也次山結字也世業載國史世系在家諫少居商餘山著元子十篇故以元子爲稱天下兵興逃亂入猗玗洞始稱猗玗子後家漢濱乃自稱浪士及有官人以爲浪者亦漫爲官乎呼爲漫郎既客樊

上漫遂顯樊左右皆漁者少長相戲更曰聲叟彼謂以聲者爲其不相從聽不相鉤加帶答簪而盡船獨
聲斷而揮車酒徒得此又曰公之漫其猶聲乎公守著作不帶答簪乎又漫浪於人間得非聲斷乎公漫
久矣可以漫爲叟於戲吾不從聽於時俗不鉤加於當世誰是聲者吾欲從之彼聲叟不慙帶乎答簪吾
又安能薄乎著作彼聲叟不羞聲斷於鄰里吾又安能慙漫浪於人間取而醉人議當以漫叟爲稱直荒
浪其情性誕漫其所爲使人知無所存有無所將待乃爲語曰能帶答簪全獨而保生能學聲斷保宗而
全家聲也如此漫乎非邪久之拜道州刺史初西原蠻掠居人數萬去遺戶裁四千諸使調發符牒二百
函結以人困甚不忍加賦卽上言臣州爲賊焚破糧儲屋宅男女牛馬幾盡今百姓十不一在羣孺騷離
未有所安嶺南諸州寇盜不盡得守捉候望四十餘屯一有不靖湖南且亂請免百姓所負租稅及租庸
使和市雜物十三萬緡帝許之明年租庸使索上供十萬緡結又奏歲正租庸外所率宜以時增減詔可
祿爲民營舍給田免徭役流亡歸者萬餘進授容管經略使身諭蠻豪綏定八州會母喪人皆詣節度
請留加左金吾衛將軍民樂其教至立石頌德罷還京師卒年五十贈禮部侍郎

李承趙州高邑人幼孤其兄暉養之既長以悌聞擢明經遷累大理評事爲河南採訪使判官尹子奇陷
汴州拘承送洛陽覘得賊謀皆密啟諸朝兩京平例貶臨川尉不三月除德清令尋擢監察御史累遷東

部郎中淮南西道黜陟使奏置常豐堰於楚州以禦海潮溉屯田墾鹵收常十倍它歲德宗將討梁崇義
李希烈揣知之乃表崇義遇惡請先誅討帝悅數對左右稱其忠會承使回言希烈能立功然恐後不可
制帝初謂不然及崇義平希烈果叛始思其言擢拜河中尹晉絳觀察使承廉正有雅望以才顯於時未
幾改山南東道節度使時希烈猶據襄州帝慮不受命欲以禁兵衛送承承辭請以單騎入既至希烈會
承外館迫脅日萬端承晏然誓以死守希烈不能屈遂大掠去襄漢蕩然承輯綏撫安之居二年閩境完
復初希烈雖去留部校守覘往來踵會承因得任所厚臧叔雅結希烈腹心周曾王玢姚愔及曾等謀殺
希烈承首謀也密詔褒美尋檢校工部尚書湖南觀察使建中四年卒年六十二贈吏部尚書

韋倫系本京兆父光乘在開元天寶間爲朔方節度使倫以蔭調藍田尉幹力勤濟楊國忠署爲鑄錢內
作使判官國忠多發州縣齊人令鼓鑄督非所習雖筆扶苛嚴愈無功倫請準直募匠代無聊之人繇是
役用減鼓鑄多矣玄宗晚節盛營宮室吏介以爲欺倫閱實工省費倍從帝入蜀以監察御史爲劍南
節度行軍司馬置頓判官時中人衛卒多侵暴尤難治倫以清儉自將西人賴濟中宦疾之以讒貶衡州
司戶參軍度支使第五琦薦倫才擢商州刺史荆襄道租庸使襄州裨將康楚元亂自稱東楚義王刺史
王政棄城遁賊南襲江陵絕漢沔道倫調兵屯鄧州厚撫降賊寇益怠乃擊禽楚元以獻收租庸二百

萬縉召爲衛尉卿俄兼靈隴二州刺史乾元中襄州亂詔倫爲山南東道節度使而李輔國方恣橫倫不肯謁憾之中罷爲秦州刺史吐蕃党項歲入邊倫兵寡數格虜敗貶巴州長史徙務川尉代宗立連拜忠台饒三州刺史宦者呂太一反嶺南詔拜倫韶州刺史韶連郴都團練使爲太一反間貶信州司馬斥棄十年客豫章德宗嗣位選使絕域者擢倫太常少卿充和吐蕃使倫至諭天子威德贊普順悅乃入獻還進太常卿兼御史大夫再使如旨倫處朝數論政得失宰相盧杞惡之改太子少保從狩奉天及杞敗關播罷爲刑部尚書倫在朝堂流涕曰宰相無狀使天子至此不失爲尚書後何勸聞者憚其公帝後欲復用杞爲刺史倫苦諫言懇至到帝納之進太子少師鄂國公致仕時李楚琳以僕射兼衛尉卿李忠誠以尚書兼少府監倫言楚琳逆節忠誠戎醜不當寵以官又請爲義倉以捍無年擇賢者任帝左右謂吐蕃豺虎野心不可事信約宜謹備邊帝善其言厚禮之居家以孝慈稱卒年八十三贈揚州都督諡曰肅薛珏字溫如河中寶鼎人以蔭爲懿德太子廟令累遷乾陵臺令歲中以清白聞課第一改昭應令人請立石紀德珏固讓遷楚州刺史初州有營田宰相遙領使而刺史得專達俸及宅給百餘萬田官數百歲以優得遷別戶三千備刺史廩役珏至悉條去之租入贏異時觀察使惡其潔誣以罪左授峽州刺史建中初德宗命使者分諸道察官吏升黜焉而李承狀珏之簡趙贊言其廉盧翰稱其肅書參聞於是拜中

散大夫賜金紫劉玄佐表兼汴宋行軍司馬李希烈棄汴州走卽拜珏刺史遷河南尹入爲司農卿是時詔舉堪刺史縣令者且百人延問人聞疾苦吏得失取尤通達者什二宰相欲校以文詞珏曰求良吏不可責文學宜以上愛人之本爲心也宰相多其計所用皆稱職爲京兆尹司農供三宮畜茹三十車不足請市京兆是時韋彤爲萬年令珏使彤禁鬻賣民苦之德宗怒奪珏彤俸帝疑下情不達因詔延英坐日許百司長官二員言闕失謂之巡對珏剛嚴曉法治勤身以勸下然苛察無經術大體坐善寶參改太子賓客出爲嶺南觀察使卒年七十四贈工部尚書子存慶字嗣德貌偉岸及進士第歷御史尚書郎五遷給事中與韋弘景封駁詔書時稱其直劉總以幽州歸穆宗謂宰相曰必用薛存慶可以宣朕意對延英一刻遣之至鎮州疽發於背卒贈吏部侍郎

崔漢衡博州博平人沈懿博厚善與人交始爲費令滑州節度使令狐彰表掌書記大厯六年以檢校禮部員外郎爲和蕃副使還遷右司郎中建中二年吐蕃請盟擢殿中少監爲和蕃使與其使區頰贊俱來約盟改鴻臚卿持節送區頰贊歸遂定盟清水德宗幸奉天吐蕃以兵佐渾瑊敗賊武功轉祕書監俄拜上都留守兵部尚書東都淄青魏博賑給宣慰使又使幽州還命稱指貞元三年豫吐蕃盟平涼被執虜將殺之因夷言謂之曰我善結贊無殺我而漢衡誠信素著虜亦尊重故至河州得還明年出爲晉慈隰

觀察使卒贈尚書左僕射

戴叔倫字幼公潤州金壇人師事蕭穎士爲門人冠劉晏管鹽鐵表主運湖南至雲安楊惠琳反馳客劫之曰歸我金幣可緩死叔倫曰身可殺財不可奪乃捨之嗣曹王臯領湖南江西表佐幕府臯討李希烈留叔倫領府事試守撫州刺史民歲爭漑灌爲作均水法俗便利之耕餉歲廣獄無繫囚俄卽真期年詔書褒美封譙縣男加金紫服齊映劉滋執政叔倫勸以屯難未靖安之者莫先於兵兵所藉者食故金穀之司不輕易人天下州縣有上中下緊望雄輔者有司銓擬皆便所私此非爲官擇人爲人求治之術其尤切者縣令錄事參軍事此二者宜出中書門下無計資序限遠近高卑一以殿最升降則人知勸映等重其言遷容管經略使綏徠夷落威名流聞其治清明仁恕多方略故所至稱最德宗嘗賦中和節詩遣使者寵賜代還卒于道年五十八

王翊字宏肱并州晉陽人少治兵家天寶中授翊衛尉羽林軍宿衛擢才兼文武科出爲辰州刺史與討襄州康楚元有功加兼祕書少監遷郢州刺史大曆中擢容管經略使初安祿山亂詔嶺南兵隸南陽魯炁炁敗績衆奔潰谿洞夷獠相挺爲亂夷酋梁崇率號平南都統與別帥覃問合又與西原賊張侯夏承更誘嘯因陷城邑遂據容州前經略使陳仁琇元結長孫全緒等皆僑治藤梧翊至言於衆曰我容州刺

史安可客治宅所必得容乃止卽出私財募士有功者許署吏於是人自奮不數月斬賊帥歐陽珪因至廣州請節度使李勉出兵併力勉不許曰容陷賊久徼方疆今速攻祇自敗耳翊曰大夫卽不出師願下書州縣陽言以兵爲助冀藉此聲成萬一功勉許諾翊乃移書義藤二州刺史約皆進討引兵三千與賊鏖戰日數遇勉檄止之輒匿不發戰愈力卒破賊禽崇率悉復容州故地捷書聞詔更置順州以定餘亂翊凡百餘戰禽首領七十覃問遁去復遣將李寔等分討西原平鬱林等諸州累兼御史中丞招討處置使會哥舒晃反翊命寔悉師援廣州問因合衆乘間來襲翊設伏擊之生禽問嶺表平代宗遣使慰勞加金紫光祿大夫賜第京師時吐蕃入寇郭子儀悉河中兵乘邊召翊爲河中少尹領節度後務悍將凌正數千法不違約其徒夜斬關逐翊翊覺之陰亂漏刻以差其期衆驚不敢發俄禽正誅之一軍惕息歷汾州刺史爲振武軍使綏銀等州留後入拜京兆尹會起涇原兵討李希烈次澧水京兆主供擬饗敗肉腐衆怒曰食是而討賊乎遂叛翊挺身走奉天拜太子詹事德宗還都再遷大理卿出爲福建觀察使徙東都留守旣至開田二十餘屯修器械皆良金壽革練士卒號令精明俄而吳少誠叛獨東畿爲有備關東賴之貞元十八年卒贈尚書右僕射諡曰肅翊雅善盧杞杞之殺崔靈沮李懷光不得朝皆與其謀議者以爲翬子正雅字光謙行謹飭爲崔邠所器元和初擢進士遷累監察御史穆宗時京邑多盜賊正雅以

萬年令威震豪彊尹柳公綽言其能就賜緋魚累擢汝州刺史屬監軍怙權乃謝病去入爲大理卿會爭宋申錫獄堅甚申錫得不死太和申卒贈左散騎常侍翊兄翊性謙柔歷山南東道節度使代宗目爲純臣世稱謹廉卒贈戶部尚書諡曰忠惠

翊曾孫凝字成庶少孤依其舅宰相鄭肅舉明經進士皆中歷臺省寔入知名擢累禮部侍郎不阿權近出爲商州刺史驛道所出吏破產不能給而州有治賦羨銀常摧直以優吏奉凝不取則以市馬故無橫擾人皆慰悅徙湖南觀察使僖宗立召爲兵部侍郎領鹽鐵轉運使坐舉非其人以祕書監分司東都卽拜河南尹遷宣歙池觀察使時乾符四年也王仙芝之黨屠至德勢益張凝遣牙將孟琢助池守賊益兵來攻實欲襲南陵凝遣樊儒以舟師扼青陽儒違令輕與賊戰不勝凝斬以徇諸將聞皆股慄以死綴賊賊不能進時江南環境爲盜區凝以彊弩拒采石張疑幟遣別將馬穎解和州之圍明年賊大至都將王涓自承陽赴敵凝大宴謂涓曰賊席勝而驕可持重待之慎毋戰涓意銳日趨四舍至南陵未食卽陣死焉監軍收餘卒數千還走城沮撓無去意卒又恣橫不能禁凝讓曰吏捕蝗者不勝而仰食於民則率暴以濟災也今兵不能捍敵又恣之犯民生業何以稱朝廷待將軍意監軍詞屈趣親吏入民舍奪馬凝乘門望見磨左右捕取殺之由是不敢留然益儲畜繕完以備賊賊至不能加會大星直寢庭墜術家言宜

上疾不視事以馱勝凝曰東南國用所出而宜爲大府吾規脫禍可矣顧一方何賴哉誓與城相存亡勿復言旣而賊去未幾卒年五十八贈吏部尚書諡曰貞

徐申字維降京兆人擢進士第累遷洪州長史嗣曹王暉討李希烈檄申以長史行刺史事任職辦舉表其能遷韶州刺史韶自兵興四十年刺史以縣爲治署而令丞雜處民間申按公田之廢者募人假牛犂墾發以所收半畀之田久不治故肥美歲入凡三萬斛諸工計所庸受粟有差乃徙治故州未幾邑闕如初創驛候作大市器用皆具州民詣觀察使其有功於人請爲生祠申固讓觀察使以狀聞遷合州刺史始來韶戶止七千比六年倍而半之會初置景州授刺史賜錢五十萬加節度副使遷管經略使黃洞納質供賦不敢桀踰年進嶺南節度使前使死吏盜印署府職百餘員畏事泄謀作亂申覺殺之誅誤一不問遠俗以攻劫相矜申禁切無復犯外蕃歲以珠璣瑁香文犀浮海至申於常貢外未嘗贖索商賈饒盈劉闢反表請發卒五千循馬援故道鑿巖巒抵蜀擣關不備詔可加檢校禮部尚書封東海郡公詔未至卒年七十贈太子少保諡曰平

鄒士美字和夫兗州金鄉人父純字高卿舉進士拔萃制策皆高第張九齡李邕數稱之自拾遺七遷至中書舍人處事不回爲宰相元載所忌時魚朝恩以牙將李琮署兩街功德使琮恃勢桀橫衆辱京兆尹

崔昭于禁中純曰此國恥也卽詣載請速處其罪載不納遂辭疾還東都號伊川田父十年不出德宗立崔祐甫輔政召爲太子左庶子集賢殿學士不拜以老乞身改詹事聽致仕帝召見褒歎良久賜金紫公卿以下咸祖都門世高其節士美年十二通五經史記漢書皆能成誦父友蕭穎士顏真卿柳芳與相論釋嘗曰吾曹異日當交二郗之間矣未冠爲陽翟丞佐李抱真潞州幕府以才歷王虔休李元皆留不徙久乃進房州刺史黔中經略觀察使溪州賊向子琪以衆八千阻山剽劫士美討平之加檢校右散騎常侍封高平郡公遷京兆尹天子多所咨逮出爲鄂岳觀察使時安黃節度使伊慎入朝其子宥主後務偃蹇母死京師不發喪欲固其權士美知之使府屬過其境宥出迎因以母訃告之卽爲辦裝宥惶遽上道改河南尹檢校工部尚書充昭義節度使昭義自李抱真以來皆武臣私廚月費米六千石羊千首酒數十斛潞人困甚士美至悉去之出粟錢市物自給又盧從史時日具三百人膳以餉牙兵士美曰卒衛於牙固職也安得廣費爲私恩亦罷之討王承宗也遣大將王獻督萬人爲前鋒獻恣橫逗撓士美卽斬以徇下令曰敢後者斬親鼓之大破賊下三營環柏鄉時諸鎮兵合十餘萬繞賊多玩寇犯法獨士美兵銳整最先有功憲宗喜曰固知士美能辦吾事承宗大震懼亡幾會詔班師然威震兩河以疾召拜工部尚書後檢校刑部尚書爲忠武節度使卒年六十四贈尚書左僕射諡曰景生平與人交已然諾以是名重

於世

辛祕系出隴西貞元中擢明經第授華原主簿以判入等調長安尉其學於禮家尤洽高郢爲太常卿奏爲博士再遷兵部員外郎常兼博士再辟禮儀使府憲宗初拜湖州刺史李錡反遣大將先取支州蘇常杭睦四刺史或戰敗或拘脅獨祕以儒者賊易之未及至祕召牙將巨知二夜開城收壯士得數百逆賊大戰斬其將進焚營保錡平賜金紫僉謂祕材任將帥會河東范希朝出討王承宗召祕爲希朝司馬主留務累遷汝常州刺史河南尹進拜昭義軍節度使是時承討恆趙之後潞人彫耗祕至則約出入舊用度比四年儲錢十七萬緡糧七十萬斛器械堅良隱然復爲完鎮召還道病卒年六十四贈尚書左僕射諡曰肅後更諡祕爲大官居不易第服不改初其奉祿悉與妻表親屬病自銘其墓作書一通臧之卒後發視則送終制也儉而不違於禮云

唐書卷一百四十三

唐書卷一百四十三考證

李承傳居二年闔境完復○舊書承治之二年頗得完復

王翊傳翊兄翊性柔謙歷山南東道節度使○沈炳震曰本紀自至德至上元山南東道爲魯炁來瑱史
翊無王翊也此或屬副使

辛祕傳授華原主簿○舊書作華原尉

諡曰肅後更諡懿○舊書作諡曰昭

唐書卷一百四十四

宋 端 明 殿 學 士 宋 祁 撰

列傳第六十九

來田侯崔巖

來瑱邠州永壽人父曜奮行間開元末持節嶺西副大使四鎮節度使著名西邊終右領軍大將軍瑒略知書尚名節崖然有大志天寶初從四鎮任劇職累遷殿中侍御史伊西北廷行軍司馬詔舉智謀果決才堪統眾者拾遺張鎬薦瑒能斷大事有禦侮才擢穎川太守充招討使會母喪免以孝聞安祿山反張瑒薦之興塊次拜汝南太守未行改穎川賊攻穎川方積粟多瑒完埤自如手射賊皆應弦仆賊使降將畢思琛招之父故將也拜城下泣且弔瑒不應前後俘殺甚眾賊懼目為來嚼鐵以功就加防禦使河南淮南游弈逐要招討使徙山南東道節度使代魯冕會嗣號王巨表冕方固守乃還瑒故官賊圍南陽急瑒與魏仲犀合兵救之不勝人情恟懼瑒能撫訓士舉動安重賊不得侵改淮南西道節度兩京平封穎國公食二百戶乾元二年徙河西未行王師敗於相州詔拜陝虢節度兼潼關防禦團練鎮守使明年襄州部將張維瑾等殺其使史翽徙瑒山南東道襄鄧均房金商隨郢復十州節度使既至維瑾降上元二

年春破史思明餘黨於魯山俘賊渠又戰汝州獲馬牛橐駝凡兩戰斬首萬級明年詔瑱還瑱安襄漢士亦宜其政因諷眾留已而外行至鄧復詔歸鎮肅宗聞其謀惡之呂諲王仲昇等皆言瑱得士心不可以留乃改山南東道襄鄧唐復隨郢六州節度俄而仲昇與賊戰申州爲賊禽初仲昇被圍而江陵呂諲病瑱願望不卽救及師出仲昇已沒行軍司馬裴表其狀且言瑱善謀而勇恐後難制卽除之可一戰禽也帝頗謂然遂改瑱淮西申安蘄黃光沔兼河南陳豫許鄭汴曹宋潁泗十五州節度以寵之陰奪其權加裴襄鄧等七州防禦使代瑱懼釋言淮西無糧須麥收可上道又諷眾固留代宗立復授襄州節度奉義軍渭北兵馬使密詔裴圖之裴自均州率眾浮漢下會日入候者白瑱瑱與帳下謀其副薛南陽曰公奉詔留鎮而裴以兵脅代是無名也裴智勇非公敵而眾心不附彼若乘我不虞縱火夜攻誠可憂也若須明則破之必矣明日裴督軍五千陣穀水北瑱以兵迎之呼其軍告曰爾何事來曰公不受命故中丞伐罪瑱曰詔遣鎮此州乃以詔書示之皆曰僞也吾千里討賊豈空歸邪爭射之瑱走旗下薛南陽曰請公勒兵勿戰乃以三百騎爲奇兵旁萬山出其背夾擊之其眾幾盡裴脫身走至申口禽之送京師瑱因入朝謝罪帝待之無疑拜兵部尚書同中書門下平章事充山陵使是時程元振居中用事疾瑱乃告與巫祝言不順會王仲昇歸又言由瑱與賊合故陷賊帝積怒遂下詔削官爵貶播川尉員外置及

鄂賜死籍其家瑱之死門下客散去掩尸于坎校書郎殷亮獨後至哭尸側爲備棺衾以葬帝徐愔元振誣以它罪流溱州先是瑱行軍司馬龐充以兵二千戍河南至汝聞瑱死乃還襲襄州別將李昭德之走房陵昭與薛南陽梁崇義不相臣崇義殺昭帝以崇義爲節度使代瑱既而爲瑱立祠四時致饗避瑩廳事不處哀祈禮葬詔可廣德元年追復官爵裴表者始以蔭爲京兆司錄參軍瑩鎮陝州引爲判官移襄州又爲行軍司馬遇之厚及瑩私漢上表欲得其處故背瑩言狀帝倚以圖瑩而性輕褻少謀師興給用無節及敗有詔流費州至藍田賜死

田神功冀州南宮人天寶末爲縣史會天下兵興賊署爲平盧兵馬使率眾歸朝從李忠臣收滄德攻相州拒杏園後守陳留戰不勝與許叔冀降于史思明思明使與南德信劉從諫南略江淮神功襲德信斬之從諫脫身走乃并將其兵詔拜鴻臚卿襲敬釭鄆州不克劉展反鄧景山引神功助討自淄青濟淮眾不整入揚州遂大掠居人貲產發屋剔竈殺商胡波斯數千人俄而禽展送京師遷淄青節度使會侯希逸入青州更徙兗鄆時賊圍宋州急李光弼奏神功往救賊解去又破法子營復攻敬釭降之朝義聞乃奔下博進封信都郡王徙河南節度汴宋八州觀察使大曆二年來朝加檢校尚書右僕射詔宰相百官送至省又判左僕射知省事加太子太師還軍神功事母孝始嘗僞驕自如見光弼待官屬鈞禮乃折節

謙損既寢疾宋之將吏爲禱祈報恩八年自力入朝卒代宗爲撤樂贈司徒詔其弟曹州刺史神玉知汴州留事贈絹千匹布五百端百官弔喪賜屏風茵褥飯干桑門追福至德後節度使不兼宰相者惟神功恩禮最篤神玉終汴宋節度留後

侯希逸營州人長七尺豐下銳上天寶末爲州裨將守保定城安祿山反使中人韓朝敷傳命希逸斬以御祿山又以親將徐歸道爲節度使希逸率兵與安東都護王玄志斬之遣使上聞詔拜玄志平盧節度使玄志卒副將李正己殺其子共推希逸有詔就拜節度使兼御史大夫與賊確數有功然孤軍無援又爲奚侵掠乃拔其軍二萬浮海入青州據之平盧遂陷肅宗因以希逸爲平盧淄青節度使自是淄青常以平盧冠使寶應初與諸軍討平史朝義加檢校工部尙書陽寶戶圖形凌烟閣希逸始得青治軍務農有狀後稍怠肆好畋獵俛佛興廣祠廬人苦之夜與巫家野次李正己因衆怨閉關不內遂奔滑州召還檢校尙書右僕射知省事大厯末進封淮陽郡王建中二年遷司空未及拜卒年六十二遺敕其子上還前後寶封贈太保

崔靈本貝州安平人後徙衛州世儒家而獨喜縱橫事因落魄客劍南以步卒事鮮于仲通又從李宓討雲南無功遷成都行軍司馬崔論悅之薦爲牙將歷事崔圓裴冕冕被謗朝廷疑之遣使者問狀靈部兵

贊耳白其寃使者以聞靈亦還京師留爲折衝郎將寶應初蜀亂山賊乘險道不通嚴武白靈爲利州刺史既至賊遁去由是知名及武爲劍南節度使過州心欲與俱西而利非所屬使靈自爲計靈曰節度使張獻誠見疑難輒去然獻誠嗜利若厚賂之靈可以從大夫矣武然之以奇錦珍貝遺獻誠且求靈獻誠果喜令自移疾去武遂奏爲漢州刺史吐蕃引雜羌寇西山破柘靜等州有詔收復於是武遣靈將而西既薄賊城皆累石不得攻惟東南不合者丈許諜知之乃爲地道再宿而拔拓地數百里虜衆驚相謂曰靈神兵也及還武大悅裝七寶舉迎入成都以夸于軍永泰元年武卒行軍司馬杜濟別將郭英幹郭嘉琳皆請英幹之兄英父爲節度使靈與其軍亦丐大將王崇俊奏俱至而朝廷既用英父矣英父恨之始署事卽誣殺崇俊又遣使召靈靈恐託拒吐蕃不敢還英父怒因出兵聲言助靈實欲襲取之卽徙靈家於成都而淫其妾媵靈懼益負阻英父乃自將討之會天大雪馬多凍死士心離遂敗歸靈聞英父損裁將卒稟賜下皆恨怒又毀玄宗冶金像乃令軍中曰英父反輒居先帝舊宮乃進薄成都英父陣城西使柏茂琳爲前軍英幹爲左軍嘉琳爲後軍與靈戰茂琳等敗軍多降靈卽署降將使率兵還攻英父不勝走靈池爲韓澄所殺於是劍南大擾楊子琳起瀘州與邛州柏貞節連和討靈明年代宗詔宰相杜鴻漸爲山西劍南邛南等道副元帥劍南西川節度使往平其亂鴻漸出駱谷或進計曰公不如駐關中

數騰書陳英父罪嘉靈方略因以靈所署刺史卽授之使不疑而後與東川張獻誠及諸帥合兵擾靈不
一年靈勢且窮必束身歸命鴻漸疑未決會靈遣使至獻繒錦數萬辭卑約甚鴻漸貪其利遂入成都政
事一委靈日與僚屬杜亞楊炎縱酒高會乃表貞節爲邛州刺史子琳爲瀘州刺史以和解之又數薦靈
於朝先是靈與張獻誠戰奪其旌節不肯與故朝廷因授靈成都尹山西防禦使西川節度行軍司馬鴻
漸旣還朝遂爲節度使大曆三年來朝靈本名旣至是賜名楊子琳襲取成都帝乃還靈於蜀未幾子琳
敗靈見蜀地險饒於財而朝廷不甚有紀乃痛誅斂使弟寬居京師以賂厚謝權貴深結元載父子故寬
驟擢御史中丞寬兄審至給事中靈在蜀久兵寢疆而肆侈窮欲將吏妻妾多爲汙逼朝廷隱忍不能詰
累加尙書左僕射十四年入朝進檢校司空同中書門下平章事兼山陵使俄以平章事爲御史大夫卽
建白擇御史當出大夫不宜謀及宰相因奏李衡于結等任御史宰相楊炎怒寢不行炎方誅劉晏靈申
救於帝又素事元載而炎亦出載門故衡之未忍發是歲十月南蠻與吐蕃合兵入文川方維邛邛覆沒
州縣民逃匿山谷中靈方在朝軍無帥德宗促靈還鎮炎業與有嫌恐已入蜀不可制卽說帝曰蜀天下
之輿壤自靈擅制朝廷失外府十四年矣今靈雖來以全師守蜀賦稅入天子者與無地同靈本與諸將
等夷獨因叛亂得位不敢自有以恩柔煦育故威令不行今雖歸之必無功是徒遣也若其有功誼不容

奪則西蜀之輿敗固失之勝亦非國家所有惟陛下孰察帝曰卿策云何炎曰請無歸靈今朱泚所部范
陽勁卒戍近甸趨與禁兵雜往舉無不克因是役得以親兵內其腹中則蜀將破膽不敢動然後換授他
帥以收其權得千里肥饒之地是謂因小禍受大福也帝曰善遂罷靈西川節度改兼京畿觀察使靈州
大都督單于鎮北大都護朔方節度鄜坊丹延州都團練觀察等使託言重臣綏靜北陲而每道置留後
使得自奏事杜希全靈州王翊振武李建徽鄜州及戴休顏杜從政呂希倩皆炎署置使伺靈過失靈至
夏州與希倩招党項降者甚衆炎惡之卽奏希倩無綏邊才而以神武將軍時常春代之更拜靈尙書右
僕射知省事司空如故朱泚亂帝出居奉天靈後數日至帝喜甚靈謂所親曰上聰明從善如轉規但爲
盧杞所惑至此爾因潛然涕下杞聞之思有以構靈於帝會王翊難時與靈俱出延平門而西靈數下
馬趨廁輒迂久翊懼賊追卽呼曰旣至此而欲顧望乎杞微聞卽諷翊以聞會泚行反間而除柳渾爲宰
相署靈中書令時朔方掌書記康湛爲蓋屋尉翊逼湛詐作靈遺泚書獻之杞遂奏靈初無效順心向關
與賊盟署中書令今果後至復得所與賊書反狀明甚若兇渠外逼姦臣內謀則大事去矣因俯伏獻
曰臣備位宰相危不能持顛不能扶罪當死帝命左右扶起之乃召靈至朝堂云使宣慰江淮俄而中人
引靈幕後使二力士縊殺之年六十一初命陸贄草制贄索靈與泚書將坐其事杞復云書已亡靈死籍

其家中外寃之帝乃赦寃親屬而歸其資云貞元十二年寃故將夏綬銀節度使韓潭請以所加禮部尙書雪寃罪有詔聽其家收葬始寃入朝留其弟寬守成都楊子琳乘間起瀘州以精騎數千襲據其城寬戰力屈寃妾任素驍果卽出家財十萬募勇士得千人設部隊自將以進子琳大懼會糧盡且大雨引舟至廷乘而去子琳者本瀘南賊帥旣降詔隸劍南節度屯瀘州杜鴻漸表爲刺史旣敗收餘兵沿江而下諸刺史震懼備餽牢以饗士過黃草峽守捉使王守仙伏兵五百子琳前驅至悉禽之遂入夔州殺別駕張忠城守以請罪朝廷以其本謀近忠故授峽州刺史移澧州鎮遏使後歸朝賜名猷寃季弟密密子繪俱以文辭稱繪四子盞黯確顏皆擢進士第盞字越卿開成中爲戶部侍郎白罷忌日百官行香有詔寃可歷平盧天平軍節度使終尙書左丞子蕘字野夫乾符中爲吏部侍郎美文辭談辯華給以銓管非所長出爲陝虢觀察使是時王仙芝亂漢上河南羣盜興蕘簡悅不曉事但以器韻自高委政賦豎不恤人疾苦或訴旱者指廷樹示之曰柯葉尙爾何旱爲卽榜管之上下離心俄爲軍吏所執髡其髮鬻再拜祈免乃得去渴甚求飲於民民飲以溺坐失守貶端州司馬終左散騎常侍黯字直卿開初成爲監察御史奏郊廟祭事不虔文宗語宰相曰宗廟之禮朕當親之但千乘萬騎國用不給故使有司侍祠然是日朕正衣冠坐以俟旦今聞主者不虔祭器敝惡豈朕事神蠲潔意邪公宜敕有司道朕斯意黯乃具條以

聞擢員外郎累遷諫議大夫確顏位皆郎中

嚴礪字元明震從祖弟也少爲浮屠法太守見之偉其材表爲玄武尉震在山南署牙將德宗之幸主饋礪有功然輕躁多姦謀以便佞自將累爲興州刺史震卒以礪權主留府事遺言薦之卽拜本道節度使詔下諫議大夫給事中補闕拾遺合議皆以爲礪資淺士望輕不宜授節制帝不從礪在位貪沓苟得士民不勝其苦素惡鳳州刺史馬勛卽誣奏貶賀州司戶參軍劉闢反以儲備有素檢校尙書左僕射節度東川擅沒吏民田宅百餘所稅外加斂錢及芻粟數十萬元和四年卒贈司空後監察御史元稹奉使東川劾發其贓請加惡諡朝廷以其死故但追田宅奴婢還其主稅外所斂悉蠲除云

宋 端 明 殿 學 士 宋 祁 撰

列傳第七十

元王黎楊巖寶

元載字公輔鳳翔岐山人父昇本景氏曹王明妃元氏賜田在扶風昇主其租入有勞請於妃冒為元氏載少孤既長嗜學工屬文天寶初下詔舉明莊老列文四子學者載策入高第補新平尉韋鑑監選黔中苗晉卿東都留守皆署判官寢以名聞至德初江東採訪使李希言表載自副擢祠部員外郎洪州刺史入為度支郎中占奏敏給肅宗異之累遷戶部侍郎充度支江淮轉運等使帝不豫李輔國用事輔國妻載宗女也因相締昵會京兆尹缺輔國自用載載意屬國柄固辭輔國曉之翌日拜同中書門下平章事領使如故代宗立輔國勢愈重數稱其才進拜中書侍郎許昌縣子載以度支繁浩有吏事督責損威寵乃悉天下錢穀委劉晏未幾判天下元帥行軍司馬盜殺李輔國載陰與其謀乃復結中人董秀厚啖以金使刺取密旨帝有所屬必先知之探微揣端無不諧契故帝任不疑華原令顧繇上封白發其私帝方倚以當國乃斥繇除名為民魚朝恩驕橫震天下與載不叶憚之雖帝亦銜恚乃乘間奏誅朝恩帝畏有

變載結其愛將爲助朝恩已誅載得意甚益矜肆時擬奏文武官功狀多謬舛載虞有司駁正乃請別敕授六品以下官吏部兵部卽附甲團奏不須檢勘欲示權出於己又與王縉請以河中爲中都袁闕輔河東十州稅奉京師選兵五萬屯中都鎮禦四方秒秋行幸上春還可以避羌戎患載以議入卽從前敕所由更於河中經國宮殿築私第帝聞惡之置其議初四鎮北庭行營節度使寄治涇州大厯八年吐蕃寇邠靈議者謂三輔以西無襟帶之固而涇州散地不足守載嘗在西州具知河西隴右要領乃言於帝曰國家西境極于潘原吐蕃防戍乃在摧沙堡而原州界其間草薦水甘舊壘存焉比吐蕃毀夷垣墉棄不居其右則監牧故地巨塹長壕重復深固原州雖早霜不可蒞而平涼在其東獨耕一縣可以足食請徙京西軍戍原州乘間築作二旬可訖貯粟一歲戎人夏牧青海上羽書比至則我功集矣從子儀大軍在涇以爲根本分兵守石門木峽隴山之關北抵于河皆連山峻險寇不可越稍置鳴沙縣豐安軍爲之羽翼北帶靈武五城爲之形勢然後舉隴右之地以至安西是謂斷西戎脛朝廷高枕矣因圖上地形使更間入原州度水泉計徒庸車乘畚鍤之器悉具而田神功沮短其議乃曰興師料敵老將所難陛下信一書生言舉國從之誤矣帝由是疑不決載智略開果久得君以爲文武才略莫己若外委主書卓英倩李待榮內劫婦言縱諸子關通貨賄京師要司及方面皆擄遣忠良進貪猥凡仕進于請不結子弟則請主

書城中開南北二第室宇奢廣當時爲冠近郊作觀榭帳帟器不徙而供膏腴別墅矜矜相望且數十區名妹異伎雖禁中不逮帝盡得其狀載嘗獨見帝深戒之警然不悛客有賦都盧尋橦篇諷其危載泣下而不知悟會李少良上書誡其醜狀載怒奏殺少良道路目語不敢復議載由是非黨與不復接生平道義交皆謝絕帝積怒大厯十二年三月庚辰仗下帝御延英殿遣左金吾大將軍吳濟收載及王縉繫政事堂分捕親吏諸子下獄詔吏部尙書劉晏御史大夫李涵散騎常侍蕭昕兵部侍郎袁儉禮部侍郎常袞諫議大夫杜亞訊狀而責辨端目皆出禁中遣中使臨詣陰事皆服乃下詔賜載自盡妻王及子揚州兵曹參軍伯和祠部員外郎仲武校書郎季能並賜死發其祖父冢斲棺棄尸毀私廟主及大監安仁里二第以賜百官署舍破東都第助治禁苑王氏河西節度使忠嗣女悍驕戾香載叵禁而諸子牟賊聚斂無涯藝藝浮者奔走爭蓄妓妾爲倡優戲親族環觀不愧也及死行路無嗟隱者籍其家鍾乳五百兩詔分賜中書門下臺省官胡椒至八百石它物稱是女真一少爲尼沒入掖庭德宗時始告以載死號踊投地左右呵止帝曰安有聞親喪責其哀殞乎命扶出帝爲太子也實用載議興元元年詔復其官聽改葬故吏許初楊皎紀愔等合贊以葬諡曰荒後改曰成縱載敗董秀卓英倩李待榮術者李季連悉論死其它與載厚善坐貶者若楊炎王昂宋晦韓洞王定包佶徐績裴冀王紀韓會等凡數十人英倩弟

英璘家金州人緣以授官者亦百餘豪制鄉曲聚無賴少年以伺變恃載權牧宰莫敢問載誅英璘盜庫兵據險以叛詔發禁兵及山南西道兵二千討捕刺史孫道平禽殺之詔給復其州三年李少良者以吏治由諸帥府遷累殿中侍御史罷遊京師不見調憤載不法疏論其惡帝留少良客省欲究其事其友韋頌者候之漏言於陸珽載召珽問知之乃奏下少良御史臺劾其漏禁中語并與頌珽論殺之珽善經子與頌及少良善又狎載子弟親黨故載廉得其謀初載盛時人皆疾厭之大厯八年有晉州男子郇謨以麻總髮持竹筥葦席行哭長安市人問子曰我有字三十欲以獻上字言一事卽不中以筥貯屍席裹而棄之京兆以聞帝召見賜以衣館內客省問狀多譏切載其言國者願罷諸州團練使其言監者請罷諸道監軍大抵類此先是天下兵興凡要州權署團練刺史載用事授刺史者悉帶團練以悅人心故謨指而刺云

王縉字夏卿本太原祁人後客河中少好學與兄維俱以名聞舉草澤文辭清麗科上第歷侍御史武部員外郎祿山亂擢太原少尹佐李光弼以功加憲部侍郎遷兵部史朝諒平詔宣慰河北使還有指俄拜黃門侍郎同中書門下平章事進侍中持節都統河南淮南山東道諸節度行營事辭侍中加東都留守歲餘拜河南副元帥損軍資錢四十萬縉營完宮室朱希彩殺李懷仙也詔拜盧龍節度使至幽州委

軍於希彩乃還會辛雲京卒兼領河東節度讓還河南副元帥東都留守太原將王無縱張奉璋恃功以縉儒者易之不如律令縉斬以徇諸將股慄再歲還以本官復知政事時元載專朝天子拱手縉曲意附離無敢忤又恃才多所狎侮雖載亦疾其凌斬也京兆尹黎幹數論執載惡之縉折幹曰尹南方孤生安曉朝廷事縉素奉佛不茹葷食肉晚節尤謹妻死以道政里第爲佛祠諸道節度觀察使來朝必邀至其所諷令出財佐營作初代宗喜祠祀而未重浮屠法每從容問所以然縉與元載盛陳福業報應帝意向之繇是禁中祀佛諷唄齋薰號內道場引內沙門日百餘饌供珍滋出入乘廐馬度支具稟給或夷狄入寇必合衆沙門誦護國仁王經爲禳馱幸其去則橫加錫與不知紀極胡人官至卿監封國公者著籍禁省勢傾公王羣居賴寵更相凌奪凡京畿上田美產多歸浮屠雖藏紆宿亂踵相逮而帝終不悟詔天下官司不得箠辱僧尼初五臺山祠鑄銅爲瓦金塗之費億萬計縉給中書符遣浮屠數十輩行州縣斂丐貲貨縉爲上言國家慶祚靈長福報所馮雖時多難無足道者祿山思明毒亂方熾而皆有子禍僕固懷恩臨亂而陪西戎內寇未及擊輒去非人事也故帝信愈篤七月望日宮中造盂蘭盆綴飾鏤珮設高祖以下七聖位幡節衣冠皆具各以帝號識其幡自禁內分詣道佛祠鑄吹鼓舞奔走相屬是日立仗百官班光順門奉迎導從歲以爲常羣臣承風皆言生死報應故人事置而不修大厯政刑日以墮陵由縉與

元載杜鴻漸倡之也性貪冒縱親戚尼姘招納財賄猥屑相稽若市賈然及敗劉晏等鞫其罪同載論死晏曰重刑再覆有國常典況大臣乎法有首從不容俱死於是以聞上憫其耄不加刑乃貶括州刺史久之遷太子賓客分司東都建中二年死年八十二

黎幹戎州人善星緯術得待詔翰林擢累諫議大夫封壽春公自負其辯沾沾喜議論初唐家郊祭天地以高祖神堯皇帝配寶應元年杜鴻漸爲太常卿禮儀使於是禮儀判官薛頊集賢校理歸崇敬等共建神堯獨受命之主非始封君不得冒太祖配天地景皇帝受封于唐卽商之契周之后稷請奉景皇帝配天地於禮宜甚幹非之乃上十詰十難傳經誼抵鄭玄以折頊崇敬等曰頊等引禘者至曰祭天於圓丘周人以遠祖配今宜以景皇帝爲始祖配昊天圓丘臣幹一詰國語稱有虞氏夏后氏並禘黃帝商禘舜周禘魯二詰商頊長發大禘也三詰周頊雍禘太祖也四詰祭法虞夏並禘黃帝商周俱禘魯五詰大傳不王不禘王者禘其祖之所自出以其祖配之六詰爾雅禘大祭也七詰家語凡四代帝王所郊皆以配天所謂禘五年大祭也八詰盧損以禘祭名禘禘也事取明禘故云九詰王肅言禘五年大祭十詰郭璞亦云此經傳先儒皆不言祭昊天於圓丘根證章章故臣謂禘止五年宗廟大祭了無疑晦其十難一曰周頊雍之序曰禘祭太祖也鄭玄說禘大祭也太祖謂文王也商頊長發大禘也玄曰大禘祭天也商周

兩頊同文異解索玄之意以禘加大因曰祭天臣謂春秋大事于太廟雖曰大得祭天乎虞夏商周禘黃帝與魯禮不王不禘皆不言大玄安得稱祭天乎長發所頊不及魯與感生帝故知不爲祭天侑魯明矣商周五帝大祭見於經者甚詳而禘主廟不主天今背孔子之訓言取玄之偏誼誣繆祀典不見其可二曰不王不禘王者禘其祖之所自出以其祖配之此言惟天子當禘如虞夏出黃帝商周出魯以近祖配之自出之祖無廟乃自外至自外至者同之天地得主而止又自出者在母亦然春秋傳陳則我周之自出詎可謂出太微五帝乎玄以一禘爲三誼在祭法則曰祭昊天於圓丘在春秋傳則郊以后稷配靈威仰在商頊曰祭天在周頊則禘曰大於四時祭而小於禘本末駁舛臆判自私不足以訓三曰商周之前禘所自出自漢魏以來曠千餘歲其禮不講蓋玄所說不當於經不質于聖先儒置之不用是爲棄言四曰今禮家行於世者皆本玄學臣請取玄之隙遺破頊等所建頊等曰景皇帝爲始祖以配天按王制天子七廟玄曰周禮也太祖與文武之祧合親廟四而七商氏六廟契與湯合二昭二穆而六據玄則夏不以釁顛頊昌意爲始祖是又與玄乖背自古未有以人臣爲始祖者唯商以契周以稷夫稷契皆天子元妃子簡狄吞玄鳥卵而生契契佐禹有大功舜封之商其詩曰天命玄鳥降而生商宅殷土芒芒后稷母曰姜嫄出野履巨跡而生稷稷勳稼穡堯舉爲農師舜封之郟號曰后稷其詩曰履帝武敏歆攸介攸止

卽有郅家室舜禹有天下契稷在焉傳曰功施於人則祀之以死勤事則祀之契爲司徒而人輯睦稷勤百穀而所祀皆在祀典及子孫而有天下故尊而祖之五曰旣用玄說小德配寡而后稷止配一帝不得全配五帝今以景帝配昊天於玄爲可爲不可乎六曰衆詣臣曰上帝一帝周官祀天旅上帝祀地旅四望旅衆也則上帝是五帝臣曰否旅有衆義出於爾雅又爲祭名亦曰陳也如前所詣旅上帝爲五帝則季氏旅於泰山可得爲四鎮邪七曰援玄之言則景帝親盡主應在祧反配天地禮不相值夫所謂始祖者經綸草昧功普體大以比元氣含覆廣大者也故曰萬物之始天也人之始祖也日之始至也掃地而祭則質器用陶匏則牲用犢則誠兆於南郊則就陽至尊至質不敢同於先祖也白虎通義曰祭天歲一者何事之不敢黷也故因歲之陽氣始達而祭之今一歲四祭黷莫大焉上帝五帝祀闕不舉愈孰甚爲黷與怠皆失也臣聞親有限祖有常聖人制禮不以情變唐家累聖歷祀百年非不知景帝爲始封當時通儒鉅工尊高祖以配天宗太宗以配上帝人神克歆爲日旣久乃今以神堯降侑含樞紐而太宗仍配上帝則樞紐上帝侑也以子先父非天地祖宗之意八曰景皇帝非造我區夏不得與夏之禹商之契周之稷漢高帝魏武帝晉宣帝唐神堯皇帝並功而陟配圖丘上與天匹曾謂圖丘不如林放乎九曰魏以武帝晉以宣帝爲始祖者夫操與懿皆人傑也擁天下疆土挾弱主制海內之命名雖爲臣勢實爲君

後世因之以成帝業尊而祖之不亦可乎十曰神堯拯隋室之亂振臂大呼濟人塗炭汎掃蕩羣凶無餘出入不數年而成王業漢祖之功不能加焉夏以禹漢以高帝我以神堯爲始祖訂夏法漢於義何嫌今頌崇敬革天對易祖廟事之大者不稽于古難以疑文僻說定之臣官以諫爲名不敢不盡愚議聞代宗不聽其言其後名儒大議而景帝配天卒著于禮俄遷京兆尹頗以治稱京師苦樵薪乏幹度開漕渠興南山谷口尾入于苑以便運載帝爲御安福門觀之幹密具舸船作倡優水嬉冀以媚帝久之渠不就俄改刑部侍郎魚朝恩敗坐交通出爲桂管觀察使大厯八年復召爲京兆尹時大旱幹造土龍自與巫覡對舞彌月不應又禱孔子廟帝笑曰臣之禱久矣使毀土龍帝減膳節用旣而霖雨十三年涇水擁隔請開鄭白支渠復秦漢故道以溉民田廢礮磓八十餘所幹性貪暴旣復用不暇念治專徇財色附會嬖近挾左道希主恩帝甚惑之德宗在東宮幹與宦者特進劉忠翼陰謀幾危宗嗣及卽位又詭道希進密乘車謁忠翼事覺除名長流旣行市人數百羣譟投礮從之俄賜死藍田驛忠翼本名清潭與左衛將軍董秀皆有寵於代宗當盛時爵賞在其口吻陪冒財賄貲產累皆巨萬至是積前罪并及誅

楊炎字公南鳳翔天興人曾祖大寶武德初爲龍門令劉武周攻之死于守贈全節侯祖哲以孝行稱父播舉進士退居求志玄宗召拜諫議大夫棄官歸養肅宗時卽家拜散騎常侍號玄靜先生炎美須眉峻

風高文藻雄蔚然豪爽尚氣河西節度使呂崇賁掌書詔神烏令李太簡嘗醉辱之炎令左右反接撈二百餘幾死崇賁愛其才不問李光弼表爲判官不應召拜起居舍人固辭父喪廬墓側號慕不廢聲有紫芝白雀之祥詔表其闔炎三世以孝行聞至門樹大闕古所未有終喪爲司勳員外郎遷中書舍人與常袞同時知制誥袞長於除書而炎善德音自開元後言制誥者稱常楊云宰相元載與炎同郡炎又元出也故擢炎吏部侍郎史館修撰載嘗國陰擇才可代己者引以自近初得禮部侍郎劉單會卒復取吏部侍郎薛邕坐事貶後得炎親重無比會載敗坐貶道州司馬德宗在東宮雅知其名又嘗得炎所爲李楷洛碑寘于壁日諷玩之及卽位崔祐甫薦炎可器任卽拜門下侍郎同中書門下平章事舊制天下財賦皆入左藏庫而太府四時以數聞尚書比部覆出納舉無干欺及第五琦爲度支鹽鐵使京師豪將求取無節琦不能禁乃悉租賦進大盈內庫天子以給取爲便故不復出自是天下公賦爲人君私藏有司不得計贏少而宦官以冗名持簿者三百人奉給其間根柢連給不可動及炎爲相言於帝曰財賦者邦國大本而生人之喉命天下治亂重輕繫焉先朝權制以中人領其職五尺宦豎操邦之柄豐儉盈虛雖大臣不得知則無以計天下利害陛下至德惟人是恤參計敝蠹莫與斯甚臣請出之以歸有司度宮中經費一歲幾何量數奉入不敢以闕如此然後可以議政惟陛下審察帝從之乃詔歲中裁取以入大

盈度支具數先聞初定令有租賦庸調法自開元承平久不爲版籍法度玩敝而丁口轉死田畝換易貧富升降悉非向時而戶部歲以空文上之又戍邊者蠲其租庸六歲免歸玄宗事夷狄戍者多死邊將諱不以聞故貫籍不除天寶中王鉷爲戶口使方務聚斂以其籍存而丁不在是隱課不出乃按舊籍除當免者積三十年責其租庸人苦無告故法遂大敝至德後天下起兵因以饑癘百役並作人戶凋耗版圖空虛軍國之用仰給於度支轉運使四方征鎮又自給於節度都團練使賦斂之司數四莫相統攝綱目大環朝廷不能覆諸使諸使不能覆諸州四方貢獻悉入內庫權臣巧吏因得旁緣公託進獻私爲賊盜者動萬萬計河南山東荆襄劍南重兵處皆厚自奉養王賦所入無幾科斂凡數百名廢者不削重者不去新舊仍積不知其涯百姓竭膏血鬻親愛旬輸月送無有休息吏因其苛蠶食于人富人多丁者以宦學釋老得免貧人無所入則丁存故課免於上而賦增於下是以天下殘瘁蕩爲浮人鄉居地著者百不四五炎疾其敝乃請爲兩稅法以一其制凡百役之費一錢之斂先度其數而賦於人量出制入戶無主客以見居爲簿人無丁中以貧富爲差不居處而行商者在所州縣稅三十之一度所取與居者均使無僥利居人之稅秋夏兩入之俗有不便者正之其租庸雜徭悉省而丁額不廢其田畝之稅率以大厯十四年墾田之數爲準而均收之夏稅盡六月秋稅盡十一月歲終以戶賦增失進退長吏而尚書度支總

焉帝善之使諭中外議者沮詰以爲租庸令行數百年不可輕改帝不聽天下果利之自是不土斷而地著賦不加斂而增入版籍不造而得其虛實吏不誠而姦無所取輕重之權始歸朝廷矣炎與嶺表以單議悟天子中外翕然屬望爲賢相居數月崔祐甫疾不能事喬琳免炎獨當國遂多變祐甫之政減薄護元陵功優人始不悅又請開豐州陵陽渠發畿縣民役作閭里騷然渠卒不就素德元載思有以報之於是復議城原州節度使段秀實謂安邊卻敵宜以緩計方農事不可遽興功炎怒追秀實爲司農卿以邠寧李懷光督作遣朱泚崔靈統兵各萬人翼之詔書下涇軍恚曰吾軍爲國西屏十餘年始勻邠土農桑地著之安徙此榛莽中手披足踐既亡城壘則又投之塞外且安實此乎又懷光持法嚴舉軍畏之神將劉文喜因人之怨乃上疏求秀實朱泚爲使詔以泚代懷光文喜不奉詔閉城拒守質其子吐蕃以求援時方煬旱人情騷攜羣臣皆請赦文喜帝不聽詔減服御給軍且趣師涇州士當受春服者皆卽賜命泚懷光率軍攻之壘環其州別將劉海賓斬文喜獻其首涇州平而原卒不能城又以劉晏劾載已坐貶乃出晏忠州用庾準爲荆南節度使誣晏殺之朝野側目李正己表請晏罪炎懼乃遣腹心分走諸道裴冀使東都河陽魏博孫成使澤潞磁邢幽州盧東美使河南淄青李舟使山南湖南王定使淮西聲言宣慰而實自辯解言晏往嘗傳會姦邪謀立獨孤妃爲后帝自惡之非它過帝聞使中人復其言於正己還

報信然於是帝意銜之未發也會盧杞以門下侍郎同中書門下平章事進炎中書侍郎同秉政杞無術學貌公陋炎薄之託疾不與會食杞陰爲憾舊制中書舍人分押尚書六曹以平奏報開元初廢其職杞請復之炎固以爲不可杞益怒又密啟主書過咎逐之炎曰主書吾局吏也吾當自治之奈何相侵邪始炎還朝道襄漢因勸梁崇義入朝後又使李舟邀說之崇義益反側及其叛議者歸咎炎以爲趣成之帝欲以淮西李希烈統諸軍致討炎曰希烈始與李忠臣爲子逐忠臣取其位此可以任乎居無尺寸功猶倔彊不奉法設使平賊陛下將何以制之帝不能平恚曰朕業許之不能食吾言遂用希烈又嘗訪羣臣可大任者杞薦張鎰嚴郢而炎舉崔昭趙惠伯帝以炎論議疏闊遂罷爲尚書左僕射既謝對延英詔不至中書杞怒益欲中之先是嚴郢爲京兆尹不附炎炎諷御史張著劾之罷兼御史中丞源休與郢不善自流人擢休爲京兆少尹令伺郢過休反與郢善炎怒會張光晟謀殺回紇酋帥乃使休使回紇郢坐度田不實下除大理卿至是炎罷其子弘業賂狼籍故杞引郢爲御史大夫按之并得它過惠伯爲河南尹時嘗市炎第爲官廨御史劾炎宰相抑吏市私第貴取其直杞召大理正田晉評罪晉曰宰相於庶官比監臨計羨利罪奪官杞怒謫晉衡州司馬於是當監主自盜罪絞開元時蕭嵩嘗度曲江南欲立私廟以爲天子臨幸處乃止後炎復取以立廟飛語云地有王氣故炎取之帝聞震怒會獄具詔三司同覆貶

崖州司馬同正未至百里賜死年五十五貶惠伯多田尉亦殺之初炎矯飭志節頗得名既傳會元載抵罪俄而得政然伎害根中不能自止眦睚必讎果於用私終以此及禍自道州還也家人以綠袍木簡棄之炎止曰吾嶺上一逐吏超登上台可常哉且有非常之福必有非常之禍安可棄是乎及貶還所服久之詔復其官諡肅愍左丞孔幾駿之更曰平厲

庾準者常州人無學術以柔媚自進得幸於王縉驟至中書舍人時流噴薄之再遷尚書右丞縉得罪出為汝州刺史復入為司農卿又善炎故炎使節度荆南晏已誣死引為尚書左丞建中三年卒贈工部尚書

嚴郢字叔敖華州華陰人父正誨以才吏更七郡終江南西道採訪使郢及進士第補太常協律郎守東都太廟祿山亂郢取神主秘于家至德初定洛陽有司得以奉迎還廟擢大理司直呂諲鎮江陵表為判官方士申泰芝以術得幸肅宗遊遊湖衡間以妖幻詭眾贓鉅萬潭州刺史龐承鼎按治帝不信召還泰芝下承鼎江陵獄郢具言泰芝左道帝遣中人與諲雜訊有狀帝不為然御史中丞敬羽白貸泰芝郢方入朝亟辨之帝怒叱郢去郢復曰承鼎劾泰芝詭皆有實泰芝言承鼎驗左不存今緩有罪急無罪臣死不敢如詔帝卒殺承鼎流郢建州泰芝後坐妖妄不道誅代宗初追還承鼎官召郢為監察御史連署

帥府司馬郭子儀表為關內河東副元帥府判官遷行軍司馬子儀鎮邠州檄郢主留務河中士卒不樂戍邠多逃還郢取渠首尸之乃定歲餘召至京師元載薦之帝時載得罪不見用御史大夫李栖筠亦薦郢帝曰是元載所厚可乎答曰如郢材力陛下不自取而留為姦人用邪即日拜河南尹水陸運使大厯末進拜京兆尹嚴明持法令疾惡撫窮敢誅殺盜賊一衰減隸官匠丁數百人號稱職宰相楊炎請屯田豐州發關輔民鑿陵陽渠郢習朔邊病利即奏舊屯肥饒地今十不墾一水田甚廣力不及而廢若發二京關輔民浚豐渠營田擾而無利請以內苑時稻驗之秦地膏腴田上上耕者皆畿人月一代功甚易又人給錢月八千糧不在然有司常募不能足合府縣共之計一農歲錢九萬六千米月七斛二斗大抵歲餼丁三百錢二千八百八十萬米二千一百六十斛臣恐終歲獲不酬費況二千里發人出塞而歲一代乎又自太原轉糧以哺私出資費倍之是虛畿甸事空徭也郢又言五城舊屯地至廣請以鑿渠糧俾諸城夏貸冬輸取渠土布帛給田者合據直轉穀則關輔免調發而諸城關田炎不許渠卒不成棄之御史臺請天下斷獄一切待報唯殺人許償死論徒者得悉徙邊郢言罪人徙邊卽流也流有三而一用之誠難且殺人外猶有十惡偽造用符印彊光火諸盜今一徙之法太輕不足禁惡又罪抵徒科別差殊或毆傷夫婦離非義絕養男別姓立嫡不如式私度關冒戶等不可悉而與十惡同徒卽輕重不倫又按京

師天下聚論徒者至廣例不覆讞今若悉待報有司斷決有程月不啻五千獄正恐牒按填委章程紊撓且邊及近邊犯死徒流者若何爲差請下有司更議炎惡異己陰諷御史張著劾鄧匿發民浚渠使怨歸上繫金吾長安中日數千人遮建福門訟鄧寃帝微知之削兼御史中丞人知鄧得原皆迎拜會秋旱鄧請蠲租稅炎令度支御史按覆以不實罷爲大理卿炎之罷盧杞引鄧爲御史大夫共謀炎罪卽逮捕河中觀察使趙惠伯下獄楚掠慘棘鍛成其罪卒逐炎崖州惠伯費州天下以鄧挾宰相報仇爲不直然杞用鄧敗炎內忌鄧才因按蔡廷玉事殺御史鄭詹出鄧爲費州刺史道逢樞殯問之或曰趙惠伯之殯鄧內慙忽忽歲餘卒

竇參字時中刑部尚書誕四世孫學律令爲人矜嚴悻直果於斷以蔭累爲萬年尉同舍當夕直者聞親疾惶遽參爲代之會失囚京兆按直簿劾其人參曰彼以不及謁而往參當坐乃貶江夏尉人皆義之遷奉先尉男子曹芬兄弟隸北軍醉暴其妹父救不止志赴井死參當兄弟重辟衆請俟免喪參曰父繇子死若以喪延是殺父不坐皆榜殺之一縣畏伏進大理司直按江淮獄揚州節度使陳少游偃蹇不郊迎遣軍吏致問參厲辭譙讓少游慙往謁參參不顧卽去婺州刺史鄧珽盜賊八千緡宰相右珽欲免輸其財詔百官集尚書省議多希意爲助參獨持法卒輸入之遷監察御史湖南判官馬燧發部令賊千萬令

之子因權幸誣奏參往按直其侵嶮繇後佐曹王臯以幹直聞者也入爲御史中丞舉劾無所回忌德宗數召見語天下事或決大議帝器之然多與宰相駁異數爲排卻卒無以傷參由是無所懼或率情制事矣時定百官班粟參嘗爲大理司直故多其入使在丞上惡詹事李昇抑其班在諸府少尹下中外稍惡其專進兼戶部侍郎民家生豕二首四足有司欲以聞參曰此乃豕禍屏不奏陳少游死子請襲封參大署省門曰少游位將相以艱危易節上舍垢不忍發其息容得傳襲邪神策將軍孟華戰有功或譔以反龍武將軍李建玉陷吐蕃自拔歸部曲告與虜通皆論死參悉治出之人始屬望俄以中書侍郎同中書門下平章事領度支鹽鐵使每延英對它相罷參必留以度支爲言實專政也然參無學術不能稽古立事惟樹親黨多所訶察四方畏之於是淄青李納厚饋參外示嚴畏實賂帝親近爲間故左右爭毀短之申其族子也爲給事中參親愛每除吏多訪申申因得招賂漏禁密語故申所至人目爲喜鵲帝聞以戒參且曰是必爲累不如斥之參以情訴曰臣無疆子姓申雖疏屬無它惡帝曰而雖自保如外言何參固陳丐初陸贄與參不平吳通玄兄弟皆在翰林與贄軒輊不得申舅嗣誠王則之與通微等善遂共譖贄帝得其姦逐申爲道州司馬不浹日貶參郴州別駕宣武劉士寧餉參絹五千湖南觀察使李巽故與參隙以狀聞又中人爲之驗左帝大怒以爲外交戎臣欲殺參贄雖怨然亦以殺之太重乃貶驪州司馬

逐其息景伯于泉州女尼于郴州沒入貲產奴婢帝又欲殺申則之及屬人榮贊固爭法有首從首原則從滅榮與參雖善然初無邪僻數激憤有直言晚頗疏忌請貶榮遠官申則之除名流嶺南詔可待宣侍謗沮不已參竟賜死于邕州年六十而杖殺申免榮死諸寶並逐云

吳通玄者海州人與弟通微皆博學善文章父道瓘以道士詔授太子諸王經故通玄等皆得侍太子游太子待之甚善始通玄舉神童補祕書正字又擢文辭清麗科調同州司戶參軍德宗立弟兄踵召爲翰林學士頃之通微遷職方郎中通玄起居舍人並知制誥凡帝有譏述非通玄筆未嘗慊與陸贄吉中孚輩教誼並位贄文高有謀特爲帝器遇且更險難有功通玄等特以東宮恩舊進昵而不禮見贄驟擢頗媚恨贄自恃勁正屢短通玄於帝前欲斥遠之卽建言承平時工藝書畫之冗皆待詔翰林而無學士至德以來命集賢學士入禁中草書詔待進止於翰林院因以名官今四方無事制書職分宜歸中書舍人請罷學士帝不許通玄怨日結謀奪其內職會贄權知兵部侍郎主貢舉乃命爲真貞元七年通玄拜諫議大夫自以久次當得中書舍人大怨望贄與寶參交惡參從子申從舅嗣號王則之方爲金吾將軍故申介之使結通玄兄弟共危贄而通玄以宗室女爲外婦帝知未及責則之飛謗云贄試進士受賄謝帝惡醜構大怒罷參宰相逐則之昭州司馬通玄泉州司馬又銜淫汙近屬事自詰之不敢答賜死長城驛

贄遂相矣通玄死通微白衣待罪於門帝宥之內懼禍不敢行喪服

贄曰元載楊炎各以才資奮適主暗庸故致位輔相若其翦閹尹城原州以謀西夏還左藏有司一租賦以檢制有亡誠有取焉然載本與輔國以利合險刻著諸心谿壑之欲發乎無厭炎牽連載勢興醜裔秉國維綱返爲載復讎釋言於君卒與妻子併誅暴先骨殖命於道蓋自取之也夫姦人多才未始不爲患故鄴舒以俊死而鄧析以辯亡若兩人者所謂多才者邪縉言福業報應參得君自私無可論者易稱鼎折足其刑劇諒哉

唐書卷一百四十五

Blank columns for text in the right-hand page.

唐書卷一百四十六

宋 端 明 殿 學 士 宋 祁 撰

列傳第七十一

二李

李栖筠字貞一世為趙人幼孤有遠度莊重寡言體貌軒特喜書多所通曉為文章勁迅有體要不妄交游族子華每稱有王佐才士多慕向始居汲共城山下華固請舉進士俄擢高第調冠氏主簿太守李峴視若布衣交遷安西封常清節度府判官常清被召表攝監察御史為行軍司馬肅宗駐靈武發安西兵栖筠料精卒七千赴難擢殿中侍御史李峴為大夫以三司按羣臣陷賊者表栖筠為詳理判官推原其人所以脅汙者輕重以情悉心助峴故峴愛恕之譽一旦出呂誣崔器上三遷吏部員外郎判南曹時大盜後選簿亡舛多僞冒栖筠剖析有條吏氣奪號神明遷山南防禦觀察使會峴去相栖筠坐所善除太子中允眾不直改河南令李光弼守河陽高其才引為行軍司馬兼糧料使改絳州刺史擢累給事中是時楊綰以進士不鄉舉但試辭賦浮文非取士之實請置五經秀才科詔羣臣議栖筠與賈至李廙以綰所言為是進工部侍郎關中舊仰鄭白二渠溉田而豪戚壟上游取磴利且百所奪農用十七栖筠請皆

徹毀歲得租二百萬民賴其入魁然有宰相望元載忌之出爲常州刺史歲仍旱編人死徙踵路栖筠爲邊渠廝江流灌田遂大稔宿賊張度保陽羨西山累年吏討不克至是發卒捕斬支黨皆盡里無吠狗乃大起學校堂上畫孝友傳示諸生爲鄉飲酒禮登歌降飲人人知勸以治行進銀青光祿大夫封贊皇縣子賜一子官人爲刻石頌德蘇州豪士方清因歲凶誘流殍爲盜積數萬依鄆歙間阻山自防東南厭苦詔李光弼分兵討平之會平盧行軍司馬許杲恃功擅留上元有窺江吳意朝廷以創殘重起兵卽拜栖筠浙西都團練觀察使國之栖筠至張設武備遣辯士厚齎金幣抵杲軍勞使士歆愛奪其謀杲懼悉衆度江掠楚泗而潰以功進兼御史大夫則又增學廬表宿儒河南褚沖吳何員等超拜學官爲之師身執經問義遠邇趨慕至徒數百人又奏部豪姓多徙貫京兆河南規脫徭科請量產出賦以杜姦謀詔可元載當國久益恣橫代宗不能堪陰引剛顯大臣自助欲收綱權以黜載會御史大夫敬括卒卽召栖筠與河南尹張延賞擇可爲大夫者延賞先至遂代括會李少良陸珽等上書劾載陰事詔御史問狀延賞稱疾不敢鞠少良珽覆得罪死帝殊失望出延賞爲淮南節度使引拜栖筠爲大夫始栖筠見帝敷奏明辯不阿附帝心善之故制麻自中以授朝廷莫知也中外竦胎栖筠素方挺無所屈於是華原尉侯莫陳怱以優補長安尉當參臺栖筠物色其勞怱色動不能對乃自言爲徐浩杜濟薛嵩所引非真優也始浩

罷嶺南節度使以環貨數十萬餉載而濟方爲京兆選吏部侍郎三人者皆載所厚栖筠并劾之帝未栖會月蝕帝問其故栖筠曰月蝕脩刑今罔上行私者未得天若以儆陛下邪繇是怱等皆坐貶故事賜百官宴曲江教坊倡願雜侍栖筠以任國風憲獨不往臺遂以爲法帝比比欲召相憚載輒止然有進用皆密訪焉多所補助栖筠見帝猗違不斷亦內憂憤卒年五十八自爲墓誌贈吏部尚書諡曰文獻欽決喜獎善而樂人攻己短爲天下士歸重不敢有所斥稱贊皇公云子吉甫

吉甫字弘憲以蔭補左司禦率府倉曹參軍貞元初爲太常博士年尙少明練典故昭德皇后崩自天寶後中宮虛卹禮廢缺吉甫草具其儀德宗稱善李泌竄參器其才厚遇之陸贄疑有黨出爲明州長史贄之貶忠州宰相欲害之起吉甫爲忠州刺史使甘心焉既至置怨與結懼人益重其量坐是不徙者六歲改郴饒二州會前刺史繼死咸言牙城有物怪不敢居吉甫命菑除其署以視事吏由是安誅破姦盜窟穴治稱流聞憲宗立以考功郎中召知制誥俄入翰林爲學士遷中書舍人劉闢拒命帝意討之未決吉甫獨請無置宜絕朝貢以折姦謀時李錡在浙西厚賂貴幸請用韓滉故事領鹽鐵又求宜歛問吉甫對曰昔韋臯蓄財多故劉闢因以構亂李錡不臣有萌若益以鹽鐵之饒采石之險是趣其反也帝寤乃以李異爲鹽鐵使高崇文圍鹿頭未下嚴礪請出并州兵與崇文趨果闢以攻渝合吉甫以爲非是因言漢

伐公孫述晉伐李勢宋伐譙縱梁伐劉季連蕭紀凡五攻蜀緜江道者四且宣洪斬鄂疆弩號天下精兵爭險地兵家所長請起其兵擣三峽之虛則賊勢必分首尾不救崇文懼舟師成功人有鬪志矣帝從之彌復請大臣爲節度吉甫諫曰崇文功且成而又命帥不復盡力矣因請以西川授崇文而屬疆東川益資簡六州使兩川得以相制由是崇文悉力劉闢平吉甫謀居多吐蕃遣使請尋盟吉甫議德宗初未得帝詔故與吐蕃盟自異牟尋歸國吐蕃不敢犯塞誠許盟則南詔怨望邊隙日生帝辭其使復請獻瀛塞李璋南北數千里求盟吉甫謀曰邊境荒咀犬牙相吞邊吏按圖覆視且不能知今吐蕃緜山跨谷以數番紙而圖千里起靈武著劍門要險之地所亡二三百所有得地之名而實喪之陛下將安用此帝乃詔謝贊普不納張愔既得徐州帝又欲以濠泗二州還其軍吉甫曰泗負淮餉道所會濠有渦口之險前日授建封幾失形勢今愔乃兩廊壯士所立雖有善意未能制其衆又使得淮渦阨東南走集憂未艾也乃止中書史滑渙素厚中人劉光琦凡宰相議爲光琦持異者使渙請常得如素宦人傳詔或不至中書召渙於延英承旨迎附羣意卽爲文書宰相至有不及知者由是通四方賂謝弟泳官至刺史鄭餘慶當國嘗一責怒數日卽罷去吉甫請問劾其姦帝使渙家得貲數千萬貶死雷州又建言州刺史不得擅見本道使罷諸道歲終巡旬以絕苛斂命有司舉材堪縣令者軍國大事以寶書易墨詔由是帝愈倚信元

和二年杜黃裳罷宰相乃擢吉甫中書侍郎同中書門下平章事吉甫連蹇外遷十餘年究知閭里疾苦常病方鎮疆恣至是爲帝從容言使屬郡刺史得自爲政則風化可成帝然之出郎吏十餘人爲刺史自王叔文時選任猥賈吉甫始簿其員人得敘進官無留才又度李錡必反勸帝召之使者三往以病解而多持金啗權貴至爲綺游說者吉甫曰綺庸材而所畜乃亡命羣盜非有鬪志討之必克帝意決復言昔徐州亂嘗敗吳兵江南畏之若起其衆爲先鋒可以絕徐後患韓弘在汴州多憚其威誠詔弘子弟率兵爲犄角則賊不戰而潰從之詔下錡衆聞徐梁兵興果斬錡降以功封贊皇縣侯徙趙國公德宗以來姑息藩鎮有終身不易地者吉甫爲相歲餘凡易三十六鎮殿最分明裴均以尙書右僕射判度支結黨傾執政會皇甫湜等對策指摠權彊用事者皆怒帝亦不悅均黨因宣旨殆執政使然右拾遺獨孤郁李正辭等陳述本末帝乃解吉甫本善寶羣羊士諤呂溫薦羣爲御史中丞羣卽奏士諤侍御史溫知雜事吉甫恨不先白持之久不決羣等銜之俄而吉甫病醫者夜宿其第羣捕醫者劾吉甫交通術士帝大駭訊之無狀羣等皆貶而吉甫亦固乞免因薦裴垍自代乃以檢校兵部尙書兼中書侍郎同中書門下平章事爲淮南節度使帝爲御通化門祖道賜御餽禁方居三歲奏蠲逋租數百萬築富人固本二塘溉田且萬頃漕渠墾下不能居水乃築隄闕以防不足洩有餘名曰平津堰江淮旱浙東西尤甚有司不爲請吉

甫曰以時救恤帝驚馳道使分遣賑貸吉甫雖居外每朝廷得失輒以聞六年裴瑄病免復以前官召吉甫還秉政入對延英凡五刻罷帝尊任之官而不名吉甫疾吏員廣繇漢至隋未有多於今者乃奏曰方今置吏不精流品龐雜存無事之官食至重之稅故生人日困冗食日滋又國家自天寶以來宿兵常八十餘萬其去爲商販度爲佛老雜入科役者率十五以上天下常以勞苦之人三奉坐待衣食之人七而內外官仰奉粟者無慮萬員有職局重出名異事離者甚衆故財日寡而受祿多官有限而調無數九流安得不雜萬務安得不煩漢初置郡不過六十而文景化幾三王則郡少不必政繁郡多不必事治今列州三百縣千四百以邑設州以鄉分縣費廣制輕非致化之本願詔有司博議州縣有可併併之歲時入仕有可停停之則利寡易求官少易治國家之制官一品奉三千職田祿米大抵不過千石大庠時權臣月俸至九千縉者州刺史無小大皆千縉宰相常衰始爲裁限至李泌量閑劇稍增之使相通濟然有名在職廢奉存額去閑劇之官厚薄頓異亦請一切商定乃詔給事中段平仲中書舍人韋貫之兵部侍郎許孟容戶部侍郎李絳參閱蠲減凡省冗官八百員吏千四百員又奏收都畿佛祠田禮租入以寬貧民德宗時義陽義章二公主薨詔起祠堂于墓百二十楹費數萬計會永昌公主薨有司以請帝命減義陽之半吉甫曰德宗一切之恩不可爲法昔漢章帝欲起昌屋於親陵東平王蒼以爲不可故非禮之舉人

君所慎請裁置墓戶以充守奉帝曰吾固疑其冗減之今果然然不欲取編民以官戶奉墳而已吉甫再拜謝帝之事不安者第言之無謂朕不能行也十宅諸王既不出閣諸女嫁不時而選尙皆繇中人厚爲財謝乃得遣吉甫奏自古尙主必慎擇其人江左悉取名士獨近世不然帝乃下詔皆封縣主令有司取門閥者配焉田季安疾甚吉甫請任薛平爲義成節度使以重兵控邢洛因圖上河北險要所在帝張於浴堂門壁每議河北事必指吉甫曰朕日按圖信如卿料矣劉潼舊軍屯普潤數暴掠近縣吉甫奏還涇原畿民賴之八年回鶻引兵自西城柳谷侵吐蕃塞下傳言且入寇吉甫曰回鶻能爲我寇當先絕和而後犯邊今不足虞也因請起夏州至天德復驛候十一區以通緩急發夏州精騎五百屯經略故城以護党項而已既而果邊更妄言六胡州在靈武部中開元時廢之置宥州以處降戶寓治經略軍居中以制戎虜北援天德南接夏州至德寶應間廢宥州以軍遙隸靈武道里曠遠故党項孤弱虜數擾之吉甫始奏復宥州乃治經略軍以隸綏銀道取鄜城神策屯兵九千實之以江淮甲三十萬給太原澤潞軍增太原馬千匹由是戎備完輯自蜀平帝銳意欲取淮西方吉甫在淮南聞吳少陽立上下攜泮自請徙壽州以天子命招懷之反間以檣其黨會討王承宗未及用後田弘正以魏歸吉甫知魏人謂田進誠才而唐州乃蔡喉衿請拔進誠爲刺史以臨賊境且慰魏心烏重胤守河陽吉甫以汝州捍蔽東都聯唐許當蔡

西面兵寡不足憚寇而河陽乃魏博之津弘正歸國則爲內鎮不宜戍重兵示不信請徙屯汝州帝皆從之後弘正拜檢校尚書右僕射賜其軍錢二十萬弘正曰吾未喜於移河陽軍也及元濟擅立吉甫以內地無臂齒援因時可取不當用河朔故事與帝意合又請自往招元濟苟逆志不悛得指授羣帥俘賊以獻天子不許因請至流涕帝慰勉之會暴疾卒年五十七帝震悼賻外別賜緡五百卹其家自大斂至卒哭皆中人臨弔吉甫圖淮西地未及上帝敕其子獻之及葬祭以少牢贈司空有司諡曰敬憲度支郎中張仲方非之帝怒貶仲方更賜諡曰忠懿始吉甫當國經綜政事衆職咸治引薦賢士大夫愛善無遺憂忠臣後以起義烈與武元衡連位未幾節度劍南屢言元衡材宜還爲相及再輔政天下想望風采而稍脩怨罷李藩宰相而裴垙左遷皆其謀也李正辭晚相失及與蕭俛同召爲翰林學士獨用俛而罷正辭人莫不疑憚帝亦知其專乃進李絳遂與有隙數辯爭殿上帝多直絳然畏慎奉法不忤害顧大體左拾遺楊歸厚嘗請對日已旰帝令它日見因請不肯退既見極論中人許遂振之姦又歷詆輔相求自試又表假郵置院具婚禮帝怒其輕肆欲遠斥之李絳爲言不能得吉甫見帝謝引用之非帝意釋得以國子主簿分司東都初政事堂會食有巨牀相傳徙者宰相輒罷不敢遷吉甫笑曰世俗禁忌何足疑邪撤而新之吉甫居安邑里時號安邑李丞相所論善甚多皆行于世前卒一歲煢煢掩太微上相吉甫曰天且

殺我再遜位不許

子德脩亦有志操寶厯中爲膳部員外郎張仲方入爲諫議大夫德脩不欲同朝出爲舒湖楚三州刺史卒次子德裕自有傳

李鄴字建侯北海太守嵩之從孫第進士又以書判高等補祕書省正字李懷光辟致幕府擢累監察御史懷光反河中鄴與母妻陷焉因給懷光以兄病臥洛且革母欲往視懷光許可戒妻子無偕行鄴私遣之懷光怒欲加罪謝曰鄴籍在軍不得爲母駕奈何不使婦往懷光止不問後與高郢刺賊盧寶及所以攻取者白諸朝德宗手詔褒答懷光覺嚴兵召二人問之鄴詞氣不撓三軍爲感動懷光不殺囚之河中平馬燧破械致禮表佐其府以言不用罷歸洛中召爲吏部員外郎徐州張建封卒兵亂囚監軍迫建封子愔主軍務帝以鄴剛敢拜宣慰使持節直入其軍大會士喻以禍福出監軍獄中脫桎梏使復位衆不敢動愔卽上表謝罪稱兵馬留後鄴曰非詔命安得輒稱之削去乃受既還稱旨遷郎中順宗時進御史中丞憲宗立爲京兆尹進尚書右丞元和初京師多盜賊復拜京兆以檢校禮部尚書爲鳳翔隴右節度使是鎮常兼神策行營前此用武將始受詔卽詣軍脩謁鄴以爲不可詔爲去神策行營號俄徙河東入爲刑部尚書諸道鹽鐵轉運使拜淮南節度使王師討蔡方急李師道謀撓沮之鄴以兵二萬分蹙鄆境

贊餉不仰有司是時兵興天子憂財乏使程昇馳驛江淮諷諸道輸貨助軍鄺素富彊卽籍府庫留一歲備餘盡納于朝諸道由是悉索以獻駭鄺倡之先是吐突承瓘爲監軍貴寵甚鄺以剛嚴治相禮憚稍厚善承瓘歸數稱薦之召拜門下侍郎同中書門下平章事鄺不喜由宦幸進及出祖樂作泣下謂諸將曰吾老安外鎮宰相豈吾任乎至京師不肯視事引疾因辭改戶部尚書俄檢校尚書左僕射兼太子賓客分司東都以太子少傅致仕卒贈太子太保諡曰肅鄺彊直無私與楊憑穆質許孟容王仲舒友善皆以氣自任而鄺當官以峭法操下所至稱治猛決少恩在淮南七年其生殺禽擿多委軍吏而參佐束手不得與人往往陷非法議者亦以此少之

子拭仕歷宗正卿京兆尹河東鳳翔節度使以秘書監卒

拭子礪字景望大中末擢進士累遷戶部郎中分司東都劾奏內園使郝景全不法事景全反摘礪奏犯順宗嫌名坐奪俸礪上言因事告事旁訟他人者咸通詔語也禮不諱嫌名律廟諱嫌名不坐豈臣所引詔書而有司輒論奏臣恐自今用格令者委曲回避旁緣爲姦也詔不奪俸黃巢陷洛礪挾尚書八印走河陽時留守劉允章爲賊脅遣人就礪索印拒不與允章悟亦不臣賊嗣襄王之亂轉側淮南高駘受僞命礪苦諫不納入爲中書舍人翰林學士辭職歸華陰復以學士召乾寧元年進禮部尚書同中書門下

平章事崔昭緯素疾礪諷劉崇曾掠其麻哭之言礪懷姦與中人楊復恭昵歎其弟爲時溥所殺不可相天子翌日下遷太子少傅礪乃自言爲崇曾誣汗書十一上不止初崇曾父坐受賊仰藥死故礪以醜語及之議者譏其非大臣體昭宗素所器遇決意復用之而李茂貞等上言深詆其非帝不獲已又罷爲太子少師於是茂貞及王行瑜韓建擁兵闕下列礪罪殺之于都亭驛行瑜誅有詔復官爵贈司徒諡曰文礪好學家有書至萬卷世號李書樓所著文章及註解諸書傳甚多子沆字東濟有俊才亦遇害贈禮部員外郎

贊曰剛者天德故孔子稱剛近仁骨彊四支故君有忠臣謂之骨骸若栖筠鄺二子其剛者歟栖筠抗權邪不及相鄺得相不願拜非剛疇克勝之吉甫踐天宰謀謨是矣而鯁正有愧於父云

唐書卷一百四十六

唐書卷一百四十六考證

李暉子拭歷仕宗正卿京兆尹河東鳳翔節度使以祕書監卒○臣德潛按舊書又有子桂官至浙東觀

察使此新書所無而舊書亦無子拭

拭子礪○舊書作桂子礪

乾寧元年進禮部尚書同中書門下平章事○舊書在景福二年

唐書卷一百四十七

宋 端 明 殿 學 士 宋 祁 撰

列傳第七十二

三王魯辛馮三李曲二盧

王思禮高麗人入居營州父為朔方軍將思禮習戰鬪從王忠嗣至河西與哥舒翰同籍麾下翰為隴右節度使思禮與中郎將周倓事翰以功授右衛將軍關西兵馬使從討九曲後期當斬臨刑翰釋之思禮徐曰死固分也何復貸為諸將壯之天寶十三載吐谷渾蘇毗王款附詔翰至磨環川應接思禮墜馬蹇甚翰謂監軍李大宜曰思禮跛足尚欲何之俄加金城郡太守安祿山反翰為元帥奏思禮赴軍玄宗曰河隴精銳悉在潼關吐蕃有變唯倚思禮耳翰固請乃兼太常卿充元帥府馬軍都將翰委以軍事密勸翰表誅楊國忠翰不應復請以三十騎劫至潼關殺之翰曰此乃吾反何與祿山事潼關失守思禮與呂崇賁李承光同行在肅宗責不堅守引至纛下將斬之宰相房瑄諫以為可收後效遂獨斬承光赦思禮等尋副房瑄戰便橋不利更為關內行營節度河西隴右伊西行營兵馬使守武功賊安守忠來戰思禮退保扶風賊分兵略大和關去鳳翔五十里李光進戰未利行在戒嚴從官潛出其孥帝使左右巡御

史處候識其姓名衆稍稍止命郭子儀以朔方兵擊之會崔光遠行軍司馬王伯倫判官李椿以兵二千屯扶風聞賊已西欲乘虛襲京師徑至高陵賊引軍還擊椿等椿已至中渭橋殺守者千人進攻苑門伯倫戰死椿被執先是賊餘衆留武功既傳官軍入京師乃燒營遁自是賊不敢西長安平忠禮先入清宮收東京戰數有功遷兵部尙書封霍國公食實戶五百尋兼潞沁等州節度乾元元年總關中路州行營兵三萬騎八千與子儀圍賊相州軍潰惟李光弼思禮完軍還尋破史思明別將萬餘衆於直千嶺光弼徙河陽代爲河東節度副大使上元元年加司空自武德以來三公不居宰輔唯思禮而已二年薨贈太尉諡曰武烈思禮善守計短攻戰然持法嚴整士不敢犯在太原器甲完精儲粟至百萬斛云

魯見幽州薊人長七尺餘略通書史以蔭補左羽林長上隴右節度使哥舒翰引爲別奏顏真卿嘗使隴右謂翰曰君興耶將總節制亦嘗得人乎旻時立階下翰指曰是當爲節度使從破石堡城收河曲遷左武衛將軍後復以破吐蕃跳盪功除右領軍大將軍安祿山反拜上洛太守將行於帝前畫攻守勢還南陽太守兼守捉防禦使封金鄉公尋爲山南節度使以嶺南黔中山南東道子弟五萬屯潁水南賊將武令珣畢思琛等擊之衆欲戰旻不可賊右趨乘風縱火鬱氣奔營士不可止負扉走賊矢如雨旻與中人薛道挺身走衆沒賊時嶺南節度使何履光黔中節度使趙國珍襄陽節度使徐浩未至其子弟半在

軍挾金爲資糧至是與械借棄與山等賊資以富旻擊散兵保南陽潼關失守賊使哥舒翰招下不從使武令珣攻之令珣死田承嗣繼往潁川來瑱襄陽魏仲犀合兵援旻仲犀弟孟馴兵至明府橋望賊走旻城中食盡米斗五十千一鼠四百餓者相枕藉朝廷遣使者曹日昇宣慰加旻特進太僕卿不得入日昇請單騎致命仲犀不可會顏真卿自河北至謂曰使者不顧死致天子命設爲賊獲是亡一使者脫能入城則萬心固矣中官馮廷瓌亦曰將軍必入我請以兩騎助仲犀益騎凡十輩賊望見知皆銳兵不敢擊遂入致命人心益固日昇復以騎趨襄陽領兵千由音聲道運糧餉旻故旻得與賊相持踰三月旻被圍凡一年晝夜戰人至相食卒無救至德二載五月乃率衆突圍走襄陽承嗣尾擊旻殊死戰一日斬獲甚衆賊引去俄拜御史大夫襄鄧十州節度使亦會二京平賊走河北時襄漢數百里鄉聚蕩然舉無樵烟初賊欲剽亂江湖賴旻適扼其衝故南夏以完策勳封岐國公實封二百戶乾元元年又加淮西節度鄧州刺史與九節度圍安慶緒於相州旻領淮西襄陽兩鎮步卒萬人騎三百明年與史思明戰安陽王師不利旻中流矢輒奔諸節度潰去所過剽奪而旻軍尤甚有詔來瑒節度淮西徙旻鄭陳毫節度使至新鄭聞郭子儀整軍屯穀水李光弼還太原旻羞惴仰藥死年五十七

王難得沂州臨沂人父思敬少隸軍試太子賓客難得健于武工騎射天寶初爲河源軍使吐蕃贊普子

耶支都者恃趨敏乘名馬寶鈿鞍略陣挑戰甚閑暇無敢校者難得怒挾矛驟馬馳支都不暇關直斬其首玄宗壯其果召見令殿前乘馬挾矛作刺賊狀大悅賜錦袍金帶累授金吾將軍從哥舒翰擊吐蕃至積石虜吐谷渾王子悉弄參及悉頰藏而還復收五橋拔樹惇城進白水軍使收九曲加特進肅宗在靈武軍賞乏難得上家贊助軍試衛尉卿俄領興平軍及鳳翔兵馬使收京師方戰麾下士失馬難得馳救矢著眉披膚鄒目乃拔箭斷膚殊死前鬪血噴而不已帝嘉之從郭子儀攻相州累封琅邪郡公爲英武軍使寶應二年卒贈潞州大都督

子子顏少從父征討檢校衛尉卿生莊憲太后元和元年憲宗朝太后南宮乃褒贈思敬爲司徒難得太尉子顏太師唯子顏子用及封

用字師柔拜太子詹事纔三月封太原郡公掌廡苑累遷檢校左散騎常侍兼右金吾大將軍謙異無過卒贈工部尚書

辛雲京蘭州金城人客籍京兆世爲將家雲京有膽決以爲生斬敵常冠軍積功遷特進太常卿史思明屯相州雲京以銳兵四千襲滏陽追破其衆至浪井錄多授開府儀同三司加代州都督鎮北兵馬使太原軍亂帝惡鄧景山繩下無漸以雲京性沈毅故授太原尹進封金城郡王雲京治謹于法下有犯雖絲

毫比不肯貸及賞功亦如之故軍中畏而信回紇恃舊勳每入朝所在暴鈔至太原雲京以戎狄待之虜畏不敢惕息數年太原大治加檢校尚書右僕射同中書門下平章事大厯三年檢校左僕射卒年五十五代宗爲發哀流涕贈太尉諡曰忠獻它日郭子儀元載見上語及雲京帝必泣然及葬命中使弔祠時將相祭者至七十餘輿喪車移暑乃得去德宗時第至德以來將相雲京爲次

從弟京臬字京臬信安王禕節度朔方京臬與弟旻以策干說禕評咨加異後從李光弼出井陘督趨邊先驅戰嘉山尤力肅宗異之召見曰黥彭關張之流乎累遷鴻臚卿召爲英武軍使代宗立封庸國公遷左金吾衛大將軍進晉昌郡王歷湖南觀察使後爲工部尚書致仕未泚盜京師以老病不能從西嚮慟而卒贈太子少保旻亦從光弼定恒趙後署太原三城使史思明屯相軍及滏陽旻逆擊走之東都陷退守河陽卒于屯雲京曾孫謙別傳

馮河清京兆人始隸郭子儀軍以戰多拜左衛大將軍後從涇原節度使馬璘充兵馬使數以偏師與吐蕃遇多效級名聞軍中建中時節度使姚合言率兵討關東以河清知留後幕府殿中侍御史姚況領州而行師過關有急變德宗走奉天河清况聞召諸將計事東向哭相勵以忠意象軒毅衆義其爲無敢異言即發儲糧完仗百餘乘獻行在初帝之出大軍倉卒無良兵士氣沮及河清輸械至被堅勒兵軍聲

大振即拜河清涇原節度使安定郡王況行軍司馬朱泚數遣謀人誅之河清輒斬以徇興元元年渾瑊以吐蕃兵敗賊韓旻等涇人妄傳吐蕃有功將以叛卒擊與貲歸之衆大恐且言不殺馮公吾等無類矣田希鑿遂害河清況挺身還鄉里京師平贈河清尚書左僕射拜況太子中舍人況性簡退未嘗言功屬歲凶奉稍不自給以餓死河清再贈太子少傅

李芄字茂初趙州人解褐上邽主簿嚴武爲京兆尹薦補長安尉李勉觀察江西表署判官永泰初宣饒劇賊方清陳莊西絕江劫商旅爲亂支黨聚結芄請以秋浦置州扼衿要使不得合從勉是其計奏以宣之秋浦青陽饒之至德置池州卽詔芄行州事後魏少游代勉表署都團練副使攝江州刺史以母喪解勉之節度承平復辟幕府會李靈耀反署芄兼亳州防禦使護陳穎饒道便軍興德宗立授河陽三城鎮遏使糧糈善者必先以給士士悅之達練事宜嚴備常有敵未幾拜節度使以東畿汜水等五縣隸屬與馬燧等破田悅泝水上以功檢校兵部尚書實封百戶進圍悅悅將符璘以騎五百降芄大開壁門納之興元初檢校尚書右僕射以疾將請老謂所親曰歲方旱蝗上厭征伐天下城壘堅戈鋌利然務以力勝其可盡乎救敝者莫若德方鎮之臣宜先退讓死權錮祿吾敢哉言而不踐非吾志也固求罷歸東都卒年六十四贈太子太保

李叔明字晉闡州新政人本鮮于氏世爲右族兄仲通字向天寶末爲京兆尹劍南節度使兄弟皆涉學輕財務施叔明擢明經爲楊國忠劍南判官乾元中除司勳員外郎副漢中王瑀使回紇回紇遇瑀慢叔明諷曰大國通好使賢王持節可汗唐之婿恃功而倨可乎可汗爲加禮復命遷司門郎中東都平拜洛陽令招徠遺民號能吏擢商州刺史上津轉運使遷京兆尹長安歌曰前尹赫赫具瞻允若後尹熙熙具瞻允斯久之以疾辭除太子右庶子崔旰擾成都出爲邛州刺史旰入朝卽拜東川節度使遂州刺史徙治梓州大厯末或言叔明本嚴氏少孤養外家冒鮮于姓請還宗詔可叔明初不知意醜之表乞宗姓列屬籍代宗從之建中初吐蕃襲火井掠龍州陷扶文遠三州叔明分五將邀擊走之以功加檢校戶部尚書梁崇義阻命詔引兵下峽戰荆門敗其寇襄州平遷檢校尚書左僕射德宗幸興元出家貲助軍悉衣幣獻宮掖加太子太傅封薊國公初東川承兵盜鄉邑彫破叔明治之二十年撫接有方華裔遂安後朝京師以病足賜錦鞶令宦士肩舁以見拜尚書右僕射乞骸骨改太子太傅致仕貞元三年卒諡曰襄始叔明與仲通俱尹京兆及兼秩御史中丞並節制劍南又與子昇俱兼大夫蜀人推爲盛門叔明素惡道佛之弊上言曰佛空寂無爲者也道清虛真欲者也今迷其內而飾其外使農夫工女墮業以避役故農桑不勸兵賦日屈國用軍儲爲數耗臣請本道定寺爲三等觀爲二等上寺留僧二十一上觀道士十四

每等降殺以七皆擇有行者餘還爲民德宗善之以爲不止本道可爲天下法乃下尚書省雜議於是都官員外郎彭偃曰王者之政變人心爲上因人心次之不變不因爲下今道士有名亡實俗鮮歸重於亂政輕僧尼幣穢皆天下不逞苟避征役於亂人甚今叔明之請雖善然未能變人心亦非因人心者夫天生蒸人必將有職游閑浮食王制所禁故賢者受爵祿不肖者出租稅古常道也今僧道士不耕而食不織而衣一僧衣食歲無慮三萬五夫所不能致舉一僧以計天下其費不貲臣謂僧道士年未滿五十可令歲輸絹四尼及女冠輸絹二雜役與民同之過五十者免凡人年五十嗜欲已衰況有戒法以檢其性情哉刑部員外郎裴伯言曰衣者蠶桑也食者耕農也男女者繼祖之重也而二教悉禁國家著令又從而助之是以夷狄不經法反制中夏禮義之俗也傳曰女子十四有爲人母之道四十九絕生育之理男子十六有爲人父之道六十四絕陽化之理臣請僧道士一切限年六十四以上尼女冠四十九以上許終身在道餘悉還爲編人官爲計口授地收廢寺觀以爲廬舍議雖上罷之

子昇以少卿從德宗梁州叔明嚴敕以死報故昇有功擢禁軍將軍貞元初遷太子詹事坐部國公主貶羅州別駕叔明素豪侈在蜀殖財廣第舍田產歿數年子孫驕縱貨產皆盡世言多藏者以叔明爲鑒云曲環陝州安邑人客隴右少喜兵法資勇敢善騎射天寶中從哥舒翰討吐蕃拔石堡取黃河九曲洪濟

等城授果毅別將安祿山反從魯鳳守鄧州與賊武令珣戰尤力加左清道率從李抱玉屯河陽又自將兵守澤州破賊銳將安曉拜羽林將軍與諸將討史朝議平河北累轉金吾大將軍大厯中戍隴州數破吐蕃以功兼太常卿德宗初虜寇劍南詔環以邪隴兵五千馳救收七盤城威武軍維茂等州虜破走威咎大振加太子賓客賜名馬豫討涇州劉文喜遷開府儀同三司封晉昌郡王邪隴兵馬使時李納逼徐州環與劉玄佐救之敗其衆功最建中三年擢邪隴行營節度使李希烈陷汴州環守寧陵戰陳州斬賊三萬五千級禽其將翟崇暉進檢校工部尚書兼陳州刺史希烈平改陳許節度賜封三百戶二州比爲寇衝民苦黜鹵客他縣環勤身節用寬賦斂簡條教不三歲歸者繼係訓農治兵穀食豐衍轉檢校尚書左僕射貞元十五年卒年七十四贈司空

王虔休字君佐汝州梁人少涉學有材武以信義爲鄉黨畏慕大厯中刺史李深署爲裨將澤潞李抱真聞其名厚以幣招之授兵馬使抱真討河北戰雙岡臨洛虔休以多擢步軍都虞候封同昌郡王實封五十戶抱真卒元仲經等謀樹其子緘一軍思亂虔休正色語衆曰軍王軍州王土也帥亡當稟天子何云云有妄謀衆服其言得不亂德宗嘉之以豈王爲昭義節度大使擢虔休潞州左司馬領留後本名延貴至是賜名號令撫循軍中大治初抱真之喪軍司馬元誼據洛州叛虔休遣將李廷芝討之戰長橋斬級

數百次雞澤又破之守戍皆奔魏博卽決水灌城將壞遣掌書記盧頊入見誼陳利害誼請朝卽以頊爲洛州別駕使守洛誼出亦奔魏治潞二歲遷昭義節度使檢校工部尙書始屬城州縣守宰多署它職不親政故治苟簡度休悉增俸粟遣就部人以安安卒年六十二贈尙書左僕射諡曰敬虔休性格敏節用度旣沒所部帑廩皆可支數歲嘗得太常樂家劉玠撰繼天誕聖樂因帝誕日以獻其樂以宮爲均示五聲有君也以土爲德本五運在中也奏二十五疊取二十四氣而成一歲奏十六節象元凱登庸于朝云後中和樂本于此子麗成等十人並補太學生

盧羣字載初系出范陽少學於垂山淮南陳少游聞其名奏署幕府已而薦諸朝李希烈反以監察御史爲江西行營糧料使嗣曹王臯節度江西奏爲判官臯徙荆襄皆從其府以勁正聞入爲侍御史郭子儀家與嬖人張昆弟訟財不平又言嬖人宅匿珍寶德宗促按之羣奏言子儀有大勳德宗所訟皆其家事且嬖人宅子儀昔畀之非子弟所宜言請赦勿問從之人謂羣識大體累遷兵部郎中淮西吳少誠擅決司泔水溉田使者止之不奉詔命羣臨詰少誠曰是於人有利羣曰臣道貴順恭恪所以爲順也專命廢順雖利何有且怠於事上者固不能責其下矣少誠聽命羣又爲陳古今成敗事逆順禍福皆有效所以感動之少誠竦然旣置酒與賦詩又歌以慰之少誠感悅不敢桀以奉使稱旨遷檢校祕書監鄭滑節度

行軍司馬姚南仲入朝卽以羣代節度羣嘗客于鄭質良田以耕至是則出券貸直以田歸其人卒年五十九贈工部尙書

李元素字太朴邢國公密裔孫仕爲御史東都留守杜亞惡大將令狐運會盜劫輸絹於洛北運適與其下畋近郊亞疑而訊之幕府穆員張弘靖按鞫無狀亞怒更以愛將武金掠服之死者甚衆亞請斥運醜士詔監察御史楊靈覆驗事皆不讎亞怒劾靈罔上蓋抵罪又自以不失盜爲功因必其怒傳致而周內之若不可翻者德宗信不疑宰相難之詔元素與刑部員外郎崔從質大理司直盧士瞻馳按亞迎以獄告元素徐察其寃悉縱所囚以還亞大驚復劾元素失有罪比元素還帝已怒奏獄未畢帝曰出元素曰臣言有所未盡帝曰第去元素曰臣以御史按獄知寃不得盡辭是無容復見陛下帝意解卽道運寃狀帝感寤曰非卿孰能辨之然運猶以擅捕人得罪流歸州死于貶武金流建州後歲餘齊抗得眞盜繇是天下重之遷給事中後美官闕咸冀元素得其處會鄭滑節度使盧羣卒拜元素檢校工部尙書節度其軍治有異績元和初召爲御史大夫大夫自貞元後難其人不補而元素以夙望召拜中外企聽風采旣而一不建爲容容持祿內望作宰相久之不見用則謝賓客曰無以官散外我見屬吏輒先拜人人失望李錡反拜浙西節度使數月還爲國子祭酒進戶部尙書判度支元素少孤奉長姊謹悌及沒悲顛成疾

因辭職屏居其妻石泉公王方慶之孫前妻子皆不肖而元素溺姬侍王不見答元素久疾益昏蹙遂出之王訴諸朝詔免元素官且令畀王貲五百萬卒贈陝州大都督

盧士攻者山東人以文儒進端厚無競爲吏部員外郎善于職再遷知京兆尹劉總入朝與士攻故內姻乃請析瀛鄭兩州用士攻爲觀察使詔可俄而幽州亂朱克融襲之朝廷欲重其任就加節度使士攻室家貲助軍然部卒多家幽州陰導克融入故士攻闔府皆見囚幽州天子赦克融得還以太子賓客分司東都徐兖州刺史復爲賓客卒贈工部尙書

唐書卷一百四十七

唐書卷一百四十七考證

王思禮傳遷兵部尙書封霍國公○舊書遷戶部尙書

辛雲京傳授開府儀同三司加代州都督○舊書官至北京都知兵馬使代州刺史

盧羣傳少學于垂山○舊書少學于太安山

唐書卷一百四十七考證

唐書卷一百四十八

宋 端 明 殿 學 士 宋 祁 撰

列傳第七十三

令狐張康李劉田王牛史

令狐彰字伯陽京兆富平人其先自燉煌內徙父邊為世善吏始尉范陽通民家女生彰罷歸留彰母所
既長志膽沉果知書傳大義射命中從安祿山署左衛郎將與張通儒入長安又署左街使二京平走河
朔史思明署博滑二州刺史屯滑臺時中人楊萬定監滑州軍彰欲以節自顯募沒人夜度河悉籍士馬
州縣獻款因萬定以聞肅宗大悅下書慰勞彰移壁杏園渡思明疑之遣薛崱以兵劫彰諭眾以大誼
皆感附死力遂破崱兵潰圍出以麾下數百人朝賜甲第帷帳什器拜滑毫魏博節度使河朔平加兼御
史大夫封霍國公檢校尚書右僕射始滑當寇衝城邑墟榛彰躬訓吏下檢軍力農法令嚴無敢犯者田
疇大闢庫委豐餘歲時貢賦如期時吐蕃盜邊召防秋兵彰遣士三千自齋糧所過無秋毫犯供儼讓不
受時避其能然猜阻忤忍忤者輒死怒潁州刺史李帖遣姚爽代之戒曰不時代殺之帖知其謀因殺爽
死者百餘人奔汴州上書自言彰亦劾之河南尹張延賞畏彰留帖使故彰書先聞斥帖夷州殺之與魚

朝恩有隙及用事彰不敢入朝會母喪失明卒方疾甚敕子建通運歸東都私第悉上軍府兵仗財用簿最表吏部尚書劉晏工部尚書李勉堪大事請以自代代宗得表咨悼下詔褒美其門閭贈太傅建累官右龍武軍使德宗幸奉天建方肄士射遂以四百人從且殿擢行在中軍鼓角使左神武軍大將軍其妻成德節度使李寶臣女也建將棄之誣與門下客郭士倫通榜殺士倫而逐其妻士倫母痛憤卒寶臣請劾按無狀建會赦免帝取常膳錢五十萬葬士倫母子并恤其家俄起建爲右領軍大將軍復坐專殺以勳被貸坐妄自陳貶施州別駕卒贈右領軍大將軍又加贈揚州大都督憲宗時宰相李吉甫奏言彰將死籍上土地兵甲遺諸子還第彰同時河朔諸鎮傳子孫熏灼數代唯彰忠義奮發而長子建坐事幼子運無辜皆竄死今通幸存惟陛下用之因授贊善大夫時討蔡故連徙壽州團練使聞吉甫卒不自安每戰虛張首級則掩不奏露布上宰相武元衡郤之後爲賊攻焚屠聚破屯柵通大懼重墜不敢出詔金吾大將軍李文通宣慰將至遂代之貶昭州司戶參軍事久乃召爲右衛將軍給事中崔植還其制帝使喻植以彰有功不忍棄其嗣制乃下終左衛大將軍運爲東都留守將爲杜亞所陷流死歸州張孝忠字孝忠本奚種世爲乙失活酋長父謐開元中提衆納款授鴻臚卿孝忠始名阿勞以勇聞燕趙間共推張阿勞王沒諾干二人齊名沒諾干王武俊也孝忠魁偉長六尺性寬裕事親孝天寶末以善射

供奉仗內安祿山奏爲偏將破九姓突厥以功擢漳源府折衝祿山史思明陷河洛常爲賊前鋒朝議敗乃自歸授左領軍將軍以兵屬李寶臣累加左金吾衛將軍賜今名寶臣以其沉毅謹詳遂爲姻家易州諸屯委以統制十餘年威惠流聞田承嗣寇冀州寶臣付兵四千使出上谷屯貝丘承嗣見其軍整嚴歎曰阿勞在焉冀未可圖也卽焚營去寶臣與朱滔戰瓦橋奏孝忠爲易州刺史分精騎七千當幽州擢太子賓客封符陽郡王寶臣晚節稍忌刻殺大將李獻誠等而召孝忠孝忠不往復使其弟孝節召之孝忠復命曰諸將無狀連頸受戮吾懼禍不敢往亦不敢叛猶公不覲天子也孝節泣曰卽歸且僇死孝忠曰偕往則并命吾留無患也果不敢殺然寶臣素善孝忠及病不能語以手指北而死子惟岳擅立詔朱滔以幽州兵討之滔忌孝忠善戰慮師出爲己患使判官蔡雄往說曰惟岳孺子弄兵拒命吾奉詔伐罪公乃宿將安用助逆而不自求福也今昭義河東軍已破田悅而淮西軍下襄陽梁崇義尸出井中斬漢江上者五千人河南軍計日北首趙魏滅亡可見公誠去逆蹈順倡先歸國可以建不世功孝忠然之遣將程華報滔連和遣易州錄事參軍事董稷入朝德宗嘉之擢孝忠檢校工部尚書成德軍節度使令與滔并力孝忠子弟在恆州者皆死孝忠重德滔爲子茂和聘其女締約益堅敗惟岳於束鹿滔欲乘勝襲恆州孝忠乃引軍西北壁義豐滔疑之孝忠將佐諫曰尙書推赤心於朱司徒可謂至矣今逆賊已潰元功

不終後且悔之孝忠曰本求破賊賊已破矣而恆州多宿將追之則死闕緩之則改圖且滔言大而識淺可以慮始難與守成故吾堅壁于此以待賊之滅耳滔亦止屯束鹿月餘王武俊果斬惟岳以獻已而定州刺史楊政義以州降孝忠遂有易定時三分成德地詔定州置軍名義武以孝忠為節度易定滄等州觀察使後滔與武俊叛復遣蔡雄說之答曰吾既為唐臣而天性樸直業已效忠不復助惡矣吾與武俊少相狎然其心喜反覆不可信幸謝司徒志鄙言滔復啖以金帛皆不受易定介二鎮間乃浚溝壘修器械感厲將士乘城固守滔悉兵攻之帝詔李晟竄文場率師援孝忠滔解去遂全其軍孝忠因與晟結婚天子出奉天孝忠遣將楊榮國以銳卒六百佐晟赴難收京師興元初詔同中書門下平章事貞元二年河北蝗民餓死如積孝忠與其下同粗淡日膳裁豆譜而已人服其儉推為賢將明年檢校司空詔其子茂宗尚義章公主孝忠遣妻入朝執親迎禮賞資甚厚五年為將佐所惑以兵襲蔚州入之奉詔還鎮有司劾擅興削司空六年還其官卒年六十二追封上谷郡王贈太師諡曰貞武子茂昭茂宗茂和茂宗擢累光祿少卿左衛將軍元和中歷閑廐使初至德時西戎陷隴右故隴右監及七廐皆廢而閑廐私其地入寶應初始以其地給貧民茂宗恃恩奏悉收其賦又奏取麟游岐陽牧地三百餘頃民訴諸朝詔監察御史孫革按行還奏不可茂宗負左右助誣革所奏不實復遣侍御史范傳式覆實乃悉奪其田

長慶初岐大列訴下御史盡以其地還民寶麻初遷兗海節度使終左龍武統軍

茂和歷左武衛將軍裴度討蔡奏為都押衙茂和數以膽勇求自試謂度無功辭不行度請斬之以令軍憲宗曰予以其家忠且孝為卿遠斥後終諸衛將軍

茂昭本名昇雲德宗時賜今名字豐明少沉毅頗通書傳孝忠時累擢檢校工部尚書孝忠卒帝拜邕王諒為義武軍節度大使以茂昭為留後封延德郡王後二年為節度使弟昇璘薄王武俊為人座上媢罵武俊怒襲義豐安喜無極掠萬餘人茂昭嬰城遣人厚謝乃止久之入朝為帝從容言河朔事帝竦聽曰恨見卿晚召宴麟德殿賜良馬甲第器幣優具詔其子克禮尚晉康郡主帝方倚之經置北方會崩故茂昭每入臨輒哀不自勝順宗立進同中書門下平章事復遣之鎮賜女樂二人固辭車至第門茂昭引詔使辭曰天子女樂非臣下所宜見昔汾陽咸寧西平北平皆有大功故當是賜今下臣述職以朝奈何濫賞後日有立功之臣陛下何以加之復賜安仁里第亦讓不受憲宗元和二年請朝五奏乃聽願留不許加兼太子太保既還王承宗叛詔河東河中振武義武合軍為恆州北道招討茂昭治廩廩列亭候平易道路以待西平軍承宗以騎二萬踰木刀溝與王師薄戰茂昭躬擐甲為前鋒令其子克讓從子克儉與諸軍分左右翼繞賊大敗之承宗幾危會有詔班師加檢校太尉兼太子太傅乃請舉宗還朝表數上帝

乃許北鎮遺客間說皆不納詔左庶子任迪簡爲行軍司馬乘驛往代茂昭奉兩州符節管鑰圖籍歸之先敕妻子上道戒曰吾使而曹出易庶後世不爲汙俗所染未半道迎拜兼中書令充河中晉絳慈隰節度使至京師雙日開延英對五刻罷又表遷墳墓于京兆許之明年疽發於首卒年五十冊贈太師諡曰獻武帝思其忠擢諸子皆要職歲給絹二千匹少子克勤開成中歷左武衛大將軍有詔賜一子五品官克勤以息幼推與其甥吏部員外郎裴夷直劾曰克勤孰有司法引庇它族開後日賣爵之端不可許詔聽遂著于令夷直字禮卿亦婁第進士歷右拾遺累進中書舍人武宗立夷直視册牒不肯署乃出爲杭州刺史斥驩州司戶參軍宣宗初內徙復拜江華等州刺史終散騎常侍

陳楚者茂昭甥也字材卿定州人有武幹事茂昭歷牙將常統精卒從征茂昭入朝擢諸衛大將軍封普寧郡王元和末義武節度使渾鎬喪師定州亂拜楚爲節度使馳傳赴軍及郊無迎者左右勸無入楚曰定軍不來迎以試我今不入正墮計中乃冒雪行四十里夜入其州然軍校部伍皆楚舊也由是衆心乃定徙河陽三城入爲左羽林統軍檢校司空卒年六十一贈司空子君奕亦至鳳翔節度使

康日知靈州人祖植當開元時縛康待賓平六胡州玄宗召見擢左武衛大將軍封天山縣男日知少事李惟岳擢累趙州刺史惟岳叛日知與別駕李濯及部將百人啐牲血共盟固州自歸惟岳怒遣先鋒兵

馬使王武俊攻之日知使客謝武俊曰賊辱甚安足共安危哉吾城固土和雖引歲未可下且賊所恃者田悅耳悅兵血讎邢塚可俘不能殘半堞况吾城之完乎又給爲臺檢示曰使者齋詔喻中丞中丞奈何負天子從小兒跳梁哉武俊悟引兵還斬惟岳以獻德宗美其謀擢爲深趙觀察使賜寶封戶二百會武俊拒命遣將張鍾葵攻趙州日知破之上俘京師興元元年以深趙益成德徙日知奉誠軍節度使又徙晉絳加累檢校尙書左僕射封會稽郡王貞元初卒贈太子太師

子志睦字得衆資趨偉工馳射隸右神策軍遷累大將軍討張韶以多兼御史大夫進平盧軍節度使李同捷反放兵略千乘志睦挫其銳不得逞遂下蒲臺盡奪其械加檢校尙書左僕射徙涇原封會稽郡公卒年五十七贈司空

子承訓字敬辭推門功進累左神武軍將軍宣宗擢爲天德軍防禦使軍中馬乏虜來戰數負承訓罷冗費市馬益軍軍乃奮張始党項破射鵬軍洛源鎮悉俘其人聞承訓威政皆還俘不敢警詔檢校工部尙書封會稽縣男擢義武節度會南詔破安南詔徙嶺南西道城邕州合容管經略使隸之遂統諸軍行營兵馬南詔深入承訓分兵六道出以掩轡戰不利士死十八唯天平卒二千還屯閩軍震於是節度副使李行素完城不出南詔圍之四日或請夜出兵襲蠻承訓意索不聽天平裨將陰募勇兒三百夜縋燒蠻

屯斬首五百南詔恐明日解而去承訓謬言大破賊告于朝羣臣皆賀加檢校尚書右僕射籍子弟爛呢
冒賞而士不及怨言囓流嶺南東道節度使韋宙白狀宰相承訓慙移疾授右武衛大將軍分司東都咸
通中南詔復盜邊武靈兵七百戍桂州六歲不得代列校許信趙可立因衆怒殺都將詣監軍使丐糧鎧
北還不許卽擅斧庫劫戰械推糧料判官龐勛爲長勒衆上道懿宗遣中人張敬思部送詔本道觀察使
崔彥曾慰安之次潭州監軍詭奪其兵勛畏必誅募舟循江下益哀兵招亡命收銀刀亡卒贖匿之及徐
城謀曰吾等叩城大呼衆必應前日賞糴五十萬可得也衆喜牙健趙武等欲亡勛斬首送彥曾曰此搖
亂者彥曾不能詰助怨都押衙尹戡教練使杜璋兵馬使徐行儉又使白彥曾曰士負罪不敢釋甲請爲
二屯且白退戡等府屬温廷皓謂彥曾曰勛擅委戍一可殺專戍大將二可殺私置兵三可殺士不子弟
卽父兄振袂而唱內外必應銀刀亡命復在其中四可殺請分兩營脅去三將五可殺彥曾謂然乃禱靈
黃堂前選兵三千授都虞候元密屯任山須勛至劫取之遣邏子羸服覬賊比暮勛至捕故者知其謀卽
竊偶人刺虛幟而詭路襲符離密久乃寤回屯城南勛與宿將喬翔戰睢河翔大敗攝太守焦璐遁去勛
入據州自稱兵馬留後初璐決汴水絕勛北道水未至勛度比密兵攻宿水大至涉而傳城不克攻勛劫
百艘運糧趨泗州留婦弱持陔翌日密覺追之士未食賊伏兵于舟而陣汴上軍見密皆走密追躡伏發

夾攻之密敗衆殲遂入徐州囚彥曾及官屬殺尹戡等又徇下邳漣水宿遷臨淮斬虹諸縣皆下遣僞將
屯柳子屯豐屯滕屯沛屯蕭以張其軍乃露章求節度使有周重者隱濠泗間號有謀助迎爲上客問策
所出因教助赦囚徒據揚州北收兗鄆西舉汴宋東掠青齊拓境大河食敖倉可以持久勛無雄才不納
僞將劉行及攻濠州執刺史盧望回自稱刺史帝遣中人康道隱宣尉徐州勛郊迎旗鎧矛戟亘三十里
使騎鳴鑼角聲動山谷置酒毬場引道隱閱其衆給爲賊來降六十人宴戮平民上首級夸勝道隱還固
求節度卽殘魚臺金鄉碭山單父十餘縣斬官吏出金帛募兵游民多從之帝乃拜承訓檢校尚書右僕
射義成軍節度使徐泗行營都招討使以神武大將軍王晏權爲武靈軍節度使北面行營招討使羽林
將軍戴可師爲南面行營招討使率魏博鄆延義武鳳翔沙陀吐渾兵二十萬討之勛好鬼道有言漢高
祖廟夜聞兵人馬流汗勛日往請命巫言毬場有隱龍得之可戰勝勛大役徒鑿地不能得賊將李圓劉
信攻泗歐宗丁從實分徇舒廬壽沂海諸道兵屯海州度賊至作機橋維以長絙賊半度絙絕半溺死度
者不得戰殲之賊別取和州破沐陽下蔡烏江巢諸縣揚州大恐民悉度江淮南節度使令狐綯移書陳
禍福許助求節度勛按甲聽命淮南合宣潤兵戍都梁山勛夜度淮遂躡薄壘賊將劉行立王弘立與勛
合敗淮南將李湘屯淮口劫盱眙帝又詔將軍宋威與淮南并力承訓屯新興賊挑戰時諸道兵未集承

訓帳下纒萬人退壁宋州助益驕光蔡鉅賊陷滁州殺刺史高錫望應勛戴可師引兵三萬奪淮口圍勛都梁山下降其衆可師恃勝不戒弘立以兵襲之可師不克陣而潰士溺淮死逸者數百人賊取可師首傳徐州詔以馬士舉爲淮南節度使南面行營諸軍都統馳傳入揚州士舉曰城堅士多賊何能爲衆稍安始帝以晏權故智興子節度武靈欲以怖賊及是返爲賊困不敢戰乃更以隴州刺史曹翽爲兗海節度北面都統招討使屯滕沛魏博將薛尤屯蕭豐賊首孟敬文欲絕勛自立陰刻鏐爲文曰天口云云錫爾將軍夜瘞之野耕者得之以獻衆駭異乃齋三日受之勛知其謀使人襲殺之於是承訓屯柳子右夾汴築壘連屬一舍勛籍城中兵止三千劫民授甲皆穿窟穴遁去王弘立度睢園新興鹿塘承訓縱沙陀騎躡之弘立走土赴水死自鹿塘屬襄城伏尸五十里數首二萬獲器鎧不貲承訓攻柳子姚周度水戰又敗乘風火賊周提餘卒去沙陀躡之及芳亭死者枕藉斬劉豐而周以十騎走宿州守將斬之助懼乃害崔彥會等謂其下曰上不許我節度與諸君真反矣大索兵得三萬許佶趙可立勸勛稱天冊將軍勛謁漢高祖廟受命以其父舉直爲大司馬守徐州或曰方大事不可私于父失上下序舉直乃拜于廷勛坐受之引兵救豐刻木作婦人衣絳被髮軍過斫而火之乃行勛夜入城外不知勛出銳軍擊援屯魏博軍知勛自將驚而潰賊以所得送徐州以夸下曹翽退保兗州勛欲乘勝攻承訓或曰今北兵敗西軍搖

不足虞也方蠶月宜息衆力農至秋士馬彊決可以取勝舉直曰時不重得願將軍無縱敵勛曰然時承訓方攻臨渙聞勛計追還兵仗以待勛軍皆市人鬻而狂未陣卽奔相蹈藉死者四萬勛釋甲服垢襦脫收夷痕士三千以歸遣張行實屯第城馬士舉救泗州賊解去進攻賊濠州是時又詔黔中觀察使秦匡謀討賊下招義鍾離定遠勛遣吳迴屯北津援濠士舉銳兵度淮盡碎其營初勛之遁懼衆不軍妄言有神諱野中曰天符下國兵休勛使下相語符未降故敗北津帝恨魏博軍不勝以宋威爲西北面招討使率兵三萬屯蕭豐約勛降者當赦之始宿鄙人劉洪者被黃袍白馬使人封檄叩觀察府曰我當王徐崔彥會斬之遺黨匿山谷欲附勛承訓喻降之王師破臨渙斬萬級收襄城留武小睢諸壁曹翽下滕賊將以漸沛降賊李直奔入徐州翔又破豐徐城下邳賊益感勛以張玄稔守宿州張儒劉景助之自稱統軍列壁相望承訓拔第城張行實奔宿州承訓遂圍宿州行實教勛官軍盡銳于此西鄙虛單將軍直擣宋毫出不意宿圍自解勛喜引而西使舉直許佶守徐承訓攻敗十遇皆勝遣辯士以威動玄稔玄稔賊重將也以帛書射城外約誅勛自歸使張臯獻期俄與二將會柳溪伏士於旁玄稔馳騎諱曰庸勛首已梟僕射竊矣伏與斬劉景張儒玄稔率諸將肉袒見承訓自陳陷賊不早奮久暴王師願禽賊贖死承訓許之復請詐爲潰軍劫符離符離不知內之已入卽斬守將得兵萬人北攻徐州許佶等不敢出玄稔環城

彥曾故吏路審中啟白門內玄稔兵許信等啟北門走玄稔身追之士大崩皆赴水死斬舉直許信李直等收叛卒親族悉夷之助聞徐已拔氣喪無顧賴衆尙二萬自石山而西所在焚掠承訓悉兵八萬逐北沙陀將朱邪赤裏急追至宋州助焚南城爲刺史鄭處冲所破將南趨亳承訓兵循渙而東賊走斬縣官兵斷橋不及濟承訓乃縱擊之斬首萬級餘皆溺死閱三日得助尸斬其子於京師吳迥守濠州糧盡食人驅女孺運薪塞隍并填之整旅而行馬士舉斬以獻助之始得徐州貨儲蕩然乃四出剽取男子十五以上皆執兵舒鉏鉤爲兵號霍雖破十餘州凡二歲滅詔擢張玄稔右驍衛大將軍承訓選檢校左僕射同中書門下平章事徙節度河東於是宰相路巖韋保衡劾承訓討賊逗撓貪虜獲不時上功貶蜀王傅分司東都再貶恩州司馬僖宗立授左千牛衛大將軍卒年六十六子傳業嘗從父征伐終鄜坊節度使李洧者淄青節度使正己從父兄也始署徐州刺史建中初正己卒子納叛攻宋州洧挈州自歸加兼御史大夫封潮陽郡王實封戶二百充招諭使初洧遣巡官崔程入朝且白宰相徐州不足獨抗賊得海沂爲節度可與成功洧素與二州刺史有約且不肯爲賊守程先咨張鎰而盧杞怒不先白故洧請中格及納攻徐劉玄佐與諸將擊退之既賊方張乃加洧海沂密觀察使時海密爲賊守不受命洧未有以取之遷檢校戶部尙書會疽發背少間肩輿過市市人叫歡洧驚疽潰卒贈尙書左僕射以洧將高承宗代

之其弟淡險人也耻居下陰約納攻徐爲內應并說滕將翟濟濟執以聞擢濟沂州刺史召淡入京師以洧赦不罪

劉澶蘆龍節度使怱之次子濟母弟也涉書史有材武好施愛士能得人死力始事朱滔常陳君臣大分裁抑其凶及怱得幽州不三月病且死澶侍湯液未嘗離輒以父命召濟於莫州濟嗣總軍事故德澶之讓以爲瀛州刺史有如一諱許代已久之濟自用其子爲副大使澶不能無恨因請以所部爲天子戍隴悉發其兵千五百馳歸京師無一卒敢違令者德宗甚寵之拜秦州刺史屯普潤軍中不設音樂士卒病親存問所欲不幸死哭之憲宗立方士羅合則詣澶營妄言廢立以動澶命繫之辭曰吾之黨甚衆公無囚我約大行梓宮發兵無不濟澶械送闕下殺之錄功號其軍曰保義蕃戎畏懼不敢入寇常愾然有復河湟志屢爲朝廷言之未見省封累彭城郡公及病籍士馬求代既還卒于道年四十九贈尙書右僕射諡曰景

田弘正字安道父廷玠尙儒學不樂軍旅與承嗣爲從昆弟仕爲平舒丞遷樂壽清池束城河間四縣令以治稱遷滄州刺史李寶臣朱滔與承嗣不協合兵圍滄州廷玠固守連年食雖盡無叛者朝廷嘉其節徙相州承嗣盜磁相廷玠無所回染及悅代立忌廷玠之正召爲節度副使廷玠至讓悅曰而承伯父緒

業當守朝廷法度以保富貴何苦與恆郢爲叛臣自兵興來叛天子能完宗族者誰邪而志不悛蓋殺我無令我見田氏血汗人刀也遂稱疾不出悅過謝之杜門不納憤而卒弘正幼通兵法善騎射承嗣愛之以爲必興吾宗名之曰興季安時爲衛內兵馬使同節度副使封沂國公季安侈汰銳殺罰弘正從容規切軍中賴之翕然歸重季安內忌出爲臨清鎮將欲因罪誅之弘正陽瘠臥家不出乃免季安死子懷諫襲節度召還舊職懷諫委政於家奴蔣士則措置不平衆怒咸曰兵馬使吾帥也牙兵卽詣其家迎之弘正拒不納衆譁于門弘正出衆拜之脅還府弘正頓于地度不免卽令于軍曰爾屬不以吾不肖使主軍今與公等約能聽命否皆曰惟公命因曰吾欲守天子法舉六州版籍請吏于朝苟天子未命敢有請吾旗節者死殺人及掠人者死皆曰諾遂到府殺士則及支黨十餘人於是圖魏博相衛員潭之地籍其入以獻不敢署僚屬而待王官先時諸將出屯質妻子里民不得相往來弘正悉除其禁聽民通饋謝慶弔服玩僭侈者卽日徹毀之承嗣時正寢華顯弘正避不敢居更就採訪使堂皇聽事幽恆鄆蔡大懼遣客鑄說鉤染弘正皆拒遣之憲宗美其誠詔檢校工部尚書充魏博節度使又遣司封郎中知制誥裴度宣慰資其軍錢百五十萬緡六州民給復一年赦見囚存問高年憚獨廢疾不能自存者度明辯具陳朝廷厚意弘正不覺自失乃深相結納奉上益謹復請度徧行其部宣示天子恩詔因令節度僉謀布衣崔

懷奉表陳謝且言天寶以來山東輿壤化爲戎墟官封世襲刑賞自出國家含垢垂六十年臣若假天之齡奉陛下宸算冀道揚太和洗濯僞風然後退歸丘園避賢者路死不恨制詔褒答且賜名錫與躡塗天子討蔡弘正遣子布以兵三千進戰數有功李師道疑其襲己不敢顯助蔡故元濟失援王師得致誅焉王承宗叛詔弘正以全師壓境破其衆南宮承宗懼歸窮於弘正弘正表諸朝遂獻德棣二州以謝納二子爲質俄而李師道拒命詔弘正與宣武等五節度兵進討弘正自揚劉度河距鄆四十里堅壁師道大將劉悟率精兵屯河東戰陽穀再遇再北斬萬餘級賊勢感悟乃反兵斬師道首詣弘正降取十有二州以獻初悟旣平賊大張飲軍中凡三日設角觝戲引魏博使至廷以爲歡悟盱衡攘臂助其決坐中皆憚悟勇客有白弘正者弘正曰鄆士疲於戰瘡者未起悟當卹亡弔之慰士大夫心奈何取快目前邪吾奉詔按軍伺悟去就今知其無能爲也旣而詔悟爲義成軍節度使狼狽上道時稱知悟之明以功加弘正檢校司徒同中書門下平章事是歲來朝對麟德殿眷勞殊等引見僚佐將校二百餘人皆有班賜進兼侍中寶封戶三百擢其兄融爲太子賓客東都留司弘正數上表固請留闕下帝勞曰昨韓弘以疾辭不就軍朕旣從之矣今卿復爾我不應違但魏人樂卿之政四鄰畏卿之威爲朕長城又安用辭弘正遂還常欲變山東承襲舊風故悉遣子姓仕朝廷帝皆擢任之朱紫滿門榮冠當時穆宗立王承元以成德

軍請帥帝詔弘正兼中書令爲節度使弘正以新與鎮人戰有父兄怨取魏兵二千自衛入其軍時天子賜錢一百萬緡不時至軍有怨言弘正親加撫喻乃安仍請留魏兵爲紀綱以持衆心度支崔儉吝其粟沮卻之長慶元年七月歸衛卒於魏是月軍亂并家屬將吏三百餘人皆遇害年五十八帝聞震悼冊贈太尉諡曰忠愍弘正幼孤事融甚謹軍中嘗分曹習射弘正注矢聯中融退扶怒之故當季安猜暴時能自全及爲軍中推迫融不悅曰爾竟不自晦取禍之道也朝廷知其友愛詔拜相州刺史賜金紫不欲其相遠也弘正性忠孝好功名起樓聚書萬餘卷通春秋左氏與賓屬講論終日客爲著沂公史例行于世弘正之禍也其判官劉茂復獨免士相戒曰是人議事盡忠遇吾等信敢干其家者共殺之弘正子布翠

布字敦禮幼機悟弘正戍臨清布知季安且危密白父請以衆歸朝弘正奇之及得魏使布總親兵王師誅蔡以軍隸嚴綬屯唐州帝以布大臣子或有罪且撓法弘正請以董晚代而士卒愛布願留帝乃止凡十八戰破凌雲柵下鄆城以功授御史中丞裴度輕出觀兵沔口賊將董重質以奇兵掩擊布伏騎數百突出薄之諸軍繼至賊驚引還蔡平入爲左金吾衛將軍諫官嘗論事帝前同列將廢卻之布止曰使天子容直臣毋輕進弘正徙成德以布爲河陽節度使父子同日受命時韓弘與子公武亦皆領節度而天

下以忠義多田氏布所至必省冗將募戰卒寬賦勸糶人皆安之長慶初徙涇原弘正遇害魏博節度使李愬病不能軍公卿議以魏疆而鎮弱且魏人素德弘正以布之賢而世其官可以成功穆宗遽召布解纜拜檢校工部尚書魏博節度使乘傳以行布號泣固辭不聽乃出伎樂與妻子賓客決曰吾不還矣未至魏三十里跣行被髮號哭而入居墜室屏節旄凡將士老者兄事之祿奉月百萬一不入私門又發家錢十餘萬緡頒士卒以牙將史憲誠出麾下可任乃委以精銳時中人屢趣戰而度支饋餉不繼布輒以六州租賦給軍引兵三萬進屯南宮破賊二壘於是朱克融據幽州與王廷湊脣齒河朔三鎮舊連衡築鷲自私而憲誠著異志陰欲乘釁又魏軍驕悍格戰會大雪師寒糧乏軍中謗曰它日用兵團粒米盡仰朝廷今六州刮肉與鎮冀角死生雖尚書瘡已肥國魏人何罪憲誠得間因以搖亂會有詔分布軍合李光顏救深州兵怒不肯東衆遂潰皆歸憲誠唯中軍不動布以中軍還魏明日會諸將議事衆譁曰公能行河朔舊事則生死從公不然不可以戰布度衆且亂歎曰功無成矣卽爲書謝帝曰臣觀衆意終且負國臣無功不敢忘死願速救元翼母使忠臣義士塗炭於河朔哭授其從事李石訖乃入至几筵引刀刺心曰上以謝君父下以示三軍言訖而絕年三十八贈尚書右僕射諡曰孝子鐵宣宗時厯銀州刺史坐以私鑿易邊馬論死宰相崔鉉奏布死節於國可貸鐵以勸忠烈故貶爲州司馬

韋會昌中歷蔡州刺史坐贓且抵死兄肇聞之不食卒宰相李德裕奏漢河間人尹次穎川人史玉坐殺人當死次兄初玉母渾詣官請代因緘物故於時皆赦其死於是武宗詔減死一等

牟寬厚明吏治爲神策大將軍開成初鹽州刺史王宰失羌人之和詔牟代之累遷鄜坊節度使再徙天平三爲武靈一爲靈武軍官至檢校尚書左僕射卒諸子皆有方面功以忠義爲當世所高

王承元者承宗弟也有沈謀年十六勸承宗亟引兵共討李師道承宗少之不用然軍中往往指目之承宗死未發喪大將謀取帥它姓參謀崔燧與諸校計以祖母涼國夫人李命承元嗣承元泣且拜不受諸將半請承元曰上使中貴人監軍盍先請監軍至又如命乃謝曰諸君不忘王氏以及孺子苟有令其從我乎衆曰惟所命乃視事牙閫之偏約左右不得稱留後事一關參佐密表請帥于朝穆宗詔起居舍人柏耆宣慰授承元檢校工部尚書義成軍節度使北鎮以兩河故事脅誘承元不納諸將皆悔者至士哭于軍承元令曰諸君不欲我去意固善雖然格天子詔我獲罪奈何前李師道有詔赦死欲舉族西諸將止弗遣他日乃共殺之今君等幸置我無與師道比乃徧拜諸將將語塞承元卽出家資盡賜之斬不從命者十輩軍乃定於是諫議大夫鄭覃宣慰賜其軍錢百萬緡赦囚徒問孤獨廢疾不能自存者粟帛有差承元去鎮左右裏器幣自隨承元使空褚母留入朝昆弟拜刺史者四人位于朝者四十人祖母入

見帝命中宮禮賚異等徙承元鄜坊丹延節度俄徙鳳翔鳳翔右表涇原地平少巖險吐蕃數入盜承元據勝地爲鄆置守兵千詔號臨汧城府郭左百賈州聚異時爲虜剽斂至燿烽相警承元版堞緣之人乃告安以勞封岐國公大和初祖母喪詔曰武俊當橫流時拯定奔潰功在史官今李不幸贈卹宜加厚且給儀仗以葬五年徙節平盧淄青始鹽禁未嘗行兩河承元請歸有司由是竟鄆諸鎮皆奉法承元資仁裕所至愛利卒年三十三贈司徒

牛元翼趙州人材果而謀王承宗時倚其計爲疆雄與傅良弼二人冠諸將王廷湊叛穆宗以元翼在成德名出廷湊遠甚自深州刺史擢爲深冀節度使以攜其軍廷湊怒遣部將王位以銳兵攻元翼不勝乃合朱克融共圍之詔進元翼成德軍節度使以宣武兵五百進援元翼固守長慶二年詔赦廷湊罪徙元翼山南東道以深州賜廷湊使中人促元翼南廷湊恨之已受詔兵不解招討使裴度詣書誚讓克融解而歸廷湊退舍詔並加檢校工部尚書兩悅之淹月元翼率十餘騎冒圍跳德棣朝京師廷湊入盡殺元翼親將臧平等百八十人元翼見延英資問優縟命中人楊再昌取其家并迎田弘正喪廷湊辭以弘正殯亡在所元翼家須臾遣魏博節度使史憲誠遣其弟入趙四返說廷湊曰田公非得罪於趙尸尙何惜元翼去深州乃一孤將何利其家廷湊乃歸弘正喪于京師元翼聞平等死憤恚卒悉還所賜于朝廷湊

遂夷其家

良弼字安道清河人以射冠軍中初瀛之博野樂壽介范陽成德間每兵交先薄二城故常爲劇屯德宗以王武俊破朱滔功皆隸成德故以良弼守樂壽李寶守博野廷湊之叛兩賊交誘之而堅壁爲國固守有詔以樂壽爲左神策行營拜良弼爲都知兵馬使寶所領士隸右神策號忻州營亦以寶爲都知兵馬使賜第京師俄以良弼爲沂州刺史良弼率衆出戰力乃得去寶引兵三千趨忻州廷湊邀之寶斬三百級追者不敢前天子以良弼寶忠有狀乃更賜奴婢服馬召良弼爲左神策軍將軍寶麻初擢夏綬銀節度使異時蕃帳亡命來者必償馬乃與良弼至皆執付其部曾種歡懷終橫海節度使寶擢累保義軍節度使王智興討李同捷未克而烏重胤卒謂寶可共立功請諸朝乃授橫海節度使師所過暴鈔至屯按軍不進遂身入朝盛陳賊勢請濟師欲大調發羣臣議寶兵太重且盜滄景未決而棣州平寶內愧不自安願留京師遂罷保義軍忻州營更授夏綬有節度使卒寶再易鎮治無可言者然廷湊之亂聯軍十五萬無成功賊鋒不可嬰而樂壽博野截然時中者累歲梗其吞暴議者以爲難敬宗世寶圖其事上之史孝章字得仁資修謹父憲誠以戰力奮賓客用挽彊擊劍相矜孝章獨退讓如諸生稱道皆詩書魏博節度使李愬闔大將子弟籍于軍孝章願以文署職愬奇之檄試都督府參軍憲誠得魏遷士曹參軍孝

章見父數奸命內非之承間諫曰大河之北號富疆然而挺亂取地天下指河朔若夷狄然今大人身封侯家富不貲非痛洗漑竭節事上恐吾踵不旋禍且至因涕下沾衿父矚武不盡聽文宗賢之授孝章節度副使累遷檢校左散騎常侍父欲助李同捷孝章切爭憲誠稍憚其義又勸出師討同捷自明帝益嘉之進檢校工部尙書及兵出父敕孝章統之入朝勞予蕃厚憲誠亦上書求覲帝知非憲誠意特緣孝章悟發故分相衛澶而授孝章節度使未至魏人亂父卒死于軍帝念史氏禍而卹孝章故奪喪拜右金吾衛將軍徙節度鄜坊進檢校戶部尙書久之自邠靈以病丐還卒于行年三十九贈尙書右僕射孝章本名唐後改今名

憲誠弟憲忠字元貞少爲魏牙門將田弘正討齊蔡常爲先鋒闔三十戰中流矢酣鬪不解由是著名憲誠表爲貝州刺史魏亂奔京師加累檢校右散騎常侍隴州刺史增亭鄣徙客館于外戎謀無所伺會昌中築三原城吐蕃因之數犯邊拜憲忠涇原節度使以怖其侵吐蕃遣使來請墮城且願以嘗殺使者之人置塞上憲忠使謝曰前吾未城爾犯我地安得禁吾城爾知殺吾使爲負宜先取罪人謝我將無所不得今與爾約前節度使事一置之吐蕃情得而服憲忠疏涇于隍積緡錢十萬粟百萬斛戍人宜之會党項羌內寇又徙朔方有詔馳驛赴屯憲忠辭曰羌不得其心故不自安今亟往知吾爲備闕益健請徐行

許之乃移書與羌人示要約羌人乃皆喜奉酒湏迎道大中初突厥擾河東鈔漕米行賈徙節振武軍于是故帥荒沓使游奕兵覘戎有良馬牛彊取之歸直十一戎人怒因興盜掠憲忠廉儉少所欲嘗曰吾居河朔去此二千里乃乘五健馬今守邊發吾餘奉不患無馬何忍豪市哉故所至莫不懷德累封北海縣子檢校尚書左僕射兼金吾大將軍以病自丐改左龍武統軍卒年七十一贈司空

唐書卷一百四十八

唐書卷一百四十八考證

令狐彰子建其妻成德節度使李寶臣女也建將棄之誣與門下客郭士倫通○舊書作誣與備教生邢

士倫姦通

張孝忠子茂昭憲宗元和二年請朝○舊書本紀作元年

唐書卷一百四十八考證

唐書卷一百四十九

宋 端 明 殿 學 士 宋 祁 撰

列傳第七十四

劉第五班王李

劉晏字士安曹州南華人玄宗封泰山晏始八歲獻頌行在帝奇其幼命宰相張說試之說曰國瑞也即授太子正字公卿邀請旁午號神童名震一時天寶中累調夏令未嘗督賦而輸無逋期舉賢良方正補温令所至有惠利可紀民皆刻石以傳再遷侍御史祿山亂避地襄陽永王璘署晏右職固辭移書房瑄論封建與古異今諸王出深宮一旦望桓文功不可致詔拜度支郎中兼侍御史領江淮租庸事晏至吳郡而璘反乃與採訪使李希言謀拒之希言假晏守餘杭會戰不利走依晏晏為陳可守計因發義兵堅壁會王敗欲轉略州縣聞晏有備遂自晉陵西走終不言功召拜彭原太守徙隴華二州刺史遷河南尹時史朝義盜東都乃治長水進戶部侍郎兼御史中丞度支鑄錢鹽鐵等使京兆尹鄭叔清李齊物坐殘孽罷詔晏兼京兆尹總大體不苛號稱職會司農卿嚴莊下獄已而釋誣劾晏漏禁中語宰相蕭華亦忌之貶通州刺史代宗立復為京兆尹戶部侍郎領度支鹽鐵轉運鑄錢租庸使晏以戶部讓顏真卿改國

子祭酒又以京兆讓嚴武卽拜吏部尙書同中書門下平章事使如故坐與程元振善罷爲太子賓客俄兼御史大夫領東都河南江淮轉運租庸鹽鐵常平使時大兵後京師米斗千錢禁膳不兼時旬農授穗以輸晏乃自按行浮淮泗達於汴入于河右循底柱硤石觀三門遺迹至河陰鞏洛見宇文愷梁公堰厯河爲通濟渠視李傑新堤盡得其病利然畏爲人牽制乃移書於宰相元載以爲大抵運之利與害各有四京師三輔苦稅入之重淮湖粟至可減徭賦半爲一利東都彫破百戶無一存若漕路流通則聚落邑塵漸可還定爲二利諸將有不廷戎虜有侵盜聞我貢輸錯入軍食豐衍可以震耀夷夏爲三利若舟車旣通百貨雜集航海梯嶠可追貞觀永徽之盛爲四利起宜陽熊耳虎牢成阜五百里見戶纔千餘居無尺椽爨無盛煙獸游鬼哭而使轉車輓漕功且難就爲一病河汴自寇難以來不復穿治崩岸滅木所在淤涉泗千里如罔水行舟爲二病東垣底柱澗池北河之間六百里戍邏久絕奪攘姦宄夾河爲藪爲三病淮陰去蒲坂亘三千里屯壁相望中軍皆鼎司元侯每言衣無縑食半菽輓漕所至輒留以饋軍非單車使者折簡書所能制爲四病載方內擅朝權旣得書卽盡以漕事委晏故晏得盡其才歲輸始至天子大悅遣衛士以鼓吹迎東渭橋馳使勞曰卿朕鄼侯也凡歲致四十萬斛自是關中雖水旱物不翔貴矣再遷吏部尙書又兼益湖南荆南山南東道轉運常平鑄錢使與第五琦分領天下金穀又知吏部三

銓事推處最嚴分明下皆懼伏元載得罪詔晏鞠之晏請載黨盛不可獨訊更敕李涵等五人與晏雜治王縉得免死晏請之也常衰執政忌晏有公望乃言晏舊德當師長百僚用爲左僕射實欲奪其權帝以計務方治詔以僕射領使如舊初晏分置諸道租庸使慎簡臺閣士專之時經費不充停天下攝官獨租庸得補署且數百人皆新進銳敏盡當時之選趣督倚辦故能成功雖權貴干請欲假職仕者晏厚以稟入奉之然未嘗使親事是以人人勸職嘗言士有爵祿則名重於利吏無榮進則利重於名故檢劾出納一委士人吏惟奉行文書而已所任者雖數千里外奉教令如目前頻伸諧戲不敢隱惟晏能行之它人不能也代宗嘗命考所部官吏善惡刺史有罪者五品以上輒繫劾六品以下杖然後奏李靈耀反河南節帥或不奉法擅征賦州縣益削晏常以羨補乏人不加調而所入自如第五琦始權鹽佐軍興晏代之法益密利無遺入初歲收緡錢六十萬末乃什之計歲入千二百萬而權居太半民不告勤京師鹽暴貴詔取三萬斛以贖關中自揚州四旬至都人以爲神至湖嶠荒險處所出貨皆賤弱不償所轉晏悉備淮楚間買銅易薪歲鑄緡錢十餘萬其措置纖悉如此諸道巡院皆募驍足置驛相望四方貨殖低昂及它利害雖甚遠不數日卽知是能權萬貨重輕使天下無甚貴賤而物常平自言如見錢流地上每朝謁馬上以鞭算質明視事至夜分止雖休澣不廢事無閑劇卽日剖決無留所居脩行里粗樸庫陋飲食儉狹

室無媵婢然任職久勢軋宰相要官華使多出其門自江淮茗橘珍甘常與本道分貢競欲先至雖封山斷道以禁前發晏厚貲致之常冠諸府由是媚怨益多饋謝四方有名士無不至其有口舌者率以利啖之使不得有所訾短故議者頗言晏任數固恩大庠時政因循軍國皆仰晏未嘗檢質德宗立言者屢請罷轉運使晏亦固辭不許又加關內河東三川轉運鹽鐵及諸道青苗使始楊炎爲吏部侍郎晏爲尙書盛氣不相下晏治元載罪而炎坐貶及炎執政銜宿怒將爲載報仇先是帝居東宮代宗寵獨孤妃而愛其子韓王宦人劉清潭與嬖幸請立妃爲后且言王數有符異以搖東宮時妄言晏與謀至是炎見帝流涕曰賴祖宗神靈先帝與陛下不爲賊臣所間不然劉晏黎幹搖動社稷凶謀果矣今幹伏辜而晏在臣位宰相不能正其罪法當死崔祐甫曰陛下已廓然大赦不當究飛語致人於罪朱泚崔靈力相解釋靈尤切至炎怒斥靈于外遂罷晏使坐新故所交簿物抗謬貶忠州刺史中官護送炎必欲傅其罪知庾準與晏素憾乃擢爲荆南節度使準即奏晏與朱泚書語言怨望又蒐卒擅取官物脅詔使謀作亂炎證成之建中元年七月詔中人賜晏死年六十五後十九日賜死詔書乃下且暴其罪家屬徙嶺表坐累者數十人天下以爲冤時炎兼刪定使議籍沒衆論不可乃止然已命簿錄其家唯雜書兩乘米麥數斛人服其廉淄青節度使李正己表誅晏大暴不加驗實先誅後詔天下駭惋請還其妻子不報興元初帝寢寤

乃許歸葬貞元五年遂擢晏子執經爲太常博士宗經祕書郎執經還官求追命有詔贈鄆州刺史又加司徒晏歿二十年而韓洄元瑒裴腆李衡包佶盧徵李若初繼掌財利皆晏所辟用有名於時晏旣被誣而舊吏推明其功陳諫以爲管蕭之亞著論紀其詳大略以開元天寶間天下戶千萬至德後殘於大兵饑疫相仍十耗其九至晏充使戶不二百萬晏通計天下經費謹察州縣災害蠲除振救不使流離死亡初州縣取富人督漕輓謂之船頭主郵遞謂之捉驛稅外橫取謂之白著人不堪命皆去爲盜賊上元寶應間如袁晁陳莊方清許欽等亂江淮十餘年乃定晏始以官船漕而吏主驛事罷無名之斂正鹽官法以裨用度起廣德二年盡建中元年黜陟使實天下戶收三百餘萬王者愛人不在賜與當使之耕耘織紉常歲平斂之荒年蠲救之大率歲增十之一而晏尤能時其緩急而先後之每州縣荒歉有端則計官所贏先令曰蠲某物貸某戶民未及困而奏報已行矣議者或譏晏不直賑救而多賤出以濟民者則又不然善治病者不使至危憊善救災者勿使至賑給故賑給少則不足活人活人多則闕國用國用闕則復重斂矣又賑給近僥倖吏下爲姦彊得之多弱得之少雖刀鋸在前不可禁以爲二害災沴之鄉所乏糧耳它產尙在賤以出之易其雜貨因人之力轉於豐處或官自用則國計不乏多出菽粟恣之糶運散入村閭下戶力農不能詣市轉相沾逮自免阻飢不待令驅以爲二勝晏又以常平法豐則貴取飢則賤

與率諸州米嘗儲三百萬斛豈所謂有功於國者邪

琇後以尚書右丞判度支國無橫斂而軍旅濟為韓滉所惡貶雷州司戶參軍坐私入廣州賜死贖以兵部侍郎判度支封聞喜縣公衡歷戶部侍郎

信字幼正潤州延陵人父融集賢院學士與賀知章張旭張若虛有名當時號吳中四士信擢進士第累官諫議大夫坐善元載貶嶺南晏奏起為汴東兩稅使晏罷以信充諸道鹽鐵輕貨錢物使遷刑部侍郎改祕書監封丹陽郡公

徵幽州人晏薦為殿中侍御史晏得罪貶珍州司戶參軍元琇判度支薦為員外郎琇得罪貶秀州長史三遷給事中戶部侍郎竇參善之方倚以代己會同州刺史缺參請用尚書左丞趙憬德宗惡參欲問其腹心更用徵為之久乃徙華州厚結權近冀進用同華地迫而貧所獻嘗穀陋至徵厚賦斂有所奉入輒加常數人不堪其求

若初者事晏為它職包估稱之歷太康令勸刺史李元斂羨錢交權凡倖厚遇之累遷浙東觀察使代王緯為浙西觀察諸道鹽鐵使時天下錢少貨輕州縣禁錢不出境商賈不通若初始奏縱錢以起萬貨詔可而持剛檢下吏民畏服卒贈禮部尚書宗經終給事中華州刺史

子濛字仁澤舉進士累官度支郎中會昌初擢給事中以材為宰相李德裕所知時回鶻衰朝廷經略河隴建遣濛按邊調兵械糧餉為宣慰靈夏以北党項使始議造木牛運宣宗立德裕得罪濛貶朗州刺史

終大理卿

晏兄暹為汾州刺史天資疾惡所至以方直為觀察使所畏建中末召為御史大夫宰相盧杞憚其嚴更薦前河南尹于頔代之暹終潮州刺史

頔字休明河南人初為京兆尹參軍尹史翽器之翽鎮山南東道表為判官翽死亂兵手頔挺出收葬之時稱其誼累遷京兆尹任機譎為政煩碎無大體元載昵厚之載得罪出鄭州刺史徙河南尹以佞柔故得為大夫三遷工部尚書入朝仆金吾仗下御史劾之以太子少師致仕卒

暹孫潼字子固擢進士第杜悰判度支表為巡官累遷祠部郎中大中初封党項羌軍食乏宰相欲以潼為使難其遣潼見宰相曰上念邊饑議遣使潼畏不稱耳安敢憚行遂命為供軍使會復河湟調師屯守以潼判度支河湟供軍案歷京兆少尹山南有劇賊依山為剽宣宗怒欲討之宰相崔鉉曰此陛下赤子追於飢寒弄兵山谷間不足討請遣使喻釋之詔潼馳往潼挺身直叩其壘曰有詔赦爾罪盜皆列拜約潼就館而降會山南節度使封敖遣兵擊賊潼罷歸數陳邊事擢右諫議大夫出為朔方靈武節度使坐

累貶鄆州刺史改湖南觀察使召爲左散騎常侍拜昭義節度使徙河東又徙西川時李福討南詔兵不利潼至填以恩信蠻皆如約六姓蠻持兩端爲南詔間候有卑籠部落者請討之潼因出兵襲擊俘五千人南詔大懼自是不敢犯邊以功加檢校尚書右僕射卒贈司空

第五琦字禹珪京兆長安人少以吏幹進頗能言疆國富民術天寶中事韋堅堅敗不得調久之爲須江丞太守賀蘭進明才之安祿山反進明徙北海奏琦爲錄事參軍事時賊已陷河間信都進明未戰玄宗怒遣使封刀趣之曰不亟進兵卽斬首進明懼不知所出琦勸厚以財募勇士出賊不意如其計復收所陷郡肅宗駐彭原進明遣琦奏事既謁見卽陳今之急在兵兵疆弱在賦賦所出以江淮爲淵若假臣一職請悉東南寶貨飛餉函洛惟陛下命帝悅拜監察御史句當江淮租庸使遷司虞員外郎河南等五道支度使遷司金郎中兼侍御史諸道鹽鐵鑄錢使鹽鐵名使自琦始進度支郎中兼御史中丞當軍興隨事趣辦人不益賦而用以饒於是遷戶部侍郎判度支河南等道支度轉運租庸鹽鐵鑄錢司農太府出納山南東西江西淮南館驛等使乾元二年進同中書門下平章事初琦請鑄乾元重寶錢以一代之既當國又鑄重規一代五十會物價騰踊餓饉相望議者以爲非是詔貶忠州長史會有告琦納金者遣御史馳按琦辭曰位宰相可自持金邪若付受有狀請歸罪有司御史不曉以爲具服獄上之遂長流夷州

寶應初起爲朗州刺史有異政拜太子賓客吐蕃盜京師郭子儀表爲糧料使兼御史大夫關內元帥副使改京兆尹俄加判度支鑄錢鹽鐵轉運常平等使累封扶風郡公復以戶部侍郎兼京兆尹坐與魚朝恩善貶括州刺史徙饒湖二州復爲太子賓客東都留守德宗素聞其才將復用召之會卒年七十一贈太子少保子峯婦鄭皆以孝著表闕于門

班宏衛州汲人父景情國子祭酒以儒名家宏天寶中擢進士第調右司禦曹參軍高適鎮劍南表爲觀察判官青城人以左道惑衆謀作亂事覺誣引屯將規緩死衆兇懼宏驗治卽殺之人心大安郭英乂代適表維令以病解大厯中擢起居舍人四遷給事中李寶臣死子惟岳匿喪求節度帝遣宏使成德喻其軍惟岳厚獻遣宏不納還報稱旨擢刑部侍郎京官考使右僕射崔寧署兵部侍郎劉迺爲上下考宏不從曰今軍在節度雖有尺籍伍符省署不校也夫上多虛美則下趨競上阿容則下朋黨因削之迺聞謝曰敢掠一美以邀二罪乎進吏部侍郎貞元初仍旱蝗賦調益急以戶部侍郎副度支使韓滉俄而寶參當國代滉使而參任大理司直時宏已爲刑部侍郎德宗以宏熟天下計故進宏尙書副參且曰朕藉宰相重而衆務一委卿無庸辭參亦以宏素貴私謂曰閱歲當歸使於公宏喜後參胖自安不念前語宏剛復以參欺己議事稍不合揚子院鹽鐵轉運之委藏也宏任御史中丞徐粲主之粲以賄聞參議所代

宏固不可參選諸院吏未始訪宏宏數條多所用吏過惡以聞輒留中無何多以使勞加吏部尚書而封宏蕭國公恨多以虛寵加己銜之每制旨有所營建必極環麗親程役媚結權嬖以傾參張滂先善於宏薦爲司農少卿及參滂分掌江淮鹽鐵宏以滂疾惡且以法繩案因謬曰滂彊戾不可用滂聞不喜久之參知帝遇已薄乃讓使然不欲宏專問策於京兆尹薛珏珏曰滂與宏交惡而滂剛決若分鹽鐵轉運必能制宏參遂薦滂爲戶部侍郎鹽鐵轉運使而以宏判度支分滂關內河東劍南山南西道鹽鐵轉運隸宏以悅其意又遷江淮兩稅置巡院官令宏滂共差擇滂欲得薄最宏不與及署院官更持可否不能定處處官乏不補滂奏言臣職不脩無逃死如國家大計何由是有詔分掌宏見宰相辭曰宏主漕歲得江淮米五十萬斛前年至七十萬今職移於人敢請罪滂在側僂曰公所言非也朝廷不奪公職乃公喪官縉縱姦吏自取咎爾凡爲度支使不一歲家輒鉅億僮馬產第修王公非盜縣官財何以然上既知之故令滂分掌今公無乃歸怨上乎宏不答於是移病歸第宰相白其狀詔許如劉晏韓滉故事以東都河南淮南江南山南東道兩稅滂主之東渭橋以東巡院隸焉關內河東劍南山南西道宏主之滂至揚州乃窮劾案悉發其贓至鉅萬徙死嶺表宏清潔勤力晨入官署夕而出吏不堪其勞而已益恭參得罪宏爲有力卒年七十三贈尚書右僕射諡曰敬後二年滂亦罷爲衛尉卿

王紹本名純避憲宗諱改爲自太原徙京兆之萬年父端第進士有名天寶間與柳芳陸據殷寅友善據嘗言端之莊芳之辯寅之介可以名世終工部員外郎紹少爲顏真卿所器字之曰德素奏爲武康尉再佐蕭復府包信領租庸鹽鐵使署判官時李希烈阻兵江淮輸物留糧乃徙餉道自潁入汴紹入關德宗已西狩乃督輕貨趣間道走洋州紹先見行在帝勞之曰吾軍乏春服朕且衣裘奈何紹流涕曰信遺臣貢奉無慮五十萬當卽至帝曰道回遠經費方急何可望邪後五日繼至由是紓難遷倉部員外郎是時兵旱無年詔戶部收闕官俸稅茶及無名錢以脩荒政紹由員外郎判務遷戶部兵部郎中皆專領進戶部侍郎判度支頃之遷尚書德宗臨御久益不假借宰相自覽參陸贄斥罷中書取充位惟紹謹密眷待殊厚主計凡八年每政事多所關訪紹亦未嘗一言漏于人順宗立王叔文奪其權拜兵部尚書出爲東都留守元和初檢校尚書右僕射爲武靈軍節度使復以濠泗二州隸其軍自張愔後兵驕難治紹蒐輯軍政推誠示人裨將安進達唐重靖謀亂紹以計取之出家貲賞士舉軍安賴復拜兵部尚書判戶部卒年七十二贈右僕射諡曰敬

李巽字令叔趙州贊皇人以明經補華州參軍事舉拔萃授鄆尉進累左司郎中常州刺史召拜給事中出爲湖南觀察使貞元五年徙江西巽銳於爲治持下以法察無遺私吏不敢少給順宗立擢兵部侍郎

杜佑表爲鹽鐵轉運副使俄代佑使任自劉晏後職廢不振賦入朘耗異洩職一年較所入如晏最多之年明年過之又明年增百八十萬緡再遷吏部尚書天資長於吏事至治家亦旬檢案牘簿書如公府吏有過秋毫無所縱股慄脅息常如與異對程昇坐王叔文廢異特薦引之昇之計較精於異故異能善職蓋有助云元和四年疾革郎官省候異言不及病但與商校程課功利是夕卒年六十三贈尚書右僕射異爲人忌刻校怨在江西有所憎恨輒殺之始竄參爲相出異常州促其行及參貶郴州異時觀察湖南宣武節度使劉士寧致絹數千匹於參異卽劾參交通藩鎮以怒德宗遂殺參云
贊曰生人之本食與貨而已知所以取人不怨知所以予人不乏道御之而王權用之而霸古今一也劉晏因平準法幹山海排商賈制萬物低昂常操天下贏貲以佐軍興雖擊兵數十年斂不及民而用度足唐中饋而振要有勞焉可謂知取予矣其經晏辟署者皆用材顯循其法亦能富國云

唐書卷一百四十九

唐書卷一百四十九考證

第五琦傳久之爲須江丞○舊書累至西江丞

召之會卒年七十一○舊書作年七十

唐書卷一百四十九考證

唐書卷一百五十

宋 端 明 殿 學 士 宋 祁 撰

列傳第七十五

李常趙崔齊盧

李揆字端卿系出隴西爲冠族去客滎陽祖玄道爲文學館學士父成裕祕書監揆性警敏善文章開元末擢進士第補陳留尉獻書闕下試中書遷右拾遺再轉起居郎知宗子表疏以考功郎中知制誥扈狩劍南拜中書舍人乾元二年宗室請上皇后號曰翊聖肅宗問揆對曰前代后妃終則有諡景龍不君韋氏專恣乃稱翊聖今陛下動遵典禮奈何踵其亂哉帝驚曰幾誤我家事遂止后卽張氏有子數歲欲立爲太子而帝意未決時代宗已封成王帝從容語揆曰成王長有功將定太子卿意謂何揆曰陛下此言社稷福也因再拜贊帝曰朕計決矣俄兼禮部侍郎揆病取士不考實徒露搜索禁所挾而迂學陋生靡枕圖史且不能自措于詞乃大陳書廷中進諸儒約曰上選士第務得才可盡所欲言由是人人稱美未卒事拜中書侍郎同中書門下平章事修國史封姑臧縣伯揆美風儀善對帝歎曰卿門地人物文學皆當世第一信朝廷羽儀乎故時稱三絕於是京師多盜至驂衢殺人尸溝中吏襁氣李輔國方橫請選

羽林騎五百備徵捕揆曰漢以南北軍相統攝故周勃因南軍入北軍以安劉氏本朝置南北衙文武區別更相檢伺今以羽林代金吾忽有非常何以制之輔國議格揆決事明當然銳於進且近名兄楷有時稱滯冗官不得遷呂諲政事出揆遠甚以故宰相鎮荆南治聲尤高揆懼復用遣吏至諲所構抉過失諲密訴諸朝帝怒貶揆袁州長史不三日以楷爲司門員外郎揆累年乃徙歙州刺史初苗晉卿數薦元載揆輕載地寒謂晉卿曰龍章鳳姿士不見用塵頭鼠目子乃求官邪載聞銜之及秉政奏揆試祕書監江淮養疾家百口貧無祿丐食取給牧守稍厭恩則去之流落凡十六年載誅始拜睦州刺史入爲國子祭酒禮部尚書德宗幸山南揆素爲盧杞所惡用爲入蕃會盟使拜尚書左僕射揆辭老恐死道路不能達命帝惻然杞曰和戎者當練朝廷事非揆不可異時年少揆者不敢辭揆至蕃酋長曰聞唐有第一人李揆公是否揆長留因給之曰彼李揆安肯來邪還卒鳳州年七十四贈司空諡曰恭

常袞京兆人天寶末及進士第性狷潔不妄交游由太子正字累爲中書舍人文采瞻蔚長於應用譽重一時魚朝恩賴寵兼判國子監袞奏成均之任當用名儒不宜以宦臣領職始回紇有戰功者得留京師虜性易驕後乃創邸第佛祠或伏甲其間數出中渭橋與軍人格鬪奪舍光門魚契走城外袞建言今西蕃盤桓境上數入寇若相連結以乘無備其變不細請早圖之又天子誕日諸道爭以侈麗奉獻不則爲

老子浮屠解禱事袞以爲漢文帝還千里馬不用晉武帝焚雉頭裘宋高祖碎琥珀枕是三主者非有聰明大聖以致治安謹身率下而已今諸道饋獻皆淫侈不急而節度使刺史非能男耕而女織者類出於民是斂怨以媚上也請皆還之今軍旅未寧王畿戶口十不一在而諸祠寺寫經造像焚幣埋玉所以賞賚若比三道士巫祝之流歲巨萬計陛下若以易芻粟減貧民之賦天下之福豈有量哉代宗嘉納遷禮部侍郎時宦者劉忠翼權震中外涇原節度使馬璘爲帝寵任有所干請袞皆拒卻元載死拜門下侍郎同中書門下平章事弘文崇文館大學士與楊綰同執政綰長厚通可而袞苛細以清儉自賢帝內重綰而顯任之禮遇信愛袞弗及也每所恨忌會綰卒袞始當國先是百官俸寡狹議增給之時韓滉使度支與袞皆任情輕重混惡國子司業張參袞惡太子少詹事趙基皆少給之太子文學爲洗馬副袞姻家任文學者其給乃在洗馬上其驕私崇怨類此故事日出內廚食賜宰相家可十人具袞奏罷之又將讓堂封它宰相不從乃止政事堂北門異時宰相過舍人院咨逮政事至袞乃塞之以示尊大德元載敗竄賣官之路然一切以公議格之非文詞者皆擯不用故世謂之齮伯以其齮齮無賢不肖之辨云袞爲相散官纒朝議而無封爵郭子儀言于帝遂加銀青光祿大夫封河內郡公德宗卽位袞奏貶崔祐甫爲河南少尹帝怒使與祐甫換秩再貶潮州刺史建中初楊炎輔政起爲福建觀察使始閩人未知學袞至爲設

鄉校使作爲文章親加講導與爲客主鈞禮觀游燕饗與焉由是俗一變歲貢士與內州等卒于官年五十五贈尚書左僕射其後閩人春秋配享于學宮云

趙憬字退翁涇州隴西人曾祖仁本仕爲吏部侍郎同東西臺三品憬志行峻潔不自銜賈寶應中方營秦建二陵用度廣又吐蕃盜邊天下荐饑憬褐衣上疏請殺禮從儉士林歎美試江夏尉佐諸使府進太子舍人母喪免有芝生壤樹建中初擢水部員外郎湖南觀察使李承表憬自副承卒遂代之召還闔門不與人交李泌薦之對殿中占奏明辨通古今德宗欽悅拜給事中貞元中咸安公主降回紇詔關播爲使而憬以御史中丞副之異時使者多私齎以市馬規利入獨憬不然使未還尚書左丞缺帝曰趙憬堪此遂以命之考功歲終請如至德故事課殿最憬自言薦果州刺史章証以貪敗請降考校考使劉滋謂憬知過更以考升寶參當國欲抑爲刺史帝不許參罷進中書侍郎同中書門下平章事與陸贄同輔政贄於裁決少所讓又徙憬門下侍郎繇是不平自以不任職數稱疾時杜黃裳遭奄人讒譏穆贊韋武李宜盧雲等爲裴延齡構擯勢危甚憬救護申解皆得免初贄約共執退延齡既對贄極言其姦帝色變憬不爲助遂罷贄乃始當國憬精治道常以國本在選賢節用薄賦斂寬刑罰懇懇爲天子言之又陳前世損益當時之變獻審官六議一議相臣曰中外知其賢者用之能者任之責材之備爲不可得二議庶官

曰臣嘗謂拔十得五賢愚猶半陛下曰何必五也十二可矣故廣任用明殿最舉大節略小瑕隨能試事用人之大要也三議京司闕官曰今要官闕多閑官員多要官以材行閑官以恩澤是選拔少優容衆也宜補闕員以育人材四議考課曰今內庶僚外刺史課最尤者擢以不次善矣臣謂黜陟宜責歲限若任要重未當遷者加爵或秩其餘進退宜示遲速之常若課在中考如限者平轉而歷試之卽無苟且之心滯淹之慮五議遺滯曰陛下委宰輔舉才不徧知也則訪之庶僚又不徧知也訪之衆人衆聲囂然十譽之未信一毀之可疑臣謂宜采士論以譽多者先用非大故者勿棄六議藩府官屬曰諸使辟署務得才以重府望能否已試則引而置之朝無俾久滯帝皆然之下詔褒答輔政五年卒年六十一其息上卒時聽奏帝悼惜之贈太子太傅諡曰貞憲憬性清約位台宰而第室童獲猶儒先生家也得稟入先建家廟而竟不營產其鎮湖南也令狐暉崔儼並爲部刺史不守法憬以正彈治之皆遣客暴憬失於朝及爲相乃擢儼自大理卿爲尚書右丞暉方貶衡州別駕引爲吉州刺史人以爲賢

崔造字玄宰深州安平人承泰中與韓會盧東美張正則三人友善居上元好言當世事皆自謂王佐才故號四夔浙西觀察使李栖筠辟爲判官累遷左司員外郎與劉晏善晏得罪貶信州長史徙建州刺史朱泚亂造輒馳檄比州發所部兵二千以待命德宗嘉之京師平召還至藍田自以舅源休與賊同道上

疏請罪帝以爲有禮下詔慰勉擢給事中貞元二年以給事中同中書門下平章事帝謂造敢言爲能立事故不次用之造久在江左疾錢穀諸使罔上或干沒自私乃建言天下兩稅請委本道觀察使刺史選官部送京師諸道水陸轉運使度支巡院江淮轉運使請悉停以度支鹽鐵務還尙書省大曹皆宰相分領於是齊映判兵部李勉刑部劉滋吏禮二部造戶工二部又以戶部侍郎元琇判諸道鹽鐵榷酒事吉中孚度支諸道兩稅事而浙江東西歲入米七十五萬石方歲饑更以兩稅準米百萬豪壽洪潭二十萬責韓滉杜亞漕送東渭橋諸道有鹽鐵處仍置巡院歲盡宰相計最殿以聞造厚元琇故首命之時滉方領轉運有寵於帝朝廷仰其須滉持不可改帝重違之復以滉爲江淮轉運使餘如造請是秋江淮米大集帝美滉功以滉專領度支諸道鹽鐵轉運等使造懼始託疾辭位乃罷爲太子右庶子貶琇雷州司戶參軍於是造所請悉罷以憂愧卒年五十一議者謂造舉不適時方用之乏不能權濟大事雖據舊典奚能抗一切之制云

齊映瀛州高陽人舉進士博學宏詞中之補河南府參軍事滑毫節度使令狐彰署掌書記彰疾甚引映託後事映因說彰納節歸諸子京師彰從之卽以女妻映彰卒軍亂映間歸東都三城使馬燧辟爲判官盧杞薦授刑部員外郎又爲鳳翔張鎰判官映練軍事論奏數稱旨進行軍司馬會德宗出奉天鎰儒緩不知兵部將李楚琳者素懷悍欲介賊爲亂映與齊抗請先事誅之鎰不用更示寬大徐謂楚琳曰欲以君使外若何楚琳恐夜殺鎰以應賊映雅爲軍中慕賴故得免奔奉天授御史中丞從幸梁道險澀常爲帝御會馬駭突帝恐傷映詔捨轡固不去曰馬奔蹏不過傷臣捨之或犯清蹏臣雖死不足償責帝嘉嘆擢給事中映爲人白哲長大言音鴻爽故帝令侍左右或前馬臚傳詔旨進中書舍人貞元二年以舍人同中書門下平章事俄改中書侍郎封河間縣男與崔造劉滋並輔政滋端重寡言映謙不肩事否可一聞于造會造疾映乃當國吐蕃數入寇關輔震駭咸言帝欲避狄映入諫曰戎狄不懲臣之罪也然內外恟恟謂陛下具糗糧欲治行夫大幸不再奈何不與臣等計乎因俯伏流涕天子爲感悟後給事中袁高忤帝旨而映以爲尙書左丞御史大夫始映微時張延賞遇之善及映相而延賞爲左僕射數爲映畫事又爲所親求官映不答延賞恚既復用卽劾映非宰相器明年貶夔州刺史徙衡州久之爲桂管江西兩觀察使始映罷不以罪冀復進乃培斂獻貢以中帝欲初諸藩銀大瓶止五尺李兼爲江西始獻六尺瓶至映乃八尺云卒年四十八贈禮部尙書諡曰忠

盧邁字子玄河南河南人性孝友舉明經入第補太子正字以拔萃調河南主簿集賢校理公卿交薦之擢右補闕三遷吏部員外郎以族屬客江介出爲滁州刺史召還再遷諫議大夫數條當世病利進給事

中俄會考課邁以不滿歲固辭二考薦紳高其讓改尚書右丞將作監元巨攝祠以私忌不聽誓御史劾之帝疑其罰下尚書省議邁曰按大夫士將祭於公既視濯而父母死猶奉祭禮散齊有大功喪致齊有期喪齊有疾病聽還舍不奉祭無忌日不受誓者雖令忌日與告且春秋不以家事辭王事今攝祭特命也巨以常令拒特命執非所宜遂抵罪以本官同中書門下平章事進中書侍郎時陸贄趙憬專大政邁居中治身循法無它過久之暴眩省中輿還第詔大臣卽問固乞骸骨罷爲太子賓客卒年六十贈太子太傅邁每有功總喪必容稱其服而情有加焉叔下邳令休沐過家邁終日與羣子姓均指使無位貌之異再娶無子或勸畜姬媵對曰兄弟之子猶子也可以主後所得稟賜皆賑嫗舊之乏其從父弟起喪還洛陽過都邁奏請往哭之盡哀時執政自以宰相尊五服皆不過從問弔而邁獨不徇時議者重其仁而亮云

贊曰楊綰之德陸贄之賢而衰憊以爲憎何哉士固蔽於媚前然主聽不一故乘以爲姦昔齊桓秦堅任管仲王猛興區區霸天下蓋不以不肖者參之君臣相諒果難哉

唐書卷一百五十

唐書卷一百五十考證

李煥傳祖元道○舊書作元道曾孫

唐書卷一百五十考證

唐書卷一百五十一

宋 端 明 殿 學 士 宋 祁 撰

列傳第七十六

關董袁趙竇

關播字務元衛州汲人及進士第鄧景山節度青齊淮南再署幕府遷右補闕與神策軍使王駕鶴為姻家元載惡之出為河南兵曹參軍事數試屬縣政異等陳少游鎮浙東淮南表為判官攝滁州刺史李靈耀叛少游屯淮上所在盜賊蝟聚播儲貲力給軍興人無愁苦楊綰常袞皆善播引為都官員外郎德宗初湖南峒賊王國良驚剽州縣不可制詔播宣輯因得請事對殿中帝問政治之要播曰為政之本要得有道賢人乃治帝曰朕比下詔求賢才又遣使黜陟按逮所遺須能者用之若何播曰陛下雖求賢又使舉薦然止得求名文辭士焉有有道賢人肯奉牒丐舉選邪帝悅曰卿姑去還當更議播且言奉詔平賊有如不受命臣請發州兵翦定之帝曰善及還再遷給事中故事諸司甲庫以令史直曹剗脫為姦播悉易以士人時躋其法歷吏部侍郎帝求宰相盧杞雅知播韋柔可制因從容言播材任宰相其儒厚可鎮浮動乃拜中書侍郎同中書門下平章事政一決於杞嘗論事帝前播意不可避坐欲有所言杞目禁輒

止退讓播曰以君寡言故至此奈何欲開口爭事邪播即暗畏毋敢與時李元平陶公達張孫劉承誠率輕薄子游播門下能侈言誕計以功名自喜播謂皆將相材數請帝用之元平本宗室疏裔好論兵鄙天下士大夫無可者人人怨疾之李希烈叛帝以汝州據賊衝刺史疲軟不勝任播盛稱元平帝召見拜左補闕不數日檢校吏部郎中兼汝州別駕知州事元平始至募工築郭浚隍希烈陰使亡命應募凡內數百人元平不寤賊遣將李克誠以精騎薄城募者內應縛元平馳見希烈遺矢於地希烈以其眇小無髯戲克誠曰使爾取元平乃以其子來邪因嫚罵曰盲宰相使爾當我何待我淺邪僞署御史中丞播聞訖曰元平事濟矣謂必覆賊而建功也左右笑之無何僞署為宰相有告其貳者元平斷一指自誓公達等以元平屈賊皆廢不用播從幸奉天盧杞白志貞已貶而播猶執政議者不平遂罷為刑部尚書韋倫等曰宰相不善謀使天子播越尚尙書邪相與泣諸朝未幾知刪定使初上元中詔擇古名將十人配享武成廟如十哲倫孔子播奏太古賢臣今其下稱聖孔子十哲皆當時弟子今所配年世不同請罷之詔可貞元初檢校尙書右僕射持節送咸安公主降回鶻虜人重其清還遷兵部尚書以太子少師致仕斥賣車騎閤門不嬰外事卒年七十九贈太子太保始希烈死或言元平雖屈賊然有謀不克發乃貸死流珍州會赦還住鄴中觀察使皇甫政殺其姪以發帝怒遂流死賀州

董晉字混成河中虞鄉人擢明經肅宗幸彭原上書行在拜祕書省校書郎待制翰林出從淮南崔圓府為判官還朝累遷祠部郎中大厯中李涵持節送崇徽公主於回紇署晉判官回紇恃有功見使者偃因問歲市馬而唐歸我賄不足何也涵懼未及對數目晉晉曰我非無馬而與爾為市為爾賜者不已多乎爾之馬歲五至而邊有司數皮償贖天子不忘爾勞敕吏無得問爾反用是望我邪諸戎以我之爾與也莫敢礪爾父子監畜馬蕃非我則誰使衆皆南面拜不敢有言還遷祕書少監德宗立授太府卿不旬日為左散騎常侍兼御史中丞知臺事出為華州刺史朱泚反遣兵攻之晉棄華走行在改國子祭酒宣慰恒州還至河中而李懷光反晉說之曰朱泚為臣而背其君苟得志於公何有且公位太尉泚雖寵公亦無以加彼不能事君能以臣事公乎公能事彼而有不能事君乎公敵賊有餘力若襲取之清宮以迎天子雖有大惡猶將掩焉如公則誰敢議懷光喜且泣晉亦泣又語其將卒皆拜故懷光雖偃蹇亦不助泚帝還京師遷左金吾衛大將軍改尙書左丞是時右丞元瑒為韓滉排笮得罪滉勢振朝廷晉見宰相誦元瑒非罪士大夫壯其節貞元五年以門下待郎同中書門下平章事方寶參得君裁可大事不關晉晉循謹無所駭異參欲以其煙申為吏部侍郎諷晉以聞帝怒曰無乃參迫卿為之邪晉謝具道所以然帝即問參過失晉無敢隱由是參罷宰相晉惶恐上疏固辭位九年罷為禮部尚書以兵部尚書為東都

留守會宣武李萬榮病且死詔晉檢校尚書左僕射同中書門下平章事爲宣武節度副大使知節度事萬榮死鄧惟恭總其軍晉受命不召兵惟幕府騶儻從之即日上道至鄭逆者不至人勸止以觀便宜晉不聽直造汴及郊惟恭始出迎謁既入卽委以軍政無所更改衆服晉有體莫測其謀始惟恭謀代萬榮故不遣吏以疑晉令不敢入及晉至情得則鞅鞅不能平汴士素驕怙亂嘗介勇士伏幕下早暮番休晉一罷之惟恭乃結大將相里重晏等謀亂晉覺之殺其黨械送惟恭京師帝錄其繫李迺勞貸死流汀州帝恐晉儒懦詔拜汝州刺史陸長源爲司馬以佐晉晉謙愿儉簡事多循仍故軍粗安長源持法峭刻數欲更張舊事晉初許之已而悉罷不用以財賦委孟叔度叔度爲人佻悅軍中惡之晉在軍凡五年卒年七十六贈太傅諡曰恭惠晉爲相也五月朔天子會朝公卿在廷侍中贊羣臣賀寶參攝中書令當傳詔疾作公卿相顧未有詔晉從容進曰攝中書令臣參病不能事臣請代參事南面宣致詔詞進退甚詳金吾將軍沈房有基喪公除常服入闕帝疑以問晉對曰故事朝官基以下喪服絕纒不復衣淺色南班亦如之又問晉冠冕之制對曰古者服冠冕以佩玉節步堂上接武堂下布武君前趨進而已今或奔走以致顛仆在式朝臣皆綾袍五品而上金玉帶所以盡飾以奉上故漢尚書郎舍香老萊采服君父一也若然服絕纒亦非禮也帝然其言詔入閣官毋趨走基以下喪不得以慘服會令羣臣衣本品綾袍金玉帶

自晉而復

子溪字惟深亦擢明經三遷萬年令討王承宗也擢度支郎中爲東道行營糧料使坐盜軍貲流封州至長沙賜死子居中善詩爲張籍所稱

陸長源者吳人字泳祖餘慶天寶中爲太子詹事有清譽長源贖於學始辟昭義幕府嵩侈汰常從容規切嵩曰非君安能爲此歷建信二州刺史韓滉兼領江淮轉運使辟署兼御史中丞以爲副入遷都官郎中復出汝州刺史遂徙宣武政皆出司馬初欲峻法繩驕兵爲晉所持不克行而判官楊凝孟叔度等又苛細叔度淫縱數入倡家調笑嬉褻晉有所偷弛長源輒裁正之晉卒長源總留後事大言曰將士久慢吾且以法治之衆始懼軍中請出帑帛爲晉制服不許固請止給其直叔度希望又償直以鹽乃高鹽直賤帛估人得鹽二斤舉軍大怒或勸長源曰故事有大變則厚賜于軍軍乃安長源曰異時河北賊以錢買戍卒取旌節吾不忍爲衆怒益甚長源性剛不適應又不爲備纒八日軍亂殺長源及叔度等食其肉放兵大掠死之日有詔拜節度使遠近嗟悵贈尚書左僕射長源好諧易無威儀而清白自將去汝州送車二乘曰吾祖罷魏州有車一乘而圖書半之吾愧不及先人云長源死監軍俱文珍密召宋州刺史劉全諒使總後務全諒至其夜軍復亂殺大將及部曲五百人乃定帝卽詔全諒檢校工部尚書宣武

節度使全諒始名逸惟至是賜名本懷州武涉人也父客奴以行戍留籍幽州事平盧軍以材力顯開元中室韋首領段普洛數苦邊節度使薛楚玉使客奴單騎襲之斬首以歸興卒伍拜左驍衛將軍為遊奕使性謹樸數戰有功安祿山反詔以平盧節度副使呂知誨為使賊遣韓朝陽誘之知誨即降賊害安東副都護馬靈督客奴不平與諸將共殺知誨遣使與安東將王玄志相聞天寶十五載以客奴為柳城郡太守攝御史大夫平盧節度使賜名正臣以玄志為安東副大都護正臣遣使道海至平原與太守顏真卿相結真卿喜以子為質而歸質糧焉且請出師未至而真卿棄平原乃還因襲范陽為史思明所敗奔還玄志賊殺之全諒事劉玄佐為牙將以勇果善騎射為玄佐厚禮累兼御史中丞及玄佐子士靈代立疑宋州刺史翟良佐不附己揚言行部至則以全諒代之故汴將士多歸心焉視事凡八月卒贈尚書右僕射軍中立韓弘代節度云

袁滋字德深蔡州朗山人陳侍中憲之後彊學博記少依道州刺史元結讀書自解其義結重之後客荆郢間起學廬講授建中初黜陟使趙贊薦于朝起處士授試校書郎累辟張伯儀何士幹幕府進詹事府司直部官以盜金下獄滋直其寃御史中丞韋貞伯聞之表為侍御史刑部大理駁罪人失其平憚滋守法因權勢以請滋終不署奏遷工部員外郎韋皋始招來西南東南詔畢皋尋內屬德宗選郎吏可撫循

者皆憚行至滋不辭帝嘉之擢祠部郎中兼御史中丞賜金紫持節往踰年還使稱指進諫議大夫遷尚書右丞知吏部選求外遷為華州刺史政清簡流民至者給地居之名其里曰義合然專以慈惠為本未嘗設條教民愛向之有犯令時時法外縱舍得盜賊或哀其窮出財為償所亡召為左金吾衛大將軍以楊於陵代之滋行者老遮道不得去於陵使諭曰吾不敢易袁公政人皆羅拜乃得去莫不流涕憲宗監國進拜中書侍郎同中書門下平章事劉闢反詔滋為劍南兩川山南西道安撫大使半道以檢校吏部尚書平章事為劍南東西川節度使是時賊方熾又滋兄峯在蜀為闢所劫滋畏不得全久不進貶吉州刺史未幾徙義成節度使滑用武地東有淄青北魏博滋嚴備而推誠信務在懷來李師道田季安畏服之居七年百姓立祠祝祭以戶部尚書召改檢校兵部拜山南東道節度使徙荆南吳元濟之反滋言蔡兵勁與下同欲非朝夕計可下宜廣方略離潰其心及宿兵三年調發益屈詔出禁錢繼之滋揣天子且厭兵自表入朝欲議罷淮西事道聞蕭俛錢徽坐沮議黜去滋翻其謀更言必勝順可天子意乃得還俄而高靈寓敗帝思以恩信傾賊且滋嘗云云乃授彰義節度使僑治唐州又以滋儒者拜陽夏為唐州刺史將其兵滋先世墳墓在蔡吳少陽時為脩墓禁芻牧諸袁多署右職稟給之滋至治去斥候與元濟通好賊圍新興滋卑辭講解賊因是易滋不為備時帝責戰急而滋至六月以無功貶撫州刺史未幾遷湖

南觀察使累封淮陽郡公卒年七十贈太子少保滋既病作遺令處後事訖三年皆有條次性寬易與之接者皆自謂可見肺腑至家人不得見喜愠薄居處衣食能為春秋嘗以劉惔悲甘陵賦囊善斥惡辰春秋指然其文不可廢乃著後序工篆隸有古法子均右拾遺郊翰林學士

趙宗儒字秉文鄧州饒人八代祖彤後魏征南將軍父驥字雲卿少嗜學履尚清鯁開元中擢進士第補太子正字調雷澤河東丞採訪使韋陟器之表置其府又為陳留採訪使郭納支使安祿山陷陳留驥沒於賊時江西觀察使韋儼族妹坐其夫為畿官不供賊沒為婢驥哀之以錢贖韋厚為資給賊平訪近屬歸之時人高其義驥以嘗陷賊貶晉江尉久之召拜左補闕遷累尚書比部員外郎建中初遷祕書少監敦交友行義不以夷險顧操少與殷寅顏真卿柳芳陸據蕭穎士李華邵軫善時為語曰殷顏柳陸李蕭邵趙謂能全其交也驥位省郎衣食饑乏俸單寡諸子至徒步人為咨美涇原兵反驥竄山谷病死贈華州刺史宗儒第進士授校書郎判入等補陸渾主簿數月拜右拾遺翰林學士時父驥遷祕書少監德宗欲寵其門使一日並命再遷司勳員外郎貞元六年領考功事自至德後考績失實內外悉考中上殿最混淆至宗儒黜陟詳當無所回憚右司郎中獨孤良器殿中侍御史杜倫以過黜考左丞裴郁御史中丞盧紹降考中中凡入中上者纔五十人帝聞善之進考功郎中累遷給事中十二年以本官同中書門下

平章事賜服金紫居二歲罷為太子右庶子屏居慎靜奉朝請而已遷吏部侍郎召見勞曰知卿杜門六年故有此拜曩與先臣並命尚念之邪宗儒俯伏流涕元和初檢校禮部尚書充東都留守三遷至檢校吏部荆南節度使散冗食戍二千人歷山南西道河中二鎮拜御史大夫改吏部尚書穆宗立詔先朝所召賢良方正委有司試宗儒建言應制而來者當天子臨問試有司非國舊典請罷之詔可俄檢校右僕射守太常卿太常有五方師子樂非大朝會不作帝嗜聲色宦官領教坊者乃移書取之宗儒不敢違以訴宰相宰相以事專有司不應關白以儒不職罷為太子少師太和初進太子太傅文宗召訪政理對曰堯舜之化慈儉而已願陛下守之帝納其言六年授司空致仕卒年八十七冊贈司徒諡曰昭宗儒以文學歷將相位任崇劇然無儀矩以治生瑣碎失名

竇易直字宗玄京兆始平人擢明經補校書郎十年不應辟以判入等為藍田尉累遷吏部郎中元和六年進御史中丞繇陝虢觀察使入為京兆尹萬年尉韓晤坐賊易直令官屬按之得贓三十萬憲宗疑未盡詔窮治至三百萬貶易直為金州刺史久之起為宣歙浙西觀察使長慶二年李齊以汴州叛易直欲出庫財賞軍或謂給與無名必且生患乃止時江淮旱漕物淹積不能前軍士聞易直嚮言其部將王國清指漕貨激眾謀亂易直知之械國清送獄其黨數千羣譟入獄篡取之欲大剽易直登樓令曰能誅亂

者一級賞千萬眾喜反縛爲亂者三百餘人易直悉斬之入爲戶部侍郎判度支四年同中書門下平章事轉門下侍郎封晉陽郡公卽讓度支置其俸三月有詔停判文宗立檢校尙書右僕射同平章事爲山南東道節度使入爲左僕射判太常卿事頃之檢校司空爲鳳翔節度以疾還京師卒贈司徒諡曰恭惠易直以公潔自喜方執政未嘗引用親黨初元和中鄭餘慶議僕射上儀不與隔品官允禮易直爲中丞奏駁之及爲僕射乃自用隔品致恭爲時鄙笑子紉仕至渭南尉集賢校理妻父王涯被禍宦官知易直子得不死貶循州司戶參軍

贊曰關播舉李元平守汝州賊縛而臣之宰相不知人果可敗國德宗不以是責宰相幾喪天下晉儒弛苟安滋欲以恩信傾賊迂暗之人烏可語功名會哉

唐書卷一百五十一

唐書卷一百五十一考證

董晉傳德宗立授太府卿不旬日爲左散騎常侍○舊書改太常卿遷右散騎常侍

以兵部尙書爲東都留守○臣德潛按此貞元元年事也舊書德宗紀貞元十二年晉爲東都留守

陸長源傳字泳○舊書作泳之

袁滋傳御史中丞韋貞伯聞之○韋貞伯舊書作韋縉

爲劍南東西川節度使○舊書作西川節度使

趙宗儒傳父曄○舊書作曄臣西按曄爲陳留採訪使沒于賊以六等定罪貶晉江尉舊書乃入忠義

傳失實甚矣不若新書止敘于宗儒傳前爲是

唐書卷一百五十一考證

唐書卷一百五十二

宋 端 明 殿 學 士 宋 祁 撰

列傳第七十七

張美武李宋

張鎰字季權一字公度國子祭酒後胤五世孫也父齊巨朔方節度使東都留守鎰以蔭授左衛兵曹參軍郭子儀表為元帥府判官遷累殿中侍御史乾元初華原令盧樅以公事譙責邑人齊令誅令誅官人也銜之構樅罪鎰按驗當免官有司承風以死論鎰不直之乃白其母曰今理樅樅免死而鎰坐貶噤則負官貶則為太夫人憂敢問所安母曰兒無累於道吾所安也遂執正其罪樅得流鎰貶撫州司戶參軍徙晉陵令江西觀察使張鎬表為判官遷屯田右司二員外郎居母喪以孝聞不妄交游特與楊綰崔祐甫善大庾初出為濠州刺史政條清簡延經術士講教生徒比去州升明經者四十人李靈耀反于汴鎰圍閩鄉兵嚴守禦有詔襲美擢侍御史兼緣淮鎮守使以最遷壽州刺史歷江西河中觀察使不閱旬改汴滑節度使以病固辭詔留私第建中二年拜中書侍郎同中書門下平章事明年以兩河用兵詔省薄御膳及皇太子食物鎰因奏減堂殮錢及百官稟奉三分一以助用度時黜陟使裴伯言薦潞州處士田

佐時詔除右拾遺集賢院直學士鎰以爲禮輕恐士不勸復詔州縣吏以絹百匹粟百石就家致聘佐時卒不至郭子儀婿太僕卿趙縱爲奴告下御史劾治而奴留內侍省鎰奏言貞觀時有奴告其主謀反者太宗曰謀反理不獨成尙當有佻人論之豈藉奴告耶乃著令奴告主者斬由是賤不得干貴下不得凌上教本既修悖亂不萌頃者長安令李濟以奴得罪萬年令霍晏因婢坐譴輿臺下類主反畏之悖慢成風漸不可長建中元年五月辛卯詔書奴婢告主非謀叛者同自首法並準律論由是獄訴衰息今縱事非叛逆而奴留禁中獨下縱獄情所不厭且將帥功孰大於子儀冢土僅乾兩婿前已得罪縱復繼之數月斥其三婿假令縱實犯法事不緣奴尙宜錄勳念亡以從蕩宥况爲奴所懇耶陛下方貴武臣以討賊彼雖見寵一時不能忘懷於異日也帝納之貶縱循州司馬杖奴死鎰召子儀家僮數百暴示奴尸盧杞忌鎰剛直欲去之時朱泚以盧龍卒成鳳翔帝擇人以代杞卽謬曰鳳翔將校班秩素高非宰相信臣不可鎮撫臣宜行帝不許杞復曰陛下必以臣容貌賤陋不爲三軍所信恐後生變臣不敢自謀惟陛下擇之帝乃顧鎰曰文武兼資望重內外無易卿者其爲朕撫盧龍士乃以中書侍郎爲鳳翔隴右節度使鎰知爲杞陰中然辭窮因再拜受詔頃之與吐蕃相尙結贊盟清水約牛馬爲牲鎰恥與盟將未殺其禮乃給語吐蕃以羊豕犬代之帝幸奉天鎰罄家貲將自獻行在而營將李楚琳者嘗事朱泚得其心軍司

馬齊映等謀曰楚琳必爲亂乃遣屯隴州楚琳知之稽故未行鎰以帝在外心憂感謂已亟去不爲備楚琳夜率其黨王汾李卓牛僧伽等作亂齊映自賣出齊抗託傭皆免鎰縋城走不及遠與二子爲候騎所執楚琳殺之屬官王沼張元度柳遇李淑皆死詔贈鎰太子太傅

姜公輔愛州日南人第進士補校書郎以制策異等授右拾遺爲翰林學士歲滿當遷上書以母老賴祿而養求兼京兆戶曹參軍事公輔有高材每進見敷奏詳亮德宗器之朱滔助田悅也以密裏書間道邀泚太原馬燧獲之泚不知也召還京師公輔諫曰陛下若不能坦懷待泚不如誅之養虎無自貽害不從俄而涇師亂帝自苑門出公輔叩馬諫曰泚嘗帥涇原得士心向以滔叛奪之兵居常怫鬱不自聊請馳騎捕取以從無爲羣兇得之帝倉卒不及聽既行欲駐鳳翔倚張鎰公輔曰鎰雖信臣然文吏也所領皆朱泚部曲漁陽突騎泚苦立涇軍且有變非萬全策也帝亦記桑道茂言遂之奉天不數日鳳翔果亂殺鎰帝在奉天有言泚反者請爲守備盧杞曰泚忠正篤實奈何言其叛傷大臣心請百口保之帝知羣臣多勸泚奉迎乘輿者乃詔諸道兵距城一舍止公輔曰王者不嚴羽衛無以重威靈今禁旅單寡而士馬處外爲陞下危之帝曰善悉內諸軍泚兵果至如所言乃擢公輔諫議大夫同中書門下平章事帝徙梁唐安公主道薨主性仁孝許下嫁韋宥以播遷未克也帝悼之甚詔厚其葬公輔諫曰卽平賊主必歸葬

今行道宜從儉以濟軍興帝怒謂翰林學士陸贄曰唐安之葬不欲事塋壙令累錢爲浮圖費甚寡約不容宰相預苟欲指朕過爾贄曰公輔官諫議職宰相獻替固其分本立輔臣朝夕納誨微而弼之乃其所也帝曰不然朕以公輔才不足以相而又自求解朕既許之內知且罷故賣直售名爾遂下遷太子左庶子以母喪解復爲右庶子久不遷陸贄爲相公輔數求官贄密謂曰竇丞相嘗言爲公擬官屢矣上輒不悅公輔懼請爲道士未報它日又言之帝問故公輔隱贄言以參語對帝怒黜公輔泉州別駕遣使齎詔讓參順宗立拜吉州刺史未就官卒憲宗時贈禮部尚書

武元衡字伯蒼曾祖載德則天后之族弟祖平一有名元衡舉進士累爲華原令畿輔鎮軍督將皆驕橫撓政元衡移疾去德宗欽其才召拜比部員外郎歲內三遷至右司郎中以詳整任職擢爲御史中丞常對延英帝目送之曰是真宰相器順宗立王叔文使人誘以爲黨拒不納俄爲山陵儀仗使監察御史劉禹錫求爲判官元衡不與叔文滋不悅數日改太子右庶子會冊皇太子元衡贊相太子識之及卽位是爲憲宗復拜中丞進戶部侍郎元和二年拜門下侍郎同中書門下平章事兼判戶部事帝素知元衡堅正有守故瞻禮信任異它相浙西李錡求入覲既又稱疾欲賒其期帝問宰相鄭絪請聽之元衡曰不可錡自請入朝詔既許之而復不至是可否在錡陛下新卽位天下屬耳目若奸臣得遂其私則威令

去矣帝然之遽追錡而錡計窮果反是時蜀新定高崇文爲節度不知吏治帝難其代詔元衡檢校吏部尚書兼門下侍郎同平章事爲劍南西川節度使繇蕭縣伯封臨淮郡公帝御安福門慰遣之崇文去成都盡以金帛帟幕伎樂工巧行蜀幾爲空元衡至綏靖約束儉己寬民比三年上下完實蠻夷懷歸雅性莊重雖淡於接物而開府極一時選八年召還秉政李吉甫李絳數爭事帝前不叶元衡獨持正無所違附帝稱其長者吉甫卒准蔡用兵帝悉以機政委之王承宗上疏請赦異元濟使人白事中書悖慢不恭元衡叱去承宗怨激上章誣詆未幾入朝出靖安里第夜漏未盡賊乘暗呼曰滅燭射元衡中肩復擊其左股徒御格鬪不勝皆駭走遂害元衡批顛骨持去邏司傳謀盜殺宰相連十餘里達朝堂百官恟懼未知主名少選馬逸還第中外乃審知是日仗入紫宸門有司以聞帝震驚罷朝坐延英見宰相哀慟爲再不食贈司徒諡曰忠愍詔金吾府縣大索或傳言曰無撻賊賊窮必亂又投書於道曰毋急我我先殺汝故吏卒不窮捕兵部侍郎許孟容言於帝曰國相橫尸路隅而盜不獲爲朝廷辱帝乃下詔能得賊者賞錢千萬授五品官與賊謀及舍賊能自言者亦賞有不如詔族之積錢東西市以募告者於是左神策將軍王士則左威衛將軍王士平以賊聞捕得張晏等十八人言爲承宗所遣皆斬之逾月東都防禦使呂元膺執淄青留邸賊門察營嘉珍自言始謀殺元衡者會晏先發故藉之以告師道而竊其賞帝密誅之

初京師大恐城門加兵誰何其偉狀異服燕趙言者皆驗訊乃遣公卿朝以家奴持兵呵衛宰相則金吾
數騎導翼每過里門擦索喧譁因詔寅漏上二刻乃傳點云從父第儒衡

儒衡字廷碩姿狀秀偉不妄言與人交終始一節宰相鄭餘慶不事華潔門下客多垢衣敗服獨儒衡上
謁未嘗有所易以莊詞正色見重於餘慶元衡歿帝待之益厚累遷戶部郎中知諫議大夫事俄兼知制
誥皇甫鏞以宰相領度支剝下以媚天子儒衡疏其狀鏞自訴於帝帝曰乃欲報怨邪鏞不敢對儒衡論
議勁正有風節且將大用宰相令狐楚忌之會以狄兼謨爲拾遺楚自草制引武后革命事盛推仁傑功
以指切儒衡且沮止之儒衡泣見上曰臣祖平一當天后時避仕終老不涉於累帝慰勉之自是薄楚爲
人也遷中書舍人時元稹倚宦官知制誥儒衡鄙厭之會食瓜蠅集其上儒衡揮以扇曰適從何處來遽
集於此一坐皆失色然以疾惡大分明終不至大任以兵部侍郎卒年五十六贈工部尚書

李絳字深之系本贊皇擢進士宏辭補渭南尉拜監察御史元和二年授翰林學士俄知制誥會李錡誅
憲宗將奪取其貲絳與裴埴諫曰錡僭侈誅求六州之人怨入骨髓今元惡傳首若因取其財恐非遏亂
略惠綏困窮者願賜本道代貧民租賦制可樞密使劉光琦議遣中人持赦令賜諸道以哀饋餉絳請付
度支鹽鐵急遞以遺息取求之弊光琦引故事以對帝曰故事是耶當守之不然當改可循舊哉帝嘗稱

太宗玄宗之盛朕不佞欲庶幾二祖之道德風烈無愧謚號不爲宗廟羞何行而至此乎絳曰陛下誠能
正身勵己尊道德遠邪佞進忠直與大臣言敬而信無使小人參焉與賢者游親而禮無使不肖與焉去
官無益於治者則材能出斥宮女之希御者則怨曠銷將帥擇士卒勇矣官師公吏治輯矣法令行而下
不違教化篤而俗必遷如是可與祖宗合德號稱中興夫何遠之有言之不行無益也行之不至無益也
帝曰美哉斯言朕將書諸紳卽詔絳與崔羣錢徽章弘景白居易等摻次君臣成敗五十種爲連屏張便
坐帝每閱視顧左右曰而等宜作意勿爲如此事是時盛興安國佛祠倖臣吐突承瓘請立石紀聖德焉
營構華廣欲使絳爲之頌將遺錢千萬絳上言陛下蕩積習之弊四海延頸望德音忽自立碑示人以不
廣易稱大人與天地合德謂非文字所能盡若令可述是陛下美有分限堯舜至文武皆不傳其事惟秦
始刻嶧山揚暴誅伐巡幸之勞失道之君不足爲法今安國有碑若敘游觀卽非治要述崇飾又非政宜
請罷之帝怒絳伏奏愈切帝悟曰微絳我不知命百牛倒石令使者勞諭絳襄陽裴均違詔書獻銀壺
壺數百具絳請歸之度支示天下以信帝可奏仍赦均罪時議還盧從史昭義已而將復召之從史以軍
無見儲爲解李吉甫謂鄭綱漏其謀帝召絳議欲逐綱絳爲開白乃免絳見浴堂殿帝曰比諫官多朋黨
論奏不實皆陷謗訕欲黜其尤者若何絳曰此非陛下意必憚人以此營誤上心自古納諫昌拒諫亡夫

人臣進言於上豈易哉君尊如天臣卑如地加有雷霆之威彼晝度夜思始欲陳十事俄而去五六及窮以聞則又憚而削其半故上達者財十二何哉干不測之禍顧身無利耳雖開納獎勵尙恐不至今乃欲覆詞之使直士杜口非社稷利也帝曰非卿言我不知諫之益初承瓘討王承宗議者皆言古無以宦人統師者瓘當制書固爭帝不能奪止詔宰相授敕承瓘果無功還加開府儀同三司瓘奏承瓘喪師當抵罪今寵以崇秩後有奔軍之將蹈利干賞陛下何以處之又數論宦官橫肆方鎮進獻等事自知言切且斥去悉取內署所上疏稿焚之以俟命帝果怒瓘謝曰陛下憐臣愚處之腹心之地而惜身不言乃臣貢陛下若上犯聖顏旁忤貴倖因而獲罪乃陛下負臣於是帝動容曰卿告朕以人所難言者疾風知勁草卿當之矣遂繇司勳郎中進中書舍人翌日賜金紫親擇良笏與之且曰異時膺顧託南面當如此瓘頓首烏重胤縛盧從史而承瓘燄署昭儀留後瓘曰澤潞據山東要害磁邢洛跨兩河間可制其合從今孽豎就虜方收威柄遽以偏將莅本軍綱紀大紊矣河南北諸鎮謂陛下昭以官爵使逐其帥其肯默然哉宜以孟元陽爲澤潞而以重胤節度三城兩河諸侯聞之必欣然帝從之張茂昭舉族入覲瓘上言任迪簡既往代則士之從茂昭皆爲定人宜亟授以官且遣使者詔其麾下皆聽茂昭節度有詔拜河中節度使會迪簡以幣賂置竭稍簡罷士之疲老者人情不安迪簡亦危瓘請斥禁帑絹十萬以濟事機吳少誠

病甚瓘建言淮西地不與賊接若朝廷命帥今乃其時有如阻命則決可討矣然鎮蔡不可并取願赦承宗越立蔡功時江淮大旱帝下赦令有所蠲弛瓘言江淮流亡所貸未廣而宮人猥積有怨鬲之思當大出之以省經費嶺南之俗鬻子爲業可聽非券劑取直者如掠賣法赦有司一切苛止帝皆順納後閏月不賜對瓘謂大臣持祿不敢諫小臣畏罪不敢言管仲以爲害霸最甚今臣等飽食不言無履危之患自爲計得矣顧聖治如何有詔明日對三殿帝嘗畋苑中至蓬萊池謂左右曰瓘嘗以諫我今可返也其見禮憚如此帝怪前代任賢以致治今無賢可任何耶對曰聖王選當代之人極其才分自可致治豈借賢異代治今日之人哉天子不以已能蓋人痛折節下士則天下賢者乃出帝曰何知其必賢而任之對曰知人誠難堯舜以爲病然循其名驗以事所得十七夫任官而辨廉措事不阿容無希望依違之辭無邪媚媮悅之容此近於賢矣賢則當任任則當久賢者中立而寡助舉其類則不肖者怨杜邪徑則懷奸者疾一制度則貴戚毀傷正過失則人君疏忌夫然用賢豈容易哉帝曰卿言得之矣六年罷學士遷戶部侍郎判本司帝以戶部故有獻而瓘獨無有何哉答曰凡方鎮有地則有賦或畱用度易羨餘以爲獻臣乃爲陛下謹出納烏有羨贏哉若以爲獻是徙東庫物實西庫進官物結私恩帝瞿然悟帝每有詢訪隨事補益所言無不聽欲遂以相而承瓘寵方盛忌其進陰有毀短帝乃出承瓘淮南監軍翌日拜瓘中書

侍郎同中書門下平章事封高邑男方江淮歲儉民荐飢有御史使還奏不爲災帝以語絳答曰方隅皆
陛下大臣奏孰不實而御史苟悅陛下耳凡君人者當任大臣使無小臣得以間願出其名顯責之李吉
甫嘗盛贊天子威德帝欣然絳獨曰陛下自視今日何如漢文帝時帝曰朕安敢望文帝對曰是時賈誼
以爲措火積薪下火未及然因以爲安其憂如此今法令所不及者五十餘州西戎內訌近以涇隴爲鄙
去京師遠不千里烽燧相接也加比水旱無年倉廩空虛誠陛下焦心銷志求濟時之略渠便高枕而臥
哉帝入謂左右曰絳言骨鯁真宰相也遣使者賜醪醕酒魏博田季安死子懷諫弱軍中請襲節度吉甫
議討之絳曰不然兩河所懼者部將以兵圖己也故委諸將總兵皆使力敵任均以相維制不得爲變若
主帥彊則足以制其命今懷諫乳方奧不能事必假權于人權重則怨生向之權力均者將起事生患矣
衆所歸必在寬厚簡易軍中素所愛者彼得立不倚朝廷亦不能安惟陛下蓄威以俟之俄而田與果立
以魏博聽命帝大悅吉甫復請命中人宣尉因刺其變徐議所宜絳獨謂不如推誠撫納卽假旄節它日
使者持三軍表來請與興則制在彼不在此可奏與特授安得同哉然帝重違吉甫故詔張忠順持節往
而授興留後絳固請曰如興萬有一不受命卽姑息復如向時矣由是卽拜興節度使絳復曰王化不及
魏博久矣一日擊六州來歸不大犒賞人心不激請斥禁錢百五十萬糴賜其軍有言太過者絳曰假令

舉十五萬衆期歲而得六州計所轉給三倍于費今與天挺忠義首變汗俗破兩河之膽可啻小費噫機
事哉從之帝患朋黨以問絳答曰自古人君最惡者朋黨小人揣知故常藉口以激怒上心朋黨者尋之
則無跡言之則可疑小人常以利動不顧忠義君子者遇主知則進疑則退安其位不爲它計故常爲姦
人所乘夫聖人同跡賢者求類是同道也非黨也陛下奉遵堯舜禹湯之德豈謂上與數千年君爲黨耶
道德同耳漢時名節骨鯁士同心愛國而宦官小人疾之起黨錮之獄訖亡天下趨利之人常爲朋比同
其私也守正之人常遭構毀違其私也小人多譖言常勝正人少直道常不勝可不戒哉絳居中介特尤
爲左右所不悅遂因以自明王播爲鹽鐵使而事月進絳曰比禁天下正賦外不得有它獻而播妄名羨
餘不出祿廩家貲願悉付有司帝曰善訖絳在位獻不入禁中吐蕃犯涇州掠人畜絳因言瀕塞虛籍多
實兵少今京西北神策鎮軍本防盛秋坐仰衣食不使戰事至之日乃先稟中尉夫兵不內御要須應變
失毫釐差千里請分隸本道則號令齊一前戰不還踵矣然士卒樂兩軍姑息宦者以爲言議遂寢嘗盛
夏對延英帝汗浹衣絳欲趨出帝曰朕宮中所對惟宦官女子欲與卿講天下事乃其樂也絳或無所論
靜帝輒詰所以然又言公等得無有姻故冗食者當爲惜官吉甫權德輿皆稱無有絳曰崔祐甫爲宰相
不半歲除吏八百人德宗曰多公姻故何耶祐甫曰所問當與不當耳非臣親舊孰知其才其不知者安

敢與官時以爲名言武后命官猥多而開元中有名者皆出其選古人言拔十得五猶得其半若猜故自嫌非聖主責成意帝曰誠然在至當而已帝又問玄宗開元時致治天寶則亂何一君而相反邪絳曰治生於憂危亂生於放肆玄宗嘗歷試官守知人之艱難臨御初任用姚崇宋璟勵精聽納故左右前後皆正人也洎林甫國忠得君專引傾邪之人分總要劇於是上不聞直言嗜欲日滋內則盜臣勸以興利外則武夫誘以開邊天下騷動故祿山乘隙而奮此皆小人啟導從逸而驕繫時主所行無常治亦無常亂帝曰凡人舉事病不通於理追咎其失古人處此有道耶絳曰事或過差聖哲所不免天子有諫臣所以救過上下同體猶手足之於心膂交相爲用但矜能護失常情所蔽聖人改過不吝願陛下以此處之教坊使稱密詔閱良家子及別宅婦人內禁中京師囂然絳將入言于帝吉甫曰此諫官所論列絳曰公嘗病諫官論事此難言者欲移之耶吉甫乃欲諷詔使止之絳以吉甫畏不敢諫遂獨上疏帝曰朕以丹王等無侍者比命訪閭里以貨致之彼不諭朕意故至譁擾乃悉歸所取以足疾求免罷爲禮部尚書帝乃召承瓏於淮南絳雖去位猶懷不能已因上言北虜方疆其憂有五彼蔑信重利歲入馬求直今則置不取當貯化謀一也屯士不足斥候不明城無完堞非可應卒二也今之營築不詢衆謀遠規塞外城非要地虜一入寇應援艱阻三也比年通好往來窺覘河山兵甲悉知之矣若寇掠驅脅援兵非十日不至既

至虜去兵罷復來四也北狄西戎久爲仇敵今回鶻思叛脫相連約數道並進何以遏之五也十年出爲華州刺史承瓏田多在部中主奴擾民絳捕繫之會遣五坊使帝戒曰至華宜自戢絳大臣有奏卽行法矣州有捕鷄戶歲責貢限絳以爲言并勸止畋獵有詔澤潞太原天威府并罷之入爲兵部尚書母喪免還授河中觀察使河中故節制而皇甫鎛惡絳故薄其恩議者不直鎛得罪復以兵部召遷御史大夫穆宗數游畋絳率其屬叩延英切諫不納以疾辭還兵部尚書歷東都留守徙東川節度使復爲留守寶曆初拜尚書左僕射絳偉儀質以直道進退望冠一時賢不肖太分屢爲讒邪所中御史中丞王璠遇絳於道不之避絳引故事論列宰相李逢吉右璠下遷絳太子少師分司東都文宗立召爲太常卿以檢校司空爲山南西道節度使累封趙郡公四年南蠻寇蜀道詔絳募兵千人往赴不半道蠻已去兵還監軍使楊叔元者素疾絳遣人迎說軍曰將收募直而還爲民士皆怒乃謀而入劫庫兵絳方宴不設備遂握節登陣或言縋城可以免絳不從牙將王景延力戰歿絳遂遇害年六十七幕府趙存約薛齊皆死事聞諫官崔戎等列絳寃冊贈司徒諡曰貞贈禮甚厚景延亦贈官祿一子大中初詔史官差第元和將相圖形凌煙閣絳在焉獨留中絳所論事萬餘言其甥夏侯孜以授蔣偕次爲七篇

子璋字重禮大和中擢進士第辟盧鈞太原幕府遷監察御史奏太廟祫享復用宰相攝事進起居郎

制設次郊丘太僕盤車載樂召羣臣臨觀璋奏罷之咸通中累官尚書右丞湖南宣歙觀察使

宋申錫字慶臣史失其所人少而孤擢進士第累辟節度府後頻遷起居舍人以禮部員外郎爲翰林學士敬宗時拜侍講學士長慶寶曆間風俗蠶薄驅煽朋黨申錫素孤直少與及進用議者謂可以激浮競文宗卽位再轉中書舍人復爲翰林學士帝惡宦官權寵震主再致宮禁之變而王守澄典禁兵偃蹇放肆欲剷除本根思可與決大事者察申錫忠厚因召對俾與朝臣謀去守澄等且倚以執政申錫頓首謝未幾拜尚書右丞踰月進同中書門下平章事乃除王璠京兆尹密諭帝旨璠漏言而守澄黨鄭注得其謀太和五年遣軍候豆盧著誣告申錫與漳王謀反守澄持奏浴堂將遣騎二百屠申錫家宦官馬存亮爭曰謀反者獨申錫耳當召南司會議不然京師跂足亂矣守澄不能對時二月晦羣司皆休中人馳召宰相馬奔乏死於道易所乘以復命申錫與牛僧孺路隋李宗閔至中書中人唱曰所召無宋申錫申錫始知得罪望延英門以笏叩額還第僧孺等見上出著告牒皆駭愕不知所對守澄捕申錫親吏張全真家人買子緣信及十六宅典史脅成其罪帝乃罷申錫爲太子右庶子召三省官御史中書大理卿京兆尹會中書集賢院雜驗申錫反狀京師譁言相驚久乃定翌日延英召宰相羣臣悉入初議抵申錫死僕射竇易直率然對曰人臣無將將而必誅聞者不然於是左散騎常侍崔玄亮給事中李固言諫議大

夫王質補闕盧鈞舒元褒羅泰蔣係裴休竇宗直韋温拾遺李羣韋端符丁居晦袁都等伏殿陛請以獄付外帝震怒叱曰吾與公卿議矣卿屬第出玄亮固言執據愈切涕泣懇到繇是議貸申錫於嶺表京兆尹崔瑄大理卿王正雅苦請出著與申錫劾正情狀帝悟乃貶申錫開州司馬從而流死者數十百人天下以爲冤擢豆盧著兼殿中侍御史初申錫既歸易素服俛命外舍其妻責謂曰公何負天子乃反乎申錫曰吾起孤生位宰相蒙國厚恩不能鉏姦亂反爲所陷我豈反者乎初申錫以清節進疾要位者納賕餉敗風俗故自爲近臣凡四方賄謝一不受旣被罪有司驗劾悉得所還問遺書朝野爲咨閔然在宰府無它謀略七年感憤卒有詔歸葬開成元年李石因延英召對從容言曰陛下之政皆承天心惟申錫之枉久未原雪帝慙曰我當時亦悟其失而詐忠者迫我以社稷計故耳使逢漢昭宣時當不坐此因追復右丞同中書門下平章事贈兵部尚書錄其子慎微爲城固尉會昌二年賜諡曰貞贊曰鎰元衡暴忠王室絳巨德大臣皆爲賊姦所乘不死元身蓋福善禍淫之訓有時而撓雖然賢者於忠誼寧以一不幸遽使慷慨於其心哉要躬可殞而名與岱嶽等矣公輔噉開而猶納說焉申錫謀小任大顛沛從之惜乎

唐書卷一百五十二

唐書卷一百五十二考證

張鑑傳後胤五世孫○後胤傳作曾孫非五世孫也

武元衡傳曾祖載德○舊書作德載

歲內三遷至右司郎中○舊書一歲遷左司郎中

李絳傳御史中丞王璠○舊書作王播

宋申錫傳錄其子慎微爲城固尉○舊書作慎微文宗紀又作道微

